

# Saturae

Decimus Iunius Iuvenalis

## Satura I

Semper ego auditor tantum? numquamne reponam  
uexatus totiens rauci Theseide Cordi?  
inpune ergo mihi recitauerit ille togatas,  
hic elegos? inpune diem consumpserit ingens  
Telephus aut summi plena iam margine libri 5  
scriptus et in tergo necdum finitus Orestes?  
nota magis nulli domus est sua quam mihi lucus  
Martis et Aeoliis uicinum rupibus antrum  
Vulcani; quid agant uenti, quas torqueat umbras  
Aeacus, unde alius furtiuae deuehat aurum 10  
pelliculae, quantas iaculetur Monychus ornos,  
Frontonis platani conuolsaque marmora clamant  
semper et adsiduo ruptae lectore columnae.  
expectes eadem a summo minimoque poeta.  
et nos ergo manum ferulae subduximus, et nos 15  
consilium dedimus Sullae, priuatus ut altum  
dormiret. stulta est clementia, cum tot ubique  
uatibus occurras, periturae parcere chartae.  
cur tamen hoc potius libeat decurrere campo,  
per quem magnus equos Auruncae flexit alumnus, 20  
si uacat ac placidi rationem admittitis, edam.  
cum tener uxorem ducat spado, Meuia Tuscum  
figat aprum et nuda teneat uenabula mamma,  
patricios omnis opibus cum prouocet unus  
quo tondente grauis iuueni mihi barba sonabat, 25  
cum pars Niliacae plebis, cum uerna Canopi  
Crispinus Tyrias umero reuocante lacernas  
uentilet aestiuum digitis sudantibus aurum  
nec sufferre queat maioris pondera gemmae,  
difficile est saturam non scribere. nam quis iniquae 30  
tam patiens urbis, tam ferreus, ut teneat se,  
causidici noua cum ueniat lectica Mathonis  
plena ipso, post hunc magni delator amici  
et cito rapturus de nobilitate comesa  
quod superest, quem Massa timet, quem munere 35  
palpat Carus et a trepido Thymele summissa Latino;  
cum te summoueant qui testamenta merentur  
noctibus, in caelum quos euehit optima summi  
nunc uia processus, uetulae uesica beatae?  
unciolam Proculeius habet, sed Gillo deuncem, 40  
partes quisque suas ad mensuram inguinis heres.  
accipiat sane mercedem sanguinis et sic  
palleat ut nudis pressit qui calcibus anguem  
aut Lugudunensem rhetor dicturus ad aram.

quid referam quanta siccum iecur ardeat ira, 45  
cum populum gregibus comitum premit hic spoliator  
pupilli prostantis et hic damnatus inani  
iudicio? quid enim saluis infamia nummis?  
exul ab octaua Marius bibit et fruitur dis  
iratis, at tu uictrix, prouincia, ploras. 50  
haec ego non credam Venusina digna lucerna?  
haec ego non agitem? sed quid magis? Heracleas  
aut Diomedea aut mugitum labyrinthi  
et mare percussum puero fabrumque uolantem,  
cum leno accipiat moechi bona, si capiendi 55  
ius nullum uxori, doctus spectare lacunar,  
doctus et ad calicem uigilanti stertere naso;  
cum fas esse putet curam sperare cohortis  
qui bona donauit praesepibus et caret omni  
maiorum censu, dum peruolat axe citato 60  
Flaminiam puer Automedon? nam lora tenebat  
ipse, lacernatae cum se iactaret amicae.  
nonne libet medio ceras implere capaces  
quadriuio, cum iam sexta ceruice feratur  
hinc atque inde patens ac nuda paene cathedra 65  
et multum referens de Maecenate supino  
signator falsi, qui se lautum atque beatum  
exiguus tabulis et gemma fecerit uda?  
occurrit matrona potens, quae molle Calenum  
porrectura uiro miscet sitiante rubetam 70  
instituitque rudes melior Lucusta propinquas  
per famam et populum nigros efferre maritos.  
aude aliquid breuibus Gyaris et carcere dignum,  
si uis esse aliquid. probitas laudatur et alget;  
criminibus debent hortos, praetoria, mensas, 75  
argentum uetus et stantem extrapocula caprum.  
quem patitur dormire nurus corruptor auarae,  
quem sponsae turpes et praetextatus adulter?  
si natura negat, facit indignatio uersum  
qualemcumque potest, quales ego uel Cluuienus. 80  
ex quo Deucalion nimbis tollentibus aequor  
nauigio montem ascendit sortesque poposcit  
paulatimque anima caluerunt mollia saxa  
et maribus nudas ostendit Pyrrha puellas,  
quidquid agunt homines, uotum, timor, ira, uoluptas, 85  
gaudia, discursus, nostri farrago libelli est.  
et quando uberius uitiorum copia? quando  
maior auaritiae patuit sinus? alea quando  
hos animos? neque enim oculis comitantibus itur  
ad casum tabulae, posita sed luditur arca. 90  
proelia quanta illic dispensatore uidebis  
armigero! simplexne furor sestertia centum  
perdere et horrenti tunicam non reddere seruo?

quis totidem erexit uillas, quis fercula septem  
 secreto cenauit auus? nunc sportula primo 95  
 limine parua sedet turbae rapienda togatae.  
 ille tamen faciem prius inspicit et trepidat ne  
 suppositus uenias ac falso nomine poscas:  
 agnitus accipies. iubet a praecone uocari  
 ipsos Troiugenas, nam uexant limen et ipsi 100  
 nobiscum. 'da praetori, da deinde tribuno.'  
 sed libertinus prior est. 'pior' inquit ego adsum.  
 cur timeam dubitemur locum defendere, quamuis  
 natus ad Euphraten, molles quod in aure fenestrae  
 arguerint, licet ipse negem? sed quinque tabernae 105  
 quadringenta parant. quid confert purpura maior  
 optandum, si Laurenti custodit in agro  
 conductas Coruinus ouis, ego possideo plus  
 Pallante et Licinis?' expectent ergo tribuni,  
 uincant diuitiae, sacro ne cedat honori 110  
 nuper in hanc urbem pedibus qui uenerat albis,  
 quandoquidem inter nos sanctissima diuitiarum  
 maiestas, etsi funesta Pecunia templo  
 nondum habitat, nullas nummorum ereximus aras,  
 ut colitur Pax atque Fides, Victoria, Virtus 115  
 quaeque salutato crepitat Concordia nido.  
 sed cum summus honor finito computet anno,  
 sportula quid referat, quantum rationibus addat,  
 quid facient comites quibus hinc toga, calceus hinc est  
 et panis fumusque domi? densissima centum 120  
 quadrantes lectica petit, sequiturque maritum  
 languida uel praegnas et circumducitur uxor.  
 hic petit absentis nota iam callidus arte  
 ostendens uacuam et clausam pro coniuge sellam.  
 'Galla mea est' inquit, 'citius dimitte. moraris? 125  
 profer, Galla, caput. noli uexare, quiescet.'  
 ipse dies pulchro distinguitur ordine rerum:  
 sportula, deinde forum iurisque peritus Apollo  
 atque triumphales, inter quas ausus habere  
 nescio quis titulos Aegyptius atque Arabarches, 130  
 cuius ad effigiem non tantum meiere fas est.  
 uestibulis abeunt ueteres lassique clientes  
 uotaque deponunt, quamquam longissima cenae  
 spes homini; caulis miseris atque ignis emendus.  
 optima siluarum interea pelagique uorabit 135  
 rex horum uacuisque toris tantum ipse iacebit.  
 nam de tot pulchris et latis orbibus et tam  
 antiquis una comedunt patrimonia mensa.  
 nullus iam parasitus erit. sed quis ferat istas  
 luxuriae sordes? quanta est gula quae sibi totos 140  
 ponit apros, animal propter conuiuia natum!  
 poena tamen praesens, cum tu deponis amictus

turgidus et crudum pauonem in balnea portas.  
hinc subitae mortes atque intestata senectus.  
it noua nec tristis per cunctas fabula cenas; 145  
ducitur iratis plaudendum funus amicis.  
nil erit ulterius quod nostris moribus addat  
posteritas, eadem facient cupientque minores,  
omne in praecipiti uitium stetit. utere uelis,  
totos pande sinus. dices hic forsitan ' unde 150  
ingenium par materiae? unde illa priorum  
scribendi quodcumque animo flagrante liberet  
simplicitas? "cuius non audeo dicere nomen?  
quid refert dictis ignoscat Mucius an non?"  
pone Tigillinum, taeda lucebis in illa 155  
qua stantes ardent qui fixo gutture fumant,  
et latum media sulcum deducit harena.'  
qui dedit ergo tribus patruis aconita, uehatur  
pensilibus plumis atque illinc despiciat nos?  
'cum ueniet contra, digito compesce labellum: 160  
accusator erit qui uerbum dixerit "hic est."  
securus licet Aenean Rutulumque ferocem  
committas, nulli grauis est percussus Achilles  
aut multum quaesitus Hylas urnamque secutus:  
ense uelut stricto quotiens Lucilius ardens 165  
infremuit, rubet auditor cui frigida mens est  
criminibus, tacita sudant praecordia culpa.  
inde ira et lacrimae. tecum prius ergo uoluta  
haec animo ante tubas: galeatum sero duelli  
paenitet.' experiar quid concedatur in illos 170  
quorum Flaminia tegitur cinis atque Latina.

## Satura II

Vltra Sauromatas fugere hinc libet et glaciale  
Oceanum, quotiens aliquid de moribus audent  
qui Curios simulant et Bacchanalia uiuunt.  
indocti primum, quamquam plena omnia gypso  
Chryssippi inuenias; nam perfectissimus horum, 5  
si quis Aristotelen similem uel Pittacon emit  
et iubet archet pluteum seruare Cleanthas.  
frontis nulla fides; quis enim non uicus abundat  
tristibus obscenis? castigas turpia, cum sis  
inter Socraticos notissima fossa cinaedos? 10  
hispida membra quidem et durae per bracchia saetae  
promittunt atrocem animum, sed podice leui  
caeduntur tumidae medico ridente mariscae.  
rarus sermo illis et magna libido tacendi  
atque supercilio breuior coma. uerius ergo 15  
et magis ingenue Peribomius; hunc ego fatis  
inputo, qui uultu morbum incessuque fatetur.  
horum simplicitas miserabilis, his furor ipse  
dat ueniam; sed peiores, qui talia uerbis  
Herculis inuadunt et de uirtute locuti 20  
clunem agitant. 'ego te ceuentem, Sexte, uerebor?'  
infamis Varillus ait, ' quod deterius te?'  
loripedem rectus derideat, Aethiopem albus.  
quis tulerit Gracchos de seditione querentes?  
quis caelum terris non misceat et mare caelo 25  
si fur displiceat Verri, homicida Miloni,  
Clodius accuset moechos, Catilina Cethegum,  
in tabulam Sullae si dicant discipuli tres?  
qualis erat nuper tragico pollutus adulter  
concupitu, qui tunc leges reuocabat amaras 30  
omnibus atque ipsis Veneri Martique timendas,  
cum tot abortiuus fecundam Iulia uuluam  
solueret et patruo similes effunderet offas.  
nonne igitur iure ac merito uitia ultima fictos  
contemnunt Scauros et castigata remordent? 35  
non tulit ex illis toruum Laronia quendam  
clamantem totiens ' ubi nunc, lex Iulia, dormis?'  
atque ita subridens: 'felicis tempora, quae te  
moribus opponunt. habeat iam Roma pudorem:  
tertius e caelo cecidit Cato. sed tamen unde 40  
haec emis, hirsuto spirant opobalsama collo  
quae tibi? ne pudeat dominum monstrare tabernae.  
quod si uexantur leges ac iura, citari  
ante omnis debet Scantinia. respice primum  
et scrutare uiros, faciunt nam plura; sed illos 45

defendit numerus iunctaeque umbone phalanges.  
 magna inter molles concordia. non erit ullum  
 exemplum in nostro tam detestabile sexu.  
 Tedia non lambit Cluuiam nec Flora Catullam:  
 Hispo subit iuuenes et morbo pallet utroque. 50  
 numquid nos agimus causas, ciuilia iura  
 nouimus aut ullo strepitu fora uestra mouemus?  
 luctantur paucae, comedunt coloephia paucae.  
 uos lanam trahitis calathisque peracta refertis  
 uellera, uos tenui praegnantem stamine fusum 55  
 Penelope melius, leuius torquetis Arachne,  
 horrida quale facit residens in codice paelex.  
 notum est cur solo tabulas inpleuerit Hister  
 liberto, dederit uiuus cur multa puellae.  
 diues erit magno quae dormit tertia lecto. 60  
 tu nube atque tace: donant arcana cylindros.  
 de nobis post haec tristis sententia fertur?  
 dat ueniam coruis, uexat censura columbas.'  
 fugerunt trepidi uera ac manifesta canentem  
 Stoicidae; quid enim falsi Laronia? sed quid 65  
 non facient alii, cum tu multicia sumas,  
 Cretice, et hanc uestem populo mirante perores  
 in Proculus et Pollittas? est moecha Fabulla;  
 damnetur, si uis, etiam Carfinia: talem  
 non sumet damnata togam. ' ~~sc~~ Iulius ardet, 70  
 aestuo.' nudus agas: minus est insania turpis.  
 en habitum quo te leges ac iura ferentem  
 uulneribus crudis populus modo uictor et illud  
 montanum positus audiret uulgus aratris.  
 quid non proclames, in corpore iudicis ista 75  
 si uideas? quaero an deceant multicia testem.  
 acer et indomitus libertatisque magister,  
 Cretice, perluces. dedit hanc contagio labem  
 et dabit in plures, sicut grex totus in agris  
 unius scabie cadit et porrigine porci 80  
 uuaque conspecta liuorem ducit ab uua.  
 foedius hoc aliquid quandoque audebis amictu;  
 nemo repente fuit turpissimus. accipient te  
 paulatim qui longa domi redimicula sumunt  
 frontibus et toto posuere monilia collo 85  
 atque bonam tenerae placant abdomine porcae  
 et magno cratere deam. sed more sinistro  
 exagitata procul non intrat femina limen:  
 solis ara deae maribus patet. ' tē, profanae,'  
 clamatur, 'nullo gemit hic tibicina cornu.' 90  
 talia secreta coluerunt orgia taeda  
 Cecropiam soliti Baptae lassare Cotyton.  
 ille supercilium madida fuligine tinctum  
 obliqua producit acu pingitque trementis

attollens oculos; uitreo bibit ille priapo 95  
 reticulumque comis auratum ingentibus implet  
 caerulea indutus scutulata aut galbina rasa  
 et per Iunonem domini iurante ministro;  
 ille tenet speculum, pathici gestamen Othonis,  
 Actoris Aurunci spoliū, quo se ille uidebat 100  
 armatum, cum iam tolli uexilla iuberet.  
 res memoranda nouis annalibus atque recenti  
 historia, speculum ciuilis sarcina belli.  
 nimirum summi ducis est occidere Galbam  
 et curare cutem, summi constantia cuius 105  
 Bebriaci campis solium adfectare Palati  
 et pressum in faciem digitis extendere panem,  
 quod nec in Assyrio pharetrata Sameramis orbe  
 maesta nec Actiaca fecit Cleopatra carina.  
 hic nullus uerbis pudor aut reuerentia mensae, 110  
 hic turpis Cybeles et fracta uoce loquendi  
 libertas et crine senex fanaticus albo  
 sacrorum antistes, rarum ac memorabile magni  
 gutturis exemplum conducendusque magister.  
 quid tamen expectant, Phrygio quos tempus erat 115  
 iam more superuacuam cultris abrumpere carnem?  
 quadringenta dedit Gracchus sestertia dotem  
 cornicini, siue hic recto cantauerat aere;  
 signatae tabulae, dictum ' feliciter,' ingens  
 cena sedet, gremio iacuit noua nupta mariti. 120  
 o proceres, censore opus est an haruspice nobis?  
 scilicet horreres maioraque monstra putares,  
 si mulier uitulum uel si bos ederet agnum?  
 segmenta et longos habitus et flammea sumit  
 arcano qui sacra ferens nutantia loro 125  
 sudauit clipeis ancilibus. o pater urbis,  
 unde nefas tantum Latiis pastoribus? unde  
 haec tetigit, Gradiue, tuos urtica nepotes?  
 traditur ecce uiro clarus genere atque opibus uir,  
 nec galeam quassas nec terram cuspide pulsas 130  
 nec quereris patri. uade ergo et cede seueri  
 iugeribus campi, quem neglegis. ' officium cras  
 primo sole mihi peragendum in ualle Quirini.'  
 quae causa officii? ' quid queris? nubit amicus  
 nec multos adhibet.' licet modo uiuere, fient, 135  
 fient ista palam, cupient et in acta referri.  
 interea tormentum ingens nubentibus haeret  
 quod nequeant parere et partu retinere maritos.  
 sed melius, quod nil animis in corpora iuris  
 natura indulget: steriles moriuntur, et illis 140  
 turgida non prodest condita pyxide Lyde,  
 nec prodest agili palmas praebere luperco.  
 uicit et hoc monstrum tunicati fuscina Gracchi,



lustrauitque fuga mediam gladiator harenam  
 et Capitolinis generosior et Marcellis 145  
 et Catuli Paulique minoribus et Fabiis et  
 omnibus ad podium spectantibus, his licet ipsum  
 admoueas cuius tunc munere retia misit.  
 esse aliquos manes et subterranea regna,  
 Cocytum et Stygio ranas in gurgite nigras, 150  
 atque una transire uadum tot milia cumba  
 nec pueri credunt, nisi qui nondum aere lauantur.  
 sed tu uera puta: Curius quid sentit et ambo  
 Scipiadae, quid Fabricius manesque Camilli,  
 quid Cremerae legio et Cannis consumpta iuuentus, 155  
 tot bellorum animae, quotiens hinc talis ad illos  
 umbra uenit? cuperent lustrari, si qua darentur  
 sulphura cum taedis et si foret umida laurus.  
 illic heu miseri traducimur. arma quidem ultra  
 litora Iuuernae promouimus et modo captas 160  
 Orcadas ac minima contentos nocte Britannos,  
 sed quae nunc populi fiunt uictoris in urbe  
 non faciunt illi quos uicimus. et tamen unus  
 Armenius Zalaces cunctis narratur ephebis  
 mollior ardenti sese indulsisse tribuno. 165  
 aspice quid faciant commercia: uenerat obses,  
 hic fiunt homines. nam si mora longior urbem  
 indulsit pueris, non umquam derit amator.  
 mittentur braciae, cultelli, frena, flagellum:  
 sic praetextatos referunt Artaxata mores. 170

### Satura III

Quamuis digressu ueteris confusus amici  
laudo tamen, uacuis quod sedem figere Cumis  
destinet atque unum ciuem donare Sibyllae.  
ianua Baiarum est et gratum litus amoeni  
secessus. ego uel Prochytam praepono Suburae; 5  
nam quid tam miserum, tam solum uidimus, ut non  
deterius credas horrere incendia, lapsus  
tectorum adsiduos ac mille pericula saeuae  
urbis et Augusto recitantes mense poetas?  
sed dum tota domus raeda componitur una, 10  
substitit ad ueteres arcus madidamque Capenam.  
hic, ubi nocturnae Numa constituebat amicae  
(nunc sacri fontis nemus et delubra locantur  
Iudaeis, quorum cophinus fenumque supellex;  
omnis enim populo mercedem pendere iussa est 15  
arbor et eiectis mendicat silua Camenis),  
in uallem Egeriae descendimus et speluncas  
dissimiles ueris. quanto praesentius esset  
numen aquis, uiridi si margine cluderet undas  
herba nec ingenuum uiolarent marmora tofum. 20  
hic tunc Vmbrius ' quando artibus' inquit ' hostis  
nullus in urbe locus, nulla emolumenta laborum,  
res hodie minor est here quam fuit atque eadem cras  
deteret exiguis aliquid, proponimus illuc  
ire, fatigatas ubi Daedalus exiit alas, 25  
dum noua canities, dum prima et recta senectus,  
dum superest Lachesi quod torqueat et pedibus me  
porto meis nullo dextram subeunte bacillo.  
cedamus patria. uiuant Artorius istic  
et Catulus, maneant qui nigrum in candida uertunt, 30  
quis facile est aedem conducere, flumina, portus,  
siccandam eluuiem, portandum ad busta cadauer,  
et praebere caput domina uenale sub hasta.  
quondam hi cornicines et municipalis harenae  
perpetui comites notaeque per oppida buccae 35  
munera nunc edunt et, uerso pollice uulgus  
cum iubet, occidunt populariter; inde reuersi  
conducunt foricas, et cur non omnia? cum sint  
quales ex humili magna ad fastigia rerum  
extollit quotiens uoluit Fortuna iocari. 40  
quid Romae faciam? mentiri nescio; librum,  
si malus est, nequeo laudare et poscere; motus  
astrorum ignoro; funus promittere patris  
nec uolo nec possum; ranarum uiscera numquam

inspexi; ferre ad nuptam quae mittit adulter, 45  
 quae mandat, norunt alii; me nemo ministro  
 fur erit, atque ideo nulli comes exeo tamquam  
 mancus et extinctae corpus non utile dextrae.  
 quis nunc diligitur nisi conscius et cui feruens  
 aestuat occultis animus semperque tacendis? 50  
 nil tibi se debere putat, nil conferet umquam,  
 participem qui te secreti fecit honesti.  
 carus erit Verri qui Verrem tempore quo uult  
 accusare potest. tanti tibi non sit opaci  
 omnis harena Tagi quodque in mare uoluitur aurum, 55  
 ut somno careas ponendaque praemia sumas  
 tristis et a magno semper timearis amico.  
 quae nunc diuitibus gens acceptissima nostris  
 et quos praecipue fugiam, properabo fateri,  
 nec pudor obstabit. non possum ferre, Quirites, 60  
 Graecam urbem. quamuis quota portio faecis Achaei?  
 iam pridem Syrus in Tiberim defluxit Orontes  
 et linguam et mores et cum tibicine chordas  
 obliquas nec non gentilia tympana secum  
 uexit et ad circum iussas prostare puellas. 65  
 ite, quibus grata est picta lupa barbara mitra.  
 rusticus ille tuus sumit trechedipna, Quirine,  
 et ceromatico fert niceteria collo.  
 hic alta Sicyone, ast hic Amydone relictas,  
 hic Andro, ille Samo, hic Trallibus aut Alabandis, 70  
 Esquilias dictumque petunt a uimine collem,  
 uiscera magnarum domuum dominique futuri.  
 ingenium uelox, audacia perdita, sermo  
 promptus et Isaeo torrentior. ede quid illum  
 esse putes. quemuis hominem secum attulit ad nos: 75  
 grammaticus, rhetor, geometres, pictor, aliptes,  
 augur, schoenobates, medicus, magus, omnia nouit  
 Graeculus esuriens: in caelum iusseris ibit.  
 in summa non Maurus erat neque Sarmata nec Thrax  
 qui sumpsit pinnas, mediis sed natus Athenis. 80  
 horum ego non fugiam conchylia? me prior ille  
 signabit fultusque toro meliore recumbet,  
 aduectus Romam quo pruna et cottana uento?  
 usque adeo nihil est quod nostra infantia caelum  
 hausit Auentini baca nutrita Sabina? 85  
 quid quod adulandi gens prudentissima laudat  
 sermonem indocti, faciem deformis amici,  
 et longum inualidi collum ceruicibus aequat  
 Herculis Antaeum procul a tellure tenentis, 90  
 miratur uocem angustam, qua deterius nec  
 ille sonat quo mordetur gallina marito?  
 haec eadem licet et nobis laudare, sed illis  
 creditur. an melior cum Thaida sustinet aut cum

uxorem comoedus agit uel Dorida nullo  
 cultam palliolo? mulier nempe ipsa uidetur, 95  
 non persona, loqui: uacua et plana omnia dicas  
 infra uentriculum et tenui distantia rima.  
 nec tamen Antiochus nec erit mirabilis illic  
 aut Stratocles aut cum molli Demetrius Haemo:  
 natio comoeda est. rides, maiore cachinno 100  
 concutitur; flet, si lacrimas conspexit amici,  
 nec dolet; igniculum brumae si tempore poscas,  
 accipit endromidem; si dixeris "aestuo," sudat.  
 non sumus ergo pares: melior, qui semper et omni  
 nocte dieque potest aliena sumere uultum 105  
 a facie, iactare manus laudare paratus,  
 si bene ructauit, si rectum minxit amicus,  
 si trulla inuerso crepitum dedit aurea fundo.  
 praeterea sanctum nihil ~aut~ ab inguine tutum,  
 non matrona laris, non filia uirgo, nec ipse 110  
 sponsus leuis adhuc, non filius ante pudicus.  
 horum si nihil est, auiam resupinat amici.  
 [scire uolunt secreta domus atque inde timeri.]  
 et quoniam coepit Graecorum mentio, transi  
 gymnasia atque audi facinus maioris abollae. 115  
 Stoicus occidit Baream delator amicum  
 discipulumque senex ripa nutritus in illa  
 ad quam Gorgonei delapsa est pinna caballi.  
 non est Romano cuiquam locus hic, ubi regnat  
 Protogenes aliquis uel Diphilus aut Hermarchus, 120  
 qui gentis uitio numquam partitur amicum,  
 solus habet. nam cum facilem stillauit in aurem  
 exiguum de naturae patriaeque ueneno,  
 limine summoueor, perierunt tempora longi  
 seruitii; nusquam minor est iactura clientis. 125  
 quod porro officium, ne nobis blandiar, aut quod  
 pauperis hic meritum, si curet nocte togatus  
 currere, cum praetor lictorem inpellat et ire  
 praecipitem iubeat dudum uigilantibus orbis,  
 ne prior Albinam et Modiam collega salutet? 130  
 diuitis hic seruo cludit latus ingenuorum  
 filius; alter enim quantum in legione tribuni  
 accipiunt donat Caluinae uel Catienae,  
 ut semel aut iterum super illam palpitet; at tu,  
 cum tibi uestiti facies scorti placet, haeres 135  
 et dubitas alta Chionen deducere sella.  
 da testem Romae tam sanctum quam fuit hospes  
 numinis Idaei, procedat uel Numa uel qui  
 seruauit trepidam flagranti ex aede Mineruam:  
 protinus ad censum, de moribus ultima fiet 140  
 quaestio. "quot pascit seruos? quot possidet agri  
 iugera? quam multa magnaue paropside cenat?"

quantum quisque sua nummorum seruat in arca,  
 tantum habet et fidei. iures licet et Samothracum  
 et nostrorum aras, contemnere fulmina pauper 145  
 creditur atque deos dis ignoscentibus ipsis.  
 quid quod materiam praebet causasque iocorum  
 omnibus hic idem, si foeda et scissa lacerna,  
 si toga sordidula est et rupta calceus alter  
 pelle patet, uel si consuto uolnere crassum 150  
 atque recens linum ostendit non una cicatrix?  
 nil habet infelix paupertas durius in se  
 quam quod ridiculos homines facit. "exeat" inquit,  
 "si pudor est, et de puluino surgat equestri,  
 cuius res legi non sufficit, et sedeant hic 155  
 lenonum pueri quocumque ex fornice nati,  
 hic plaudat nitidus praeconis filius inter  
 pinnirapi cultos iuuenes iuuenesque lanistae."  
 sic libitum uano, qui nos distinxit, Othoni.  
 quis gener hic placuit censu minor atque puellae 160  
 sarcinulis inpar? quis pauper scribitur heres?  
 quando in consilio est aedilibus? agmine facto  
 debuerant olim tenues migrasse Quirites.  
 haut facile emergunt quorum uirtutibus obstat  
 res angusta domi, sed Romae durior illis 165  
 conatus: magno hospitium miserabile, magno  
 seruorum uentres, et frugi cenula magno.  
 fictilibus cenare pudet, quod turpe negabis  
 translatus subito ad Marsos mensamque Sabellam  
 contentusque illic Veneto duroque cucullo. 170  
 pars magna Italiae est, si uerum admittimus, in qua  
 nemo togam sumit nisi mortuus. ipsa dierum  
 festorum herboso colitur si quando theatro  
 maiestas tandemque redit ad pulpita notum  
 exodium, cum personae pallentis hiatum 175  
 in gremio matris formidat rusticus infans,  
 aequales habitus illic similesque uidebis  
 orchestram et populum; clari uelamen honoris  
 sufficiunt tunicae summis aedilibus albae.  
 hic ultra uires habitus nitor, hic aliquid plus 180  
 quam satis est interdum aliena sumitur arca.  
 commune id uitium est: hic uiuimus ambitiosa  
 paupertate omnes. quid te moror? omnia Romae  
 cum pretio. quid das, ut Cossum aliquando salutes,  
 ut te respiciat clauso Veiiento labello? 185  
 ille metit barbam, crinem hic deponit amati;  
 plena domus libis uenalibus: accipe et istud  
 fermentum tibi habe. praestare tributa clientes  
 cogimur et cultis augere peculia seruis.  
 quis timet aut timuit gelida Praeneste ruinam 190  
 aut positis nemorosa inter iuga Volsiniis aut

simplicibus Gabiis aut proni Tiburis arce?  
 nos urbem colimus tenui tibicine fultam  
 magna parte sui; nam sic labentibus obstat  
 uilicus et, ueteris rimae cum textit hiatus, 195  
 securos pendente iubet dormire ruina.  
 uiuendum est illic, ubi nulla incendia, nulli  
 nocte metus. iam poscit aquam, iam friuola transfert  
 Vcalegon, tabulata tibi iam tertia fumant:  
 tu nescis; nam si gradibus trepidatur ab imis, 200  
 ultimus ardebit quem tegula sola tuetur  
 a pluuiis, molles ubi reddunt oua columbae.  
 lectus erat Cordo Procula minor, urceoli sex  
 ornamentum abaci, nec non et paruulus infra  
 cantharus et recubans sub eodem marmore Chiron, 205  
 iamque uetus Graecos seruabat cista libellos  
 et diuina opici rodebant carmina mures.  
 nil habuit Cordus, quis enim negat? et tamen illud  
 perdidit infelix totum nihil. ultimus autem  
 aerumnae cumulus, quod nudum et frustra rogantem 210  
 nemo cibo, nemo hospitio tectoque iuuabit.  
 si magna Asturici cecidit domus, horrida mater,  
 pullati proceres, differt uadimonia praetor.  
 tum gemimus casus urbis, tunc odimus ignem.  
 ardet adhuc, et iam accurrit qui marmora donet, 215  
 conferat inpensas; hic nuda et candida signa,  
 hic aliquid praeclarum Euphranoris et Polycliti,  
 haec Asianorum uetera ornamenta deorum,  
 hic libros dabit et forulos mediamque Mineruam,  
 hic modium argenti. meliora ac plura reponit 220  
 Persicus orbis lautissimus et merito iam  
 suspectus tamquam ipse suas incenderit aedes.  
 si potes auelli circensibus, optima Sorae  
 aut Fabrateriae domus aut Frusinone paratur  
 quanti nunc tenebras unum conducis in annum. 225  
 hortulus hic puteusque breuis nec reste mouendus  
 in tenuis plantas facili diffunditur haustu.  
 uiue bidentis amans et culti uilicus horti  
 unde epulum possis centum dare Pythagoreis.  
 est aliquid, quocumque loco, quocumque recessu, 230  
 unius sese dominum fecisse lacertae.  
 plurimus hic aeger moritur uigilando (sed ipsum  
 languorem peperit cibus imperfectus et haerens  
 ardenti stomacho); nam quae meritoria somnum  
 admittunt? magnis opibus dormitur in urbe. 235  
 inde caput morbi. raedarum transitus arto  
 uicorum in flexu et stantis conuicia mandrae  
 eripient somnum Druso uitulisque marinis.  
 si uocat officium, turba cedente uehetur  
 diues et ingenti curret super ora Liburna 240

atque obiter leget aut scribet uel dormiet intus;  
 namque facit somnum clausa lectica fenestra.  
 ante tamen ueniet: nobis properantibus obstat  
 unda prior, magno populus premit agmine lumbos  
 qui sequitur; ferit hic cubito, ferit assere duro 245  
 alter, at hic tignum capiti incutit, ille metretam.  
 pinguia crura luto, planta mox undique magna  
 calor, et in digito clauus mihi militis haeret.  
 nonne uides quanto celebretur sportula fumo?  
 centum conuiuiae, sequitur sua quemque culina. 250  
 Corbulo uix ferret tot uasa ingentia, tot res  
 inpositas capiti, quas recto uertice portat  
 seruulus infelix et cursu uentilat ignem.  
 scinduntur tunicae sartae modo, longa coruscat  
 serraco ueniente abies, atque altera pinum 255  
 plaustra uehunt; nutant alte populoque minantur.  
 nam si procubuit qui saxa Ligustica portat  
 axis et euersum fudit super agmina montem,  
 quid superest de corporibus? quis membra, quis ossa  
 inuenit? obtritum uolgi perit omne cadauer 260  
 more animae. domus interea secura patellas  
 iam lauat et bucca foculum excitat et sonat unctis  
 striglibus et pleno componit lintea guto.  
 haec inter pueros uarie properantur, at ille  
 iam sedet in ripa taetrumque nouicius horret 265  
 porthmea nec sperat caenosi gurgitis alnum  
 infelix nec habet quem porrigat ore trientem.  
 respice nunc alia ac diuersa pericula noctis:  
 quod spatium tectis sublimibus unde cerebrum  
 testa ferit, quotiens rimosa et curta fenestris 270  
 uasa cadant, quanto percussum pondere signent  
 et laedant silicem. possis ignauus haberi  
 et subiti casus inprouidus, ad cenam si  
 intestatus eas: adeo tot fata, quot illa  
 nocte patent uigiles te praetereunte fenestrae. 275  
 ergo optes uotumque feras miserabile tecum,  
 ut sint contentae patulas defundere pelues.  
 ebrius ac petulans, qui nullum forte cecidit,  
 dat poenas, noctem patitur lugentis amicum  
 Pelidae, cubat in faciem, mox deinde supinus: 280  
 [ergo non aliter poterit dormire; quibusdam]  
 somnum rixa facit. sed quamuis inprobus annis  
 atque mero feruens cauet hunc quem coccina laena  
 uitari iubet et comitum longissimus ordo,  
 multum praeterea flammaram et aenea lampas. 285  
 me, quem luna solet deducere uel breue lumen  
 candelae, cuius dispenso et tempero filum,  
 contemnit. miserae cognosce prohoemia rixae,  
 si rixa est, ubi tu pulsas, ego uapulo tantum.

stat contra starique iubet. parere necesse est; 290  
 nam quid agas, cum te furiosus cogat et idem  
 fortior? "unde uenis" exclamat, "cuius aceto,  
 cuius conche tumes? quis tecum sectile porrum  
 sutor et elixi ueruecis labra comedit?  
 nil mihi respondes? aut dic aut accipe calcem. 295  
 ede ubi consistas: in qua te quaero proseucha?"  
 dicere si temptes aliquid tacitusue recedas,  
 tantumdem est: feriunt pariter, uadimonia deinde  
 irati faciunt. libertas pauperis haec est:  
 pulsatus rogat et pugnibus concisus adorat 300  
 ut liceat paucis cum dentibus inde reuerti.  
 nec tamen haec tantum metuas; nam qui spoliet te  
 non derit clausis domibus postquam omnis ubique  
 fixa catenatae siluit compago tabernae.  
 interdum et ferro subitus grassator agit rem: 305  
 armato quotiens tutae custode tenentur  
 et Pomptina palus et Gallinaria pinus,  
 sic inde huc omnes tamquam ad uiuaria currunt.  
 qua fornace graues, qua non incude catenae?  
 maximus in uinclis ferri modus, ut timeas ne 310  
 uomer deficiat, ne marra et sarcula desint.  
 felices proauorum ataus, felicia dicas  
 saecula quae quondam sub regibus atque tribunis  
 uiderunt uno contentam carcere Romam.  
 his alias poteram et pluris subnectere causas, 315  
 sed iumenta uocant et sol inclinat. eundum est;  
 nam mihi commota iamdudum mulio uirga  
 adnuit. ergo uale nostri memor, et quotiens te  
 Roma tuo refici properantem reddet Aquino,  
 me quoque ad Heluinam Cererem uestramque Dianam 320  
 conuerte a Cumis. saturarum ego, ni pudet illas,  
 auditor gelidos ueniam caligatus in agros.'



## Satura IV

Ecce iterum Crispinus, et est mihi saepe uocandus  
ad partes, monstrum nulla uirtute redemptum  
a uitiiis, aegrae solaque libidine fortes  
deliciae, uiduas tantum aspernatus adulter.  
quid refert igitur, quantis iumenta fatiget 5  
porticibus, quanta nemorum uectetur in umbra,  
iugera quot uicina foro, quas emerit aedes  
[nemo malus felix, minime corruptor et idem]  
incestus, cum quo nuper uittata iacebat  
sanguine adhuc uiuo terram subitura sacerdos? 10  
sed nunc de factis leuioribus. et tamen alter  
si fecisset idem caderet sub iudice morum;  
nam, quod turpe bonis Titio Seiioque, decebat  
Crispinum. quid agas, cum dira et foedior omni  
crimine persona est? mullum sex milibus emit, 15  
aequantem sane paribus sestertia libris,  
ut perhibent qui de magnis maiora locuntur.  
consilium laudo artificis, si munere tanto  
praecipuam in tabulis ceram senis abstulit orbi;  
est ratio ulterior, magnae si misit amicae, 20  
quae uehitur cluso latis specularibus antro.  
nil tale expectes: emit sibi. multa uidemus  
quae miser et frugi non fecit Apicius. hoc tu  
succinctus patria quondam, Crispine, papyro?  
hoc pretio squamae? potuit fortasse minoris 25  
piscator quam piscis emi; prouincia tanti  
uendit agros, sed maiores Apulia uendit.  
qualis tunc epulas ipsum glutuisse putamus  
induperatorem, cum tot sestertia, partem  
exiguam et modicae sumptam de margine cenae, 30  
purpureus magni ructarit scurra Palati,  
iam princeps equitum, magna qui uoce solebat  
uendere municipes fracta de merce siluros?  
incipere, Calliope. licet et considerare: non est  
cantandum, res uera agitur. narrate, puellae 35  
Pierides, prosit mihi uos dixisse puellas.  
cum iam semianimum laceraret Flauius orbem  
ultimus et caluo seruiret Roma Neroni,  
incidit Hadriaci spatium admirabile rhombi  
ante domum Veneris, quam Dorica sustinet Ancon, 40  
impleuitque sinus; neque enim minor haeserat illis  
quos operit glacies Maeotica ruptaque tandem  
solibus effundit torrentis ad ostia Ponti  
desidia tardos et longo frigore pingues.

destinat hoc monstrum cumbae linique magister                   45  
 pontifici summo. quis enim proponere talem  
 aut emere auderet, cum plena et litora multo  
 delatore forent? dispersi protinus algae  
 inquisitores agerent cum remige nudo,  
 non dubitaturi fugituum dicere piscem                   50  
 depastumque diu uiuaria Caesaris, inde  
 elapsum ueterem ad dominum debere reuerti.  
 si quid Palfurio, si credimus Armillato,  
 quidquid conspicuum pulchrumque est aequore toto  
 res fiski est, ubicumque natat. donabitur ergo,           55  
 ne pereat. iam letifero cedente pruinis  
 autumno, iam quartanam sperantibus aegris,  
 stridebat deformis hiems praedamque recentem  
 seruabat; tamen hic properat, uelut urgueat auster.  
 utque lacus suberant, ubi quamquam diruta seruat       60  
 ignem Troianum et Vestam colit Alba minorem,  
 obstitit intranti miratrix turba parumper.  
 ut cessit, facili patuerunt cardine ualuae;  
 exclusi spectant admissa obsonia patres.  
 itur ad Atriden. tum Picens 'accipe' dixit           65  
 ' p̄uatis maiora focis. genialis agatur  
 iste dies. propera stomachum laxare sagina  
 et tua seruatum consume in saecula rhombum.  
 ipse capi uoluit.' quid apertius? et tamen illi  
 surgebant cristae. nihil est quod credere de se           70  
 non possit cum laudatur dis aequa potestas.  
 sed derat pisci patinae mensura. uocantur  
 ergo in consilium proceres, quos oderat ille,  
 in quorum facie miserae magnaeeq; sedebat  
 pallor amicitiae. primus clamante Liburno           75  
 'currite, iam sedit' p̄ta properabat abolla  
 Pegasus, attonitae positus modo uilicus urbi.  
 anne aliud tum praefecti? quorum optimus atque  
 interpret legum sanctissimus omnia, quamquam  
 temporibus diris, tractanda putabat inermi           80  
 iustitia. uenit et Crispi iucunda senectus,  
 cuius erant mores qualis facundia, mite  
 ingenium. maria ac terras populosque regenti  
 quis comes utilior, si clade et peste sub illa  
 saeuitiam damnare et honestum adferre liceret       85  
 consilium? sed quid uiolentius aure tyranni,  
 cum quo de pluuiis aut aestibus aut nimbose  
 uere locuturi fatum pendebat amici?  
 ille igitur numquam derexit bracchia contra  
 torrentem, nec ciuis erat qui libera posset           90  
 uerba animi proferre et uitam inpendere uero.  
 sic multas hiemes atque octogensima uidit  
 solstitia, his armis illa quoque tutus in aula.

proximus eiusdem properabat Acilius aeui  
 cum iuvene indigno quem mors tam saeua maneret 95  
 et domini gladiis tam festinata; sed olim  
 prodigio par est in nobilitate senectus,  
 unde fit ut malim fraterculus esse gigantis.  
 profuit ergo nihil misero quod comminus ursos  
 figebat Numidas Albana nudus harena 100  
 uenator. quis enim iam non intellegat artes  
 patricias? quis priscum illud miratur acumen,  
 Brute, tuum? facile est barbato inponere regi.  
 nec melior uultu quamuis ignobilis ibat  
 Rubrius, offensae ueteris reus atque tacendae, 105  
 et tamen improbior saturam scribente cinaedo.  
 Montani quoque uenter adest abdomine tardus,  
 et matutino sudans Crispinus amomo  
 quantum uix redolent duo funera, saeuior illo  
 Pompeius tenui iugulos aperire susurro, 110  
 et qui uulturibus seruabat uiscera Dacis  
 Fuscus marmorea meditatus proelia uilla,  
 et cum mortifero prudens Veiento Catullo,  
 qui numquam uisae flagrabat amore puellae,  
 grande et conspicuum nostro quoque tempore monstrum, 115  
 caecus adulator dirisque ~a ponte~ satelles,  
 dignus Aricinos qui mendicaret ad axes  
 blandaque deuexae iactaret basia raedae.  
 nemo magis rhombum stupuit; nam plurima dixit  
 in laeuum conuersus, at illi dextra iacebat 120  
 belua. sic pugnas Cilicis laudabat et ictus  
 et pegma et pueros inde ad uelaria raptos.  
 non cedit Veiento, sed ut fanaticus oestro  
 percussus, Bellona, tuo diuinat et ' inens  
 omen habes' inquit ' agni clarique triumphi. 125  
 regem aliquem capies, aut de temone Britanno  
 excidet Aruiragus. peregrina est belua: cernis  
 erectas in terga sudes?' hoc defuit unum  
 Fabricio, patriam ut rhombi memoraret et annos.  
 ' quidam igitur censes? conciditur?' bsit ab illo 130  
 dedecus hoc' Moranus ait, 'testa alta paretur  
 quae tenui muro spatiosum colligat orbem.  
 debetur magnus patinae subitusque Prometheus.  
 argillam atque rotam citius properate, sed ex hoc  
 tempore iam, Caesar, figuli tua castra sequantur.' 135  
 uicit digna uiro sententia. nouerat ille  
 luxuriam inperii ueterem noctesque Neronis  
 iam medias aliamque famem, cum pulmo Falerno  
 arderet. nulli maior fuit usus edendi  
 tempestate mea: Circeis nata forent an 140  
 Lucrinum ad saxum Rutupinoue edita fundo  
 ostrea callebat primo deprendere morsu,

et semel aspecti litus dicebat echini.  
surgitur et misso proceres exire iubentur  
consilio, quos Albanam dux magnus in arcem 145  
traxerat attonitos et festinare coactos,  
tamquam de Chattis aliquid toruisque Sygambris  
dicturus, tamquam ex diuersis partibus orbis  
anxia praecipiti uenisset epistula pinna.  
atque utinam his potius nugis tota illa dedisset 150  
tempora saeuitiae, claras quibus abstulit urbi  
inlustresque animas inpune et uindice nullo.  
sed periit postquam cerdonibus esse timendus  
coeperat: hoc nocuit Lamiarum caede madenti.

Satura V

Si te propositi nondum pudet atque eadem est mens,  
ut bona summa putes aliena uiuere quadra,  
si potes illa pati quae nec Sarmentus iniquas  
Caesaris ad mensas nec uilis Gabba tulisset,  
quamuis iurato metuam tibi credere testi. 5  
uentre nihil noui frugalius; hoc tamen ipsum  
defecisse puta, quod inani sufficit aluo:  
nulla crepido uacat? nusquam pons et tegetis pars  
dimidia breuior? tantine iniuria cenae,  
tam ieiuna fames, cum possit honestius illic 10  
et tremere et sordes farris mordere canini?  
    primo fige loco, quod tu discumbere iussus  
mercedem solidam ueterum capis officiorum.  
fructus amicitiae magnae cibus: inputat hunc rex,  
et quamuis rarum tamen inputat. ergo duos post 15  
si libuit menses neglectum adhibere clientem,  
tertia ne uacuo cessaret culcita lecto,  
' uanissimus' ait. uotorum summa. quid ultra  
quaeris? habet Trebius propter quod rumpere somnum  
debeat et ligulas dimittere, sollicitus ne 20  
tota salutatrix iam turba peregerit orbem,  
sideribus dubiis aut illo tempore quo se  
frigida circumagunt pigri serraca Bootae.  
    qualis cena tamen! uinum quod sucida nolit  
lana pati: de conuiuia Corybanta uidebis. 25  
iurgia proludunt, sed mox et pocula torques  
saucius et rubra deterges uulnera mappa,  
inter uos quotiens libertorumque cohortem  
pugna Saguntina feruet commissa lagona.  
ipse capillato diffusum consule potat 30  
calcatamque tenet bellis socialibus uuam.  
cardiaco numquam cyathum missurus amico  
cras bibit Albanis aliquid de montibus aut de  
Setinis, cuius patriam titulumque senectus  
deleuit multa ueteris fuligine testae, 35  
quale coronati Thrasea Heluidiusque bibebant  
Brutorum et Cassi natalibus. ipse capaces  
Heliadum crustas et inaequales berullo  
Virro tenet phialas: tibi non committitur aurum,  
uel, si quando datur, custos adfixus ibidem, 40  
qui numeret gemmas, unguis obseruet acutos.  
da ueniam: praeclara illi laudatur iaspis.  
nam Virro, ut multi, gemmas ad pocula transfert  
a digitis, quas in uaginae fronte solebat

ponere zelotypo iuuenis praelatus Iarbae. 45  
 tu Beneuentani sutoris nomen habentem  
 siccabis calicem nasorum quattuor ac iam  
 quassatum et rupto poscentem sulphura uitro.  
 si stomachus domini feruet uinoque ciboque,  
 frigidior Geticis petitur decocta pruinis. 50  
 non eadem uobis poni modo uina querebar?  
 uos aliam potatis aquam. tibi pocula cursor  
 Gaetulus dabit aut nigri manus ossea Mauri  
 et cui per mediam nolis occurrere noctem,  
 cliuosae ueheris dum per monumenta Latinae. 55  
 flos Asiae ante ipsum, pretio maiore paratus  
 quam fuit et Tulli census pugnacis et Anci  
 et, ne te teneam, Romanorum omnia regum  
 friuola. quod cum ita sit, tu Gaetulum Ganymedem  
 respice, cum sities. nescit tot milibus emptus 60  
 pauperibus miscere puer, sed forma, sed aetas  
 digna supercilio. quando ad te peruenit ille?  
 quando rogatus adest calidae gelidaeque minister?  
 quippe indignatur ueteri parere clienti  
 quodque aliquid poscas et quod se stante recumbas. 65  
 [maxima quaeque domus seruis est plena superbis.]  
 ecce alius quanto porrexit murmure panem  
 uix fractum, solidae iam mucida frusta farinae,  
 quae genuinum agitent, non admittentia morsum.  
 sed tener et niueus mollique siligine fictus 70  
 seruatur domino. dextram cohibere memento;  
 salua sit artoptae reuerentia. finge tamen te  
 inprobulum, superest illic qui ponere cogat:  
 ' uis tu consuetis, audax conuiuia, canistris  
 impleri panisque tui nouisse colorem?' 75  
 ' scibet hoc fuerat, propter quod saepe relictas  
 coniuge per montem aduersum gelidasque cucurri  
 Esquillas, fremeret saeua cum grandine uernus  
 Iuppiter et multo stillaret paenula nimbo.'  
 aspice quam longo distinguat pectore lancem 80  
 quae fertur domino squilla, et quibus undique saepta  
 asparagis qua despiciat conuiuia cauda,  
 dum uenit excelsi manibus sublata ministri.  
 sed tibi dimidio constrictus cammarus ouo  
 ponitur exigua feralis cena patella. 85  
 ipse Venafrano piscem perfundit, at hic qui  
 pallidus adfertur misero tibi caulis olebit  
 lanternam; illud enim uestris datur alueolis quod  
 canna Micipsarum prora subuexit acuta,  
 propter quod Romae cum Boccare nemo lauatur, 90  
 quod tutos etiam facit a serpentibus atris.  
 nullus erit domini, quem misit Corsica uel quem  
 Tauromenitanae rupes, quando omne peractum est

et iam defecit nostrum mare, dum gula saeuit,  
 retibus adsiduis penitus scrutante macello 95  
 proxima, nec patimur Tyrrhenum crescere piscem.  
 instruit ergo focum prouincia, sumitur illinc  
 quod captator emat Laenas, Aurelia uendat.  
 Virroni muraena datur, quae maxima uenit  
 gurgite de Siculo; nam dum se continet Auster, 100  
 dum sedet et siccat madidas in carcere pinnas,  
 contemnunt mediam temeraria lina Charybdim:  
 uos anguilla manet longae cognata colubrae  
 aut ~glacie aspersus~ maculis Tiberinus et ipse  
 uernula riparum, pinguis torrente cloaca 105  
 et solitus mediae cryptam penetrare Suburae.  
 ipsi pauca uelim, facilem si praebeat aurem.  
 nemo petit, modicis quae mittebantur amicis  
 a Seneca, quae Piso bonus, quae Cotta solebat  
 largiri; namque et titulis et fascibus olim 110  
 maior habebatur donandi gloria. solum  
 poscimus ut cenes ciuilitate. hoc face et esto,  
 esto, ut nunc multi, diues tibi, pauper amicis.  
 anseris ante ipsum magni iecur, anseribus par  
 altilis, et flauis dignus ferro Meleagri 115  
 spumat aper. post hunc tradentur tubera, si uer  
 tunc erit et facient optata tonitrua cenas  
 maiores. ' tibi ~~abe~~ frumentum' Adidius inquit,  
 ' o Ibye, disiunge boues, dum tubera mittas.'  
 structorem interea, ne qua indignatio desit, 120  
 saltantem spectes et chironomunta uolanti  
 cultello, donec peragat dictata magistri  
 omnia; nec minimo sane discrimine refert  
 quo gestu lepores et quo gallina secetur.  
 duceris planta uelut ictus ab Hercule Cacus 125  
 et ponere foris, si quid temptaueris umquam  
 hiscere tamquam habeas tria nomina. quando propinat  
 Virro tibi sumitue tuis contacta labellis  
 pocula? quis uestrum temerarius usque adeo, quis  
 perditus, ut dicat regi 'bibe'? plurima sunt quae 130  
 non audent homines pertusa dicere laena.  
 quadringenta tibi si quis deus aut similis dis  
 et melior fatis donaret homuncio, quantus  
 ex nihilo, quantus fieres Virronis amicus!  
 ' al Trebio, pone ad Trebium. uis, frater, ab ipsis 135  
 ilibus?' o nummi, uobis hunc praestat honorem,  
 uos estis frater. dominus tamen et domini rex  
 si uis tunc fieri, nullus tibi paruulus aula  
 luserit Aeneas nec filia dulcior illo.  
 [iucundum et carum sterilis facit uxor amicum.] 140  
 sed tua nunc Mycale pariat licet et pueros tres  
 in gremium patris fundat semel, ipse loquaci

gaudebit nido, uiridem thoraca iubebit  
adferri minimasque nuces assemque rogatum,  
ad mensam quotiens parasitus uenerit infans. 145

uilibus ancipites fungi ponentur amicis,  
boletus domino, sed quales Claudius edit  
ante illum uxoris, post quem nihil amplius edit.  
Virro sibi et reliquis Virronibus illa iubebit  
poma dari, quorum solo pascaris odore, 150

qualia perpetuus Phaeacum autumnus habebat,  
credere quae possis subrepta sororibus Afris:  
tu scabie frueris mali, quod in aggere rodit  
qui tegitur parma et galea metuensque flagelli  
discit ab hirsuta iaculum torquere capella. 155

forsitan inpensae Virronem parcere credas.  
hoc agit, ut doleas; nam quae comoedia, mimus  
quis melior plorante gula? ergo omnia fiunt,  
si nescis, ut per lacrimas effundere bilem  
cogaris pressoque diu stridere molari. 160

tu tibi liber homo et regis conuiuia uideris:  
captum te nidore suae putat ille culinae,  
nec male coniectat; quis enim tam nudus, ut illum  
bis ferat, Etruscum puero si contigit aurum  
uel nodus tantum et signum de paupere loro? 165

spes bene cenandi uos decipit. 'ecce dabit iam  
semesum leporem atque aliquid de clunibus apri,  
ad nos iam ueniet minor altilis.' ~~in~~ parato  
intactoque omnes et stricto pane tacetis.  
ille sapit, qui te sic utitur. omnia ferre 170

si potes, et debes. pulsandum uertice raso  
praebebis quandoque caput nec dura timebis  
flagra pati, his epulis et tali dignus amico.



## Satura VI

Credo Pudicitiam Saturno rege moratam  
in terris uisamque diu, cum frigida paruas  
praeberet spelunca domos ignemque laremque  
et pecus et dominos communi clauderet umbra,  
siluestrem montana torum cum sterneret uxor 5  
frondibus et culmo uicinarumque ferarum  
pellibus, haut similis tibi, Cynthia, nec tibi, cuius  
turbauit nitidos extinctus passer ocellos,  
sed potanda ferens infantibus ubera magnis  
et saepe horridior glandem ructante marito. 10  
quippe aliter tunc orbe nouo caeloque recenti  
uiuabant homines, qui rupto robore nati  
compositiue luto nullos habuere parentes.  
multa Pudicitiae ueteris uestigia forsan  
aut aliqua exstiterint et sub Ioue, sed Ioue nondum 15  
barbato, nondum Graecis iurare paratis  
per caput alterius, cum furem nemo timeret  
caulibus ac pomis et aperto uiueret horto.  
paulatim deinde ad superos Astraea recessit  
hac comite, atque duae pariter fugere sorores. 20  
anticum et uetus est alienum, Postume, lectum  
concutere atque sacri genium contemnere fulcri.  
omne aliud crimen mox ferrea protulit aetas:  
uiderunt primos argentea saecula moechos.  
conuentum tamen et pactum et sponsalia nostra 25  
tempestate paras iamque a tonsore magistro  
pecteris et digito pignus fortasse dedisti?  
certe sanus eras. uxorem, Postume, ducis?  
dic qua Tisiphone, quibus exagitare colubris.  
ferre potes dominam saluis tot restibus ullam, 30  
cum pateant altae caligantesque fenestrae,  
cum tibi uicinum se praebeat Aemilius pons?  
aut si de multis nullus placet exitus, illud  
nonne putas melius, quod tecum pusio dormit?  
pusio, qui noctu non litigat, exigit a te 35  
nulla iacens illic munuscula, nec queritur quod  
et lateri parcas nec quantum iussit anheles.  
sed placet Vrsidio lex Iulia: tollere dulcem  
cogitat heredem, cariturus turture magno  
mullorumque iubis et captatore macello. 40  
quid fieri non posse putes, si iungitur ulla  
Vrsidio? si moechorum notissimus olim  
stulta maritali iam porrigit ora capistro,  
quem totiens textit perituri cista Latini?

quid quod et antiquis uxor de moribus illi                   45  
quaeritur? o medici, nimiam pertundite uenam.  
delicias hominis! Tarpeium limen adora  
pronus et auratam Iunoni caede iuuencam,  
si tibi contigerit capitis matrona pudici.  
paucae adeo Cereris uittas contingere dignae,                   50  
quarum non timeat pater oscula. necte coronam  
postibus et densos per limina tende corymbos.  
unus Hiberinae uir sufficit? ocius illud  
extorquebis, ut haec oculo contenta sit uno.  
magna tamen fama est cuiusdam rure paterno                   55  
uiuatis. uiuat Gabiis ut uixit in agro,  
uiuat Fidenis, et agello cedo paterno.  
quis tamen adfirmat nil actum in montibus aut in  
speluncis? adeo senuerunt Iuppiter et Mars?  
    porticibusne tibi monstratur femina uoto                   60  
digna tuo? cuneis an habent spectacula totis  
quod securus ames quodque inde excerpere possis?  
chironomon Ledam molli saltante Bathyllo  
Tuccia uesicae non imperat, Apula gannit,  
[sicut in amplexu, subito et miserabile longum.]                   65  
attendit Thymele: Thymele tunc rustica discit.  
ast aliae, quotiens aulaea recondita cessant,  
et uacuo clusoque sonant fora sola theatro,  
atque a plebeis longe Megalesia, tristes  
personam thyrsumque tenent et subligar Acci.                   70  
Vrbicus exodio risum mouet Atellanae  
gestibus Autonoës, hunc diligit Aelia pauper.  
soluitur his magno comoedi fibula, sunt quae  
Chrysogonum cantare uentent, Hispulla tragoedo  
gaudet: an expectas ut Quintilianus ametur?                   75  
accipis uxorem de qua citharoedus Echion  
aut Glaphyrus fiat pater Ambrosiusque choraules.  
longa per angustos figamus pulpita uicos,  
ornentur postes et grandi ianua lauro,  
ut testudineo tibi, Lentule, conopeo                   80  
nobilis Euryalum murmillonem exprimat infans.  
nupta senatori comitata est Eppia ludum  
ad Pharon et Nilum famosaque moenia Lagi  
prodigia et mores urbis damnante Canopo.  
inmemor illa domus et coniugis atque sororis                   85  
nil patriae indulsit, plorantisque improba natos  
utque magis stupeas ludos Paridemque reliquit.  
sed quamquam in magnis opibus plumaque paterna  
et segmentatis dormisset paruula cunis,  
contempsit pelagus; famam contempserat olim,                   90  
cuius apud molles minima est iactura cathedras.  
Tyrrhenos igitur fluctus lateque sonantem  
pertulit Ionium constanti pectore, quamuis

mutandum totiens esset mare. iusta pericli  
 si ratio est et honesta, timent pauidoque gelantur 95  
 pectore nec tremulis possunt insistere plantis:  
 fortem animum praestant rebus quas turpiter audent.  
 si iubeat coniunx, durum est conscendere nauem,  
 tunc sentina grauis, tunc summus uertitur aer:  
 quae moechum sequitur, stomacho ualet. illa maritum 100  
 conuomit, haec inter nautas et prandet et errat  
 per puppem et duros gaudet tractare rudentis.  
 qua tamen exarsit forma, qua capta iuuenta  
 Eppia? quid uidit propter quod ludia dici  
 sustinuit? nam Sergiolus iam radere guttur 105  
 coeperat et secto requiem sperare lacerto;  
 praeterea multa in facie deformia, sicut  
 attritus galea mediisque in naribus ingens  
 gibbus et acre malum semper stillantis ocelli.  
 sed gladiator erat. facit hoc illos Hyacinthos; 110  
 hoc pueris patriaeque, hoc praetulit illa sorori  
 atque uiro. ferrum est quod amant. hic Sergius idem  
 accepta rude coepisset Veiiento uideri.  
 quid priuata domus, quid fecerit Eppia, curas?  
 respice riuales diuorum, Claudius audi 115  
 quae tulerit. dormire uirum cum senserat uxor,  
 sumere nocturnos meretrix Augusta cucullos 118  
 ausa Palatino et tegetem praeferre cubili 117  
 linquebat comite ancilla non amplius una. 119  
 sed nigrum flauo crinem abscondente galero  
 intrauit calidum ueteri centone lupanar  
 et cellam uacuam atque suam; tunc nuda papillis  
 prostitit auratis titulum mentita Lyciscae  
 ostenditque tuum, generose Britannice, uentrem.  
 excepit blanda intrantis atque aera poposcit. 125  
 [continueque iacens cunctorum absorbit ictus.]  
 mox lenone suas iam dimittente puellas  
 tristes abit, et quod potuit tamen ultima cellam  
 clausit, adhuc ardens rigidae tentigine uoluae,  
 et lassata uiris necdum satiata recessit, 130  
 obscurisque genis turpis fumoque lucernae  
 foeda lupanaris tulit ad puluinar odorem.  
 hippomanes carmenque loquar coctumque uenenum  
 priuignoque datum? faciunt grauiora coactae  
 imperio sexus minimumque libidine peccant. 135  
 'optina sed quare Caesennia teste marito?'  
 bis quingena dedit. tanti uocat ille pudicam,  
 nec pharetris Veneris macer est aut lampade feruet:  
 inde faces ardent, ueniunt a dote sagittae.  
 libertas emitur. coram licet innuat atque 140  
 rescribat: uidua est, locuples quae nupsit auaro.  
 'cur desiderio Bibulae Sertorius ardet?'

si uerum excutias, facies non uxor amatur.  
 tres rugae subeant et se cutis arida laxet,  
 fiant obscuri dentes oculique minores, 145  
 'collige sarcinulas' dicet libertus ' tæxi.  
 iam grauis es nobis et saepe emungeris. exi  
 ocius et propera. sicco uenit altera naso.'  
 interea calet et regnat poscitque maritum  
 pastores et ouem Canusinam ulmosque Falernas- 150  
 quantulum in hoc!-pueros omnes, ergastula tota,  
 quodque domi non est, sed habet uicinus, ematur.  
 mense quidem brumae, cum iam mercator Iason  
 clausus et armatis obstat casa candida nautis,  
 grandia tolluntur crystallina, maxima rursus 155  
 murrina, deinde adamas notissimus et Beronices  
 in digito factus pretiosior. hunc dedit olim  
 barbarus incestae, dedit hunc Agrippa sorori,  
 obseruant ubi festa mero pede sabbata reges  
 et uetus indulget senibus clementia porcis. 160  
 ' nullæ de tantis gregibus tibi digna uidetur?'  
 sit formonsa, decens, diues, fecunda, uetustos  
 porticibus disponat auos, intactior omni  
 crinibus effusis bellum dirimente Sabina,  
 rara auis in terris nigroque simillima cycno, 165  
 quis feret uxorem cui constant omnia? malo,  
 malo Venustinam quam te, Cornelia, mater  
 Gracchorum, si cum magnis uirtutibus adfers  
 grande supercilium et numeras in dote triumphos.  
 tolle tuum, precor, Hannibalem uictumque Syphacem 170  
 in castris et cum tota Carthagine migra.  
 ' pæce, precor, Pæan, et tu, dea, pone sagittas;  
 nil pueri faciunt, ipsam configite matrem'  
 Amphion clamat, sed Pæan contrahit arcum.  
 extulit ergo greges natorum ipsumque parentem, 175  
 dum sibi nobilior Latonae gente uidetur  
 atque eadem scrofa Niobe fecundior alba.  
 quae tanti grauitas, quae forma, ut se tibi semper  
 inputet? huius enim rari summique uoluptas  
 nulla boni, quotiens animo corrupta superbo 180  
 plus aloes quam mellis habet. quis deditus autem  
 usque adeo est, ut non illam quam laudibus effert  
 horreat inque diem septenis oderit horis?  
 quaedam parua quidem, sed non toleranda maritis.  
 nam quid rancidius quam quod se non putat ulla 185  
 formosam nisi quae de Tusca Graecula facta est,  
 de Sulmonensi mera Cecropis? omnia Graece:  
 [cum sit turpe magis nostris nescire Latine.]  
 hoc sermone pauent, hoc iram, gaudia, curas,  
 hoc cuncta effundunt animi secreta. quid ultra? 190  
 concumbunt Graece. dones tamen ista puellis,

tune etiam, quam sextus et octogensimus annus  
 pulsat, adhuc Graece? non est hic sermo pudicus  
 in uetula. quotiens lascium interuenit illud  
 zoe kai psyche, modo sub lodice relictis 195  
 uteris in turba. quod enim non excitet inguen  
 uox blanda et nequam? digitos habet. ut tamen omnes  
 subsidant pinnae, dicas haec mollius Haemo  
 quamquam et Carpophoro, facies tua computat annos.  
 si tibi legitimis pactam iunctamque tabellis 200  
 non es amaturus, ducendi nulla uidetur  
 causa, nec est quare cenam et mustacea perdas  
 labente officio crudis donanda, nec illud  
 quod prima pro nocte datur, cum lance beata  
 Dacicus et scripto radiat Germanicus auro. 205  
 si tibi simplicitas uxoria, deditus uni  
 est animus, summitte caput ceruice parata  
 ferre iugum. nullam inuenies quae parcat amanti.  
 ardeat ipsa licet, tormentis gaudet amantis  
 et spoliis; igitur longe minus utilis illi 210  
 uxor, quisquis erit bonus optandusque maritus.  
 nil umquam inuita donabis coniuge, uendes  
 hac obstante nihil, nihil haec si nolet emetur.  
 haec dabit affectus: ille excludatur amicus  
 iam senior, cuius barbam tua ianua uidit. 215  
 testandi cum sit lenonibus atque lanistis  
 libertas et iuris idem contingat harenae,  
 non unus tibi riualis dictabitur heres.  
 ' p~~o~~a crucem seruo.' 'meruit quo crimine seruus  
 supplicium? quis testis adest? quis detulit? audi; 220  
 nulla umquam de morte hominis cunctatio longa est.'  
 ' o~~o~~mens, ita seruus homo est? nil fecerit, esto:  
 hoc uolo, sic iubeo, sit pro ratione uoluntas.'  
 imperat ergo uiro. sed mox haec regna relinquit  
 permutatque domos et flammea conterit; inde 225  
 auolat et sprete repetit uestigia lecti.  
 ornatas paulo ante fores, pendentia linquit  
 uela domus et adhuc uirides in limine ramos.  
 sic crescit numerus, sic fiunt octo mariti  
 quinque per autumnos, titulo res digna sepulcri. 230  
 desperanda tibi salua concordia socru.  
 illa docet spoliis nudi gaudere mariti,  
 illa docet missis a corruptore tabellis  
 nil rude nec simplex rescribere, decipit illa  
 custodes aut aere domat. tum corpore sano 235  
 aduocat Archigenen onerosaque pallia iactat.  
 abditus interea latet et secretus adulter  
 inpatiensque morae silet et praeputia ducit.  
 scilicet expectas ut tradat mater honestos  
 atque alios mores quam quos habet? utile porro 240

filiolam turpi uetulae producere turpem.

nulla fere causa est in qua non femina litem  
mouerit. accusat Manilia, si rea non est.  
conponunt ipsae per se formantque libellos,  
principium atque locos Celso dictare paratae. 245

endromidas Tyrias et femineum ceroma  
quis nescit, uel quis non uidit uulnera pali,  
quem cauat adsiduis rudibus scutoque lacessit  
atque omnis implet numeros dignissima prorsus  
Florali matrona tuba, nisi si quid in illo 250

pectore plus agit ueraeque paratur harenae?  
quem praestare potest mulier galeata pudorem,  
quae fugit a sexu? uires amat. haec tamen ipsa  
uir nollet fieri; nam quantula nostra uoluptas!  
quale decus, rerum si coniugis auctio fiat, 255

balteus et manicae et cristae crurisque sinistri  
dimidium tegimen! uel si diuersa mouebit  
proelia, tu felix ocreas uendente puella.  
hae sunt quae tenui sudant in cyclade, quarum  
delicias et panniculus bombycinus urit. 260

aspice quo fremitu monstratos perferat ictus  
et quanto galeae curuetur pondere, quanta  
poplitibus sedeat quam denso fascia libro,  
et ride positis scaphium cum sumitur armis.  
dicite uos, neptes Lepidi caeciue Metelli 265

Gurgitis aut Fabii, quae ludia sumpserit umquam  
hos habitus? quando ad palum gemat uxor Asyli?

semper habet lites alternaque iurgia lectus  
in quo nupta iacet; minimum dormitur in illo.  
tum grauis illa uiro, tunc orba tigride peior, 270  
cum simulat gemitus occulti conscia facti,  
aut odit pueros aut ficta paelice plorat

uberibus semper lacrimis semperque paratis  
in statione sua atque expectantibus illam,  
quo iubeat manare modo. tu credis amorem, 275  
tu tibi tunc, uruca, places fletumque labellis  
exorbes, quae scripta et quot lecture tabellas  
si tibi zelotypae retegantur scrinia moechae!

sed iacet in serui complexibus aut equitis. dic,  
dic aliquem sodes hic, Quintiliane, colorem. 280  
haeremus. dic ipsa. ' hūm conuenerat' inquit  
' ut faceres tu quod uelles, nec non ego possem  
indulgere mihi. clames licet et mare caelo  
confundas, homo sum.' nihil auidacius illis  
deprentis: iram atque animos a crimine sumunt. 285

unde haec monstra tamen uel quo de fonte requiris?  
praestabat castas humilis fortuna Latinas  
quondam, nec uitii contingi parua sinebant  
tectata labor somnique breues et uellere Tusco

uexatae duraeque manus ac proximus urbi                    290  
 Hannibal et stantes Collina turre mariti.  
 nunc patimur longae pacis mala, saeuior armis  
 luxuria incubuit uictumque ulciscitur orbem.  
 nullum crimen abest facinusque libidinis ex quo  
 paupertas Romana perit. hinc fluxit ad istos                    295  
 et Sybaris colles, hinc et Rhodos et Miletos  
 atque coronatum et petulans madidumque Tarentum.  
 prima peregrinos obscena pecunia mores  
 intulit, et turpi fregerunt saecula luxu  
 diuitiae molles. quid enim uenus ebria curat?                    300  
 inguinis et capitis quae sint discrimina nescit  
 grandia quae mediis iam noctibus ostrea mordet,  
 cum perfusa mero spumant unguenta Falerno,  
 cum bibitur concha, cum iam uertigine tectum  
 ambulat et geminis exsurgit mensa lucernis.                    305  
 i nunc et dubita qua sorbeat aera sanna  
 Maura, Pudicitiae ueterem cum praeterit aram,                    308  
 Tullia quid dicat, notae collactea Maurae.                    307  
 noctibus hic ponunt lecticas, micturiunt hic                    309  
 effigiemque deae longis siphonibus implent  
 inque uices equitant ac Luna teste mouentur,  
 inde domos abeunt: tu calcas luce reuersa  
 coniugis urinam magnos uisurus amicos.  
 nota bonae secreta deae, cum tibia lumbos  
 incitat et cornu pariter uinoque feruntur                    315  
 attonitae crinemque rotant ululantque Priapi  
 maenades. o quantus tunc illis mentibus ardor  
 concubitus, quae uox saltante libidine, quantus  
 ille meri ueteris per crura madentia torrens!  
 lenonum ancillas posita Saufeia corona                    320  
 prouocat et tollit pendentis praemia coxae,  
 ipsa Medullinae fluctum crisantis adorat:  
 palma inter dominas, uirtus natalibus aequa.  
 nil ibi per ludum simulabitur, omnia fient  
 ad uerum, quibus incendi iam frigidus aeuo                    325  
 Laomedontiades et Nestoris hirnea possit.  
 tunc prurigo morae inpatiens, tum femina simplex,  
 ac pariter toto repetitus clamor ab antro  
 ' *ai*m fas est, admitte uiros.' dormitat adulter,  
 illa iubet sumpto iuuenem properare cucullo;                    330  
 si nihil est, seruis incurritur; abstuleris spem  
 seruorum, uenit et conductus aquarius; hic si  
 quaeritur et desunt homines, mora nulla per ipsam  
 quo minus inposito clunem summittat asello.  
 atque utinam ritus ueteres et publica saltem                    335  
 his intacta malis agerentur sacra; sed omnes  
 nouerunt Mauri atque Indi quae psaltria penem  
 maiorem quam sunt duo Caesaris Anticatones

illuc, testiculi sibi conscius unde fugit mus,  
 intulerit, ubi uelari pictura iubetur 340  
 quaecumque alterius sexus imitata figuras.  
 et quis tunc hominum contemptor numinis, aut quis  
 simpuium ridere Numae nigrumque catinum  
 et Vaticano fragiles de monte patellas  
 ausus erat? sed nunc ad quas non Clodius aras? 345  
 [audio quid ueteres olim moneatis amici,  
 ' ~~po~~seram, cohibe.' sed quis custodiet ipsos  
 custodes? cauta est et ab illis incipit uxor.]  
 iamque eadem summis pariter minimisque libido,  
 nec melior silicem pedibus quae conterit atrum 350  
 quam quae longorum uehitur ceruice Syrorum.  
 ut spectet ludos, conducit Ogulnia uestem,  
 conducit comites, sellam, ceruical, amicas,  
 nutricem et flauam cui det mandata puellam.  
 haec tamen argenti superest quodcumque paterni 355  
 leuibus athleticis et uasa nouissima donat.  
 multis res angusta domi, sed nulla pudorem  
 paupertatis habet nec se metitur ad illum  
 quem dedit haec posuitque modum. tamen utile quid sit  
 prospiciunt aliquando uiri, frigusque famemque 360  
 formica tandem quidam expauere magistra:  
 prodiga non sentit pereuntem femina censum.  
 ac uelut exhausta recidiuus pullulet arca  
 nummus et e pleno tollatur semper aceruo,  
 non umquam reputant quanti sibi gaudia constant. 365  
 in quacumque domo uiuit ludique professus Ox1  
 obscenum, tremula promittit et omnia dextra, Ox2  
 inuenies omnis turpes similesque cinaedis. Ox3  
 his uiolare cibos sacraeque adsistere mensae Ox4  
 permittunt, et uasa iubent frangenda lauari Ox5  
 cum colocyntha bibit uel cum barbata chelidon. Ox6  
 purior ergo tuis laribus meliorque lanista, Ox7  
 in cuius numero longe migrare iubetur Ox8  
 psyllus ab ~eupholio.~ quid quod nec retia turpi Ox9  
 iunguntur tunicae, nec cella ponit eadem Ox10  
 munimenta umeri ~pulsatamque arma~ tridentem Ox11  
 qui nudus pugnare solet? pars ultima ludi Ox12  
 accipit has animas aliusque in carcere neruos. Ox13  
 sed tibi communem calicem facit uxor et illis Ox14  
 cum quibus Albanum Surrentinumque recuset Ox15  
 flaua ruinosi lupa degustare sepulchri. Ox16  
 horum consiliis nubunt subitaeque recedunt, Ox17  
 his languentem animum ~seruant~ et seria uitae, Ox18  
 his clunem atque latus discunt uibrare magistris, Ox19  
 quicquid praeterea scit qui docet. haud tamen illi Ox20  
 semper habenda fides: oculos fuligine pascit Ox21  
 distinctus croceis et reticulatus adulter. Ox22



suspectus tibi sit, quanto uox mollior et quo	Ox23
saepius in teneris haerebit dextera lumbis.	Ox24
hic erit in lecto fortissimus; exiit illic	Ox25
personam docili Thais saltata Triphallo.	Ox26
quem rides? aliis hunc mimum! sponsio fiat:	Ox27
purum te contendo uirum. contendo: fateris?	Ox28
an uocat ancillas tortoris pergula? noui	Ox29
consilia et ueteres quaecumque monetis amici,	Ox30
' <del>pon</del> seram, cohibe' .sed quis custodiet ipsos	Ox31
custodes, qui nunc lasciuae furta puellae	Ox32
hac mercede silent? crimen commune tacetur.	Ox33
prospicit hoc prudens et a illis incipit uxor.	Ox34
sunt quas eunuchi inbelles ac mollia semper	366
oscula delectent et desperatio barbae	
et quod abortiuo non est opus. illa uoluptas	
summa tamen, quom iam calida matura iuuenta	
inguina traduntur medicis, iam pectine nigro.	370
ergo expectatos ac iussos crescere primum	
testiculos, postquam coeperunt esse bilibres,	
tonsoris tantum damno rapit Heliodorus.	
mangonum pueros uera ac miserabilis urit	373a
debilitas, follisque pudet cicerisque relict.	373b
conspiciuus longe cunctisque notabilis intrat	
balnea nec dubie custodem uitis et horti	
prouocat a domina factus spado. dormiat ille	
cum domina, sed tu iam durum, Postume, iamque	
tondendum eunucho Bromium committere noli.	
si gaudet cantu, nullius fibula durat	
uocem uendentis praetoribus. organa semper	380
in manibus, densi radiant testudine tota	
sardonyches, crispo numerantur pectine chordae	
quo tener Hedymeles operas dedit: hunc tenet, hoc se	
solatur gratoque indulget basia plectro.	
quaedam de numero Lamiarum ac nominis Appi	385
et farre et uino Ianum Vestamque rogabat,	
an Capitolinam deberet Pollio quercum	
sperare et fidibus promittere. quid faceret plus	
aegrotante uiro, medicis quid tristibus erga	
filiolum? stetit ante aram nec turpe putauit	390
pro cithara uelare caput dictataque uerba	
pertulit, ut mos est, et aperta palluit agna.	
dic mihi nunc, quaeso, dic, antiquissime diuom,	
respondes his, Iane pater? magna otia caeli;	
non est, quod uideo, non est quod agatur apud uos.	395
haec de comoedis te consulit, illa tragoedum	
commendare uolet: uaricosus fiet haruspex.	
sed cantet potius quam totam peruolet urbem	
audax et coetus possit quae ferre uirorum	
cumque paludatis ducibus praesente marito	400

ipsa loqui recta facie siccisque mamillis.  
 haec eadem nouit quid toto fiat in orbe,  
 quid Seres, quid Thraces agant, secreta nouercae  
 et pueri, quis amet, quis diripiatur adulter;  
 dicet quis uiduam praegnatem fecerit et quo 405  
 mense, quibus uerbis concumbat quaeque, modis quot.  
 instantem regi Armenio Parthoque cometen  
 prima uidet, famam rumoresque illa recentis  
 excipit ad portas, quosdam facit; isse Niphaten  
 in populos magnoque illic cuncta arua teneri 410  
 diluuiio, nutare urbes, subsidere terras,  
 quocumque in triuio, cuicumque est obuia, narrat.  
 nec tamen id uitium magis intolerabile quam quod  
 uicinos humiles rapere et concidere loris  
 ~exortata~ solet. nam si latratibus alti 415  
 rumpuntur somni, 'fustes huc ocius' inquit  
 'adferte' atque illis dominum iubet ante feriri,  
 deinde canem. grauis occursu, taeterrima uultu  
 balnea nocte subit, conchas et castra moueri  
 nocte iubet, magno gaudet sudare tumultu, 420  
 cum lassata graui ceciderunt bracchia massa,  
 callidus et cristae digitos inpressit aliptes  
 ac summum dominae femur exclamare coegit.  
 conuiuiae miseri interea somnoque fameque  
 urgentur. tandem illa uenit rubicundula, totum 425  
 oenophorum sitiens, plena quod tenditur urna  
 admotum pedibus, de quo sextarius alter  
 ducitur ante cibum rabidam facturus orexim,  
 dum redit et loto terram ferit intestino.  
 marmoribus riui properant, aurata Falernum 430  
 peluis olet; nam sic, tamquam alta in dolia longus  
 deciderit serpens, bibit et uomit. ergo maritus  
 nauseat atque oculis bilem substringit opertis.  
 illa tamen grauior, quae cum discumbere coepit  
 laudat Vergilium, periturae ignoscit Elissae, 435  
 committit uates et comparat, inde Maronem  
 atque alia parte in trutina suspendit Homerum.  
 cedunt grammatici, uincuntur rhetores, omnis  
 turba tacet, nec causicus nec praeco loquetur,  
 altera nec mulier. uerborum tanta cadit uis, 440  
 tot pariter pelues ac tintinnabula dicas  
 pulsari. iam nemo tubas, nemo aera fatiget:  
 una laboranti poterit succurrere Lunae.  
 inponit finem sapiens et rebus honestis;  
 nam quae docta nimis cupit et facunda uideri 445  
 crure tenuis medio tunicas succingere debet,  
 caedere Siluano porcum, quadrante lauari.  
 non habeat matrona, tibi quae iuncta recumbit,  
 dicendi genus, aut curuum sermone rotato

torqueat enthymema, nec historias sciat omnes, 450  
sed quaedam ex libris et non intellegat. odi  
hanc ego quae repetit uoluitque Palaemonis artem  
seruata semper lege et ratione loquendi  
ignotosque mihi tenet antiquaria uersus  
nec curanda uiris. opicae castiget amicae 455  
uerba: soloecismum liceat fecisse marito.

nil non permittit mulier sibi, turpe putat nil,  
cum uiridis gemmas collo circumdedit et cum  
auribus extentis magnos commisit elenchos.  
[intolerabilius nihil est quam femina diues.] 460  
interea foeda aspectu ridendaque multo  
pane tumet facies aut pinguia Poppaeanae  
spirat et hinc miseri uiscantur labra mariti.  
ad moechum lota ueniunt cute. quando uideri  
uult formonsa domi? moechis foliata parantur, 465  
his emitur quidquid graciles huc mittitis Indi.  
tandem aperit uultum et tectoria prima reponit,  
incipit agnosci, atque illo lacte fouetur  
propter quod secum comites educit asellas  
exul Hyperboreum si dimittatur ad axem. 470  
sed quae mutatis inducitur atque fouetur  
tot medicaminibus coctaeque siliginis offas  
accipit et madidae, facies dicetur an ulcus?

est pretium curae penitus cognoscere toto  
quid faciant agitentque die. si nocte maritus 475  
auersus iacuit, periit libraria, ponunt  
cosmetae tunicas, tarde uenisse Liburnus  
dicitur et poenas alieni pendere somni  
cogitur, hic frangit ferulas, rubet ille flagello,  
hic scutica; sunt quae tortoribus annua praestent. 480  
uerberat atque obiter faciem linit, audit amicas  
aut latum pictae uestis considerat aurum  
et caedit, longi relegit transuersa diurni  
et caedit, donec lassus caedentibus 'exi'  
intonet horrendum iam cognitione peracta. 485  
praefectura domus Siculo non mitior aula.  
nam si constituit solitoque decentius optat  
ornari et properat iamque expectatur in hortis  
aut apud Isiacae potius sacraria lenae,  
disponit crinem laceratis ipsa capillis 490  
nuda umeros Pseca infelix nudisque mamillis.  
'altior hic quare cincinnus?' aurea punit  
continuo flexi crimen facinusque capilli.  
quid Pseca admisit? quaenam est hic culpa puellae,  
si tibi displicuit nasus tuus? altera laeuum 495  
extendit pectusque comas et uoluit in orbem.  
est in consilio materna admotaque lanis  
emerita quae cessat acu; sententia prima

huius erit, post hanc aetate atque arte minores  
 censebunt, tamquam famae discrimen agatur 500  
 aut animae: tanta est quaerendi cura decoris.  
 tot premit ordinibus, tot adhuc conpagibus altum  
 aedificat caput: Andromachen a fronte uidebis,  
 post minor est, credas aliam. cedo si breue parui  
 sortita est lateris spatium breuiorque uidetur 505  
 uirgine Pygmaea nullis adiuta coturnis  
 et leuis erecta consurgit ad oscula planta.  
 nulla uiri cura interea nec mentio fiet  
 damnorum. uiuit tamquam uicina mariti,  
 hoc solo propior, quod amicos coniugis odit 510  
 et seruos, grauis est rationibus. ecce furentis  
 Bellonae matrisque deum chorus intrat et ingens  
 semiuir, obsceno facies reuerenda minori,  
 mollia qui rapta secuit genitalia testa  
 iam pridem, cui rauca cohors, cui tympana cedunt 515  
 plebeia et Phrygia uestitur bucca tiara.  
 grande sonat metuique iubet Septembris et austri  
 aduentum, nisi se centum lustrauerit ouis  
 et xerampelinas ueteres donauerit ipsi,  
 ut quidquid subiti et magni discriminis instat 520  
 in tunicas eat et totum semel expiet annum.  
 hibernum fracta glacie descendet in amnem,  
 ter matutino Tiberi mergetur et ipsis  
 uerticibus timidum caput abluet, inde superbi  
 totum regis agrum nuda ac tremibunda cruentis 525  
 erepet genibus; si candida iusserit Io,  
 ibit ad Aegypti finem calidaque petitas  
 a Meroe portabit aquas, ut spargat in aede  
 Isidis, antiquo quae proxima surgit ouili.  
 credit enim ipsius dominae se uoce moneri. 530  
 en animam et mentem cum qua di nocte loquantur!  
 ergo hic praecipuum summumque meretur honorem  
 qui grege linigero circumdatus et grege caluo  
 plangentis populi currit derisor Anubis.  
 ille petit ueniam, quotiens non abstinet uxor 535  
 concubitu sacris obseruandisque diebus  
 magnaue debetur uiolato poena cadurco  
 et mouisse caput uisa est argentea serpens;  
 illius lacrimae meditataque murmura praestant  
 ut ueniam culpae non abnuat ansere magno 540  
 scilicet et tenui popano corruptus Osiris.  
 cum dedit ille locum, cophino fenoque relicto  
 arcanam Iudaea tremens mendicat in aurem,  
 interpres legum Solymarum et magna sacerdos  
 arboris ac summi fida internuntia caeli. 545  
 implet et illa manum, sed parcus; aere minuto  
 qualiacumque uoles Iudaei somnia uendunt.

spondet amatorem tenerum uel diuitis orbi  
 testamentum ingens calidae pulmone columbae  
 tractato Armenius uel Commagenus haruspex; 550  
 pectora pullorum rimabitur, exta catelli  
 interdum et pueri; faciet quod deferat ipse.  
 Chaldaeis sed maior erit fiducia: quidquid  
 dixerit astrologus, credent a fonte relatum  
 Hammonis, quoniam Delphis oracula cessant 555  
 et genus humanum damnat caligo futuri.  
 praecipuus tamen est horum, qui saepius exul,  
 cuius amicitia conducendaque tabella  
 magnus ciuis obit et formidatus Othoni.  
 inde fides artis, sonuit si dextera ferro 560  
 laeuaque, si longe castrorum in carcere mansit.  
 nemo mathematicus genium indemnatus habebit,  
 sed qui paene perit, cui uix in Cyclada mitti  
 contigit et parua tandem caruisse Seripho.  
 consulit ictericae lento de funere matris, 565  
 ante tamen de te Tanaquil tua, quando sororem  
 efferat et patruos, an sit uicturus adulter  
 post ipsam; quid enim maius dare numina possunt?  
 haec tamen ignorat quid sidus triste minetur  
 Saturni, quo laeta Venus se proferat astro, 570  
 quis mensis damnis, quae dentur tempora lucro:  
 illius occursum etiam uitare memento,  
 in cuius manibus ceu pingua sucina tritas  
 cernis ephemeridas, quae nullum consulit et iam  
 consulitur, quae castra uiro patriamque petente 575  
 non ibit pariter numeris reuocata Thrasylli.  
 ad primum lapidem uectari cum placet, hora  
 sumitur ex libro; si prurit frictus ocelli  
 angulus, inspecta genesi collyria poscit;  
 aegra licet iaceat, capiendo nulla uidetur 580  
 aptior hora cibo nisi quam dederit Petosiris.  
 si mediocris erit, spatium lustrabit utrimque  
 metarum et sortes ducet frontemque manumque  
 praebabit uati crebrum poppysma roganti.  
 diuitibus responsa dabit Phryx augur et inde 585  
 conductus, dabit astrorum mundique peritus  
 atque aliquis senior qui publica fulgura condit.  
 plebeium in circo positum est et in aggere fatum.  
 quae nudis longum ostendit ceruicibus aurum  
 consulit ante falas delphinorumque columnas 590  
 an saga uendenti nubat caupone relicto.  
 hae tamen et partus subeunt discrimen et omnis  
 nutricis tolerant fortuna urgente labores,  
 sed iacet aurato uix ulla puerpera lecto.  
 tantum artes huius, tantum medicamina possunt, 595  
 quae steriles facit atque homines in uentre necandos

concludit. gaude, infelix, atque ipse bibendum  
 porrige quidquid erit; nam si distendere uellet  
 et uexare uterum pueris salientibus, esses  
 Aethiopsis fortasse pater, mox decolor heres 600  
 impleret tabulas numquam tibi mane uidendus.  
 transeo suppositos et gaudia uotaque saepe  
 ad spurcos decepta lacus, saepe inde petitos  
 pontifices, salios Scaurorum nomina falso  
 corpore laturos. stat Fortuna inproba noctu 605  
 adridens nudis infantibus: hos fouet omni  
 inuoluitque sinu, domibus tunc porrigit altis  
 secretumque sibi mimum parat; hos amat, his se  
 ingerit utque suos semper producit alumnos.  
 hic magicos adfert cantus, hic Thessala uendit 610  
 philtra, quibus ualeat mentem uexare mariti  
 et solea pulsare natis. quod desipis, inde est,  
 inde animi caligo et magna obliuio rerum  
 quas modo gessisti. tamen hoc tolerabile, si non  
 [semper aquam portes rimosa ad dolia, semper 614a  
 istud onus subeas ipsis manantibus urnis, 614b  
 quo rabidus nostro Phalarim de rege dedisti.] 614c  
 et furere incipias ut auunculus ille Neronis,  
 cui totam tremuli frontem Caesonia pulli  
 infudit. quae non faciet quod principis uxor?  
 ardebant cuncta et fracta conpage ruebant  
 non aliter quam si fecisset Iuno maritum  
 insanum. minus ergo nocens erit Agrippinae 620  
 boletus, siquidem unius praecordia pressit  
 ille senis tremulumque caput descendere iussit  
 in caelum et longa manantia labra saliuia:  
 haec poscit ferrum atque ignes, haec potio torquet,  
 haec lacerat mixtos equitum cum sanguine patres. 625  
 tanti partus equae, tanti una uenefica constat.  
 oderunt natos de paelice; nemo repugnet,  
 nemo uetet, iam iam priuignum occidere fas est.  
 uos ego, pupilli, moneo, quibus amplior est res,  
 custodite animas et nulli credite mensae: 630  
 liuida materno feruent adipata ueneno.  
 mordeat ante aliquis quidquid porrexerit illa  
 quae peperit, timidus praegustet pocula papas.  
 fingimus haec altum satura sumente coturnum  
 scilicet, et finem egressi legemque priorum 635  
 grande Sophocleo carmen bacchamur hiatu,  
 montibus ignotum Rutulis caeloque Latino?  
 nos utinam uani. sed clamat Pontia 'feci,  
 confiteor, puerisque meis aconita parauit,  
 quae deprensa patent; facinus tamen ipsa peregi.' 640  
 tune duos una, saeuissima uipera, cena?  
 tune duos? 'septem, si septem forte fuissent.'

credamus tragicis quidquid de Colchide torua  
dicitur et Procne; nil contra conor. et illae  
grandia monstra suis audebant temporibus, sed 645  
non propter nummos. minor admiratio summis  
debetur monstis, quotiens facit ira nocentes  
hunc sexum et rabie iecur incendente feruntur  
praecipites, ut saxa iugis abrupta, quibus mons  
subtrahitur cliuoque latus pendente recedit. 650  
illam ego non tulerim quae computat et scelus ingens  
sana facit. spectant subeuntem fata mariti  
Alcestim et, similis si permutatio detur,  
morte uiri cupiant animam seruare catellae.  
occurrent multae tibi Belides atque Eriphylae 655  
mane, Clytemestram nullus non uicus habebit.  
hoc tantum refert, quod Tyndaris illa bipennem  
insulsam et fatuam dextra laeuaque tenebat;  
at nunc res agitur tenui pulmone rubetae,  
sed tamen et ferro, si praegustarit Atrides 660  
Pontica ter uicti cautus medicamina regis.

## Satura VII

Et spes et ratio studiorum in Caesare tantum;  
solus enim tristes hac tempestate Camenas  
respexit, cum iam celebres notique poetae  
balneolum Gabiis, Romae conducere furnos  
temptarent, nec foedum alii nec turpe putarent 5  
praecones fieri, cum desertis Aganippes  
uallibus esuriens migraret in atria Clio.  
nam si Pieria quadrans tibi nullus in umbra  
ostendatur, ames nomen uictumque Machaerae  
et uendas potius commissa quod auctio uendit 10  
stantibus, oenophorum, tripedes, armaria, cistas,  
Alcithoen Pacci, Thebas et Terea Fausti.  
hoc satius quam si dicas sub iudice 'uidi'  
quod non uidisti; faciant equites Asiani,  
[quamquam et Cappadoce faciant equitesque Bithyni] 15  
altera quos nudo traducit gallica talo.  
nemo tamen studiis indignum ferre laborem  
cogetur posthac, nectit quicumque canoris  
eloquium uocale modis laurumque momordit.  
hoc agite, o iuuenes. circumspicit et stimulat uos 20  
materiamque sibi ducis indulgentia quaerit.  
si qua aliunde putas rerum expectanda tuarum  
praesidia atque ideo croceae membrana tabellae  
impletur, lignorum aliquid posce ocius et quae  
componis dona Veneris, Telesine, marito, 25  
aut clude et positos tinea pertunde libellos.  
frange miser calamum uigilataque proelia dele,  
qui facis in parua sublimia carmina cella,  
ut dignus uenias hederis et imagine macra.  
spes nulla ulterior; didicit iam diues auarus 30  
tantum admirari, tantum laudare disertos,  
ut pueri Iunonis auem. sed defluit aetas  
et pelagi patiens et cassidis atque ligonis.  
taedia tunc subeunt animos, tunc seque suamque  
Terpsichoren odit facunda et nuda senectus. 35  
accipe nunc artes. ne quid tibi conferat iste,  
quem colis et Musarum et Apollinis aede relicta,  
ipse facit uersus atque uni cedit Homero  
propter mille annos, et si dulcedine famae  
succensus recites, maculosas commodat aedes. 40  
haec longe ferrata domus seruire iubetur  
in qua sollicitas imitatur ianua portas.  
scit dare libertos extrema in parte sedentis  
ordinis et magnas comitum disponere uoces;



nemo dabit regum quanti subsellia constant 45  
 et quae conducto pendent anabathra tigillo  
 quaeque reportandis posita est orchestra cathedris.  
 nos tamen hoc agimus tenuique in puluere sulcos  
 ducimus et litus sterili uersamus aratro.  
 nam si discedas, laqueo tenet ambitiosi 50  
 [consuetudo mali, tenet insanabile multos]  
 scribendi cacoethes et aegro in corde senescit.  
 sed uatem egregium, cui non sit publica uena,  
 qui nihil eitum soleat deducere, nec qui  
 communi feriat carmen triuiale moneta, 55  
 hunc, qualem nequeo monstrare et sentio tantum,  
 anxietate carens animus facit, omnis acerbi  
 inpatiens, cupidus siluarum aptusque bibendis  
 fontibus Aonidum. neque enim cantare sub antro  
 Pierio thyrsumque potest contingere maesta 60  
 paupertas atque aeris inops, quo nocte dieque  
 corpus eget: satur est cum dicit Horatius 'euhoe.'  
 quis locus ingenio, nisi cum se carmine solo  
 uexant et dominis Cirrhae Nysaeque feruntur  
 pectora uestra duas non admittentia curas? 65  
 magnae mentis opus nec de Iodice paranda  
 attonitae currus et equos faciesque deorum  
 aspicere et qualis Rutulum confundat Erinys.  
 nam si Vergilio puer et tolerabile desset  
 hospitium, caderent omnes a crinibus hydri, 70  
 surda nihil gemeret graue bucina. poscimus ut sit  
 non minor antiquo Rubrenus Lappa coturno,  
 cuius et alueolos et laenam pignerat Atreus?  
 non habet infelix Numitor quod mittat amico,  
 Quintillae quod donet habet, nec defuit illi 75  
 unde emeret multa pascendum carne leonem  
 iam domitum; constat leuiori belua sumptu  
 nimirum et capiunt plus intestina poetae.  
 contentus fama iaceat Lucanus in hortis  
 marmoreis, at Serrano tenuique Saleiio 80  
 gloria quantalibet quid erit, si gloria tantum est?  
 curritur ad uocem iucundam et carmen amicae  
 Thebaidos, laetam cum fecit Statius urbem  
 promisitque diem: tanta dulcedine captos  
 adficit ille animos tantaque libidine uolgi 85  
 auditur. sed cum fregit subsellia uersu  
 esurit, intactam Paridi nisi uendit Agauen.  
 ille et militiae multis largitus honorem  
 semenstri uatum digitos circumligat auro.  
 quod non dant proceres, dabit histrio. tu Camerinos 90  
 et Baream, tu nobilium magna atria curas?  
 praefectos Pelopea facit, Philomela tribunos.  
 haut tamen inuideas uati quem pulpita pascunt.

quis tibi Maecenas, quis nunc erit aut Proculeius  
 aut Fabius, quis Cotta iterum, quis Lentulus alter? 95  
 tum par ingenio pretium, tunc utile multis  
 pallere et uinum toto nescire Decembri.  
 uester porro labor fecundior, historiarum  
 scriptores? perit hic plus temporis atque olei plus.  
 nullo quippe modo millensima pagina surgit 100  
 omnibus et crescit multa damnosa papyro;  
 sic ingens rerum numerus iubet atque operum lex.  
 quae tamen inde seges? terrae quis fructus apertae?  
 quis dabit historico quantum daret acta legenti?  
 ' ~~sed~~ genus ignauum, quod lecto gaudet et umbra.' 105  
 dic igitur quid causidicis ciuilia praestent  
 officia et magno comites in fasce libelli.  
 ipsi magna sonant, sed tum cum creditor audit  
 praecipue, uel si tetigit latus acrior illo  
 qui uenit ad dubium grandi cum codice nomen. 110  
 tunc inmensa caui spirant mendacia folles  
 conspuiturque sinus; ueram deprendere messem  
 si libet, hinc centum patrimonia causidicorum,  
 parte alia solum russati pone Lacertae.  
 consedere duces, surgis tu pallidus Ajax 115  
 dicturus dubia pro libertate bubulco  
 iudice. rumpe miser tensum iecur, ut tibi lasso  
 figantur uirides, scalarum gloria, palmae.  
 quod uocis pretium? siccus petasunculus et uas  
 pelamydum aut ueteres, Maurorum epimonia, bulbi 120  
 aut uinum Tiberi deuectum, quinque lagonae.  
 si quater egisti, si contigit aureus unus,  
 inde cadunt partes ex foedere pragmaticorum.  
 ' Amilio dabitur quantum licet, et melius nos  
 egimus.' huius enim stat currus aeneus, alti 125  
 quadriiuges in uestibulis, atque ipse feroci  
 bellatore sedens curuatum hastile minatur  
 eminus et statua meditatatur proelia lusca.  
 sic Pedito conturbat, Matho deficit, exitus hic est  
 Tongilii, magno cum rhinocerote lauari 130  
 qui solet et uexat lutulenta balnea turba  
 perque forum iuuenes longo premit assere Maedos  
 empturus pueros, argentum, murrina, uillas;  
 spondet enim Tyrio stlattaria purpura filo.  
 [et tamen est illis hoc utile. purpura uendit] 135  
 causidicum uendunt amethystina; conuenit illi  
 et strepitu et facie maioris uiuere census,  
 sed finem inpensae non seruat prodiga Roma.  
 fidimus eloquio? Ciceroni nemo ducentos  
 nunc dederit nummos, nisi fulserit anulus ingens. 140  
 respicit haec primum qui litigat, an tibi serui  
 octo, decem comites, an post te sella, togati

ante pedes. ideo conducta Paulus agebat  
sardonyche, atque ideo pluris quam Gallus agebat,  
quam Basilus. rara in tenui facundia panno. 145  
quando licet Basilo flentem producere matrem?  
quis bene dicentem Basilum ferat? accipiat te  
Gallia uel potius nutricula causicorum  
Africa, si placuit mercedem ponere linguae.  
    declamare doces? o ferrea pectora Vetti, 150  
cum perimit saeuos classis numerosa tyrannos.  
nam quaecumque sedens modo legerat, haec eadem stans  
perferet atque eadem cantabit uersibus isdem.  
occidit miseros crambe repetita magistris.  
quis color et quod sit causae genus atque ubi summa 155  
quaestio, quae ueniant diuersa parte sagittae,  
nosse uolunt omnes, mercedem soluere nemo.  
' mercedem appellas? quid enim scio?' culpa docentis  
scilicet arguitur, quod laeuae parte mamillae  
nil salit Arcadico iuueni, cuius mihi sexta 160  
quaque die miserum dirus caput Hannibal inplet,  
quidquid id est de quo deliberat, an petat urbem  
a Cannis, an post nimbos et fulmina cautus  
circumagat madidas a tempestate cohortes.  
quantum uis stipulare et protinus accipe: quid do 165  
ut totiens illum pater audiat?' haec alii sex  
uel plures uno conclamant ore sophistae  
et ueras agitant lites raptore relicto;  
fusa uenena silent, malus ingratusque maritus  
et quae iam ueteres sanant mortaria caecos. 170  
ergo sibi dabit ipse rudem, si nostra mouebunt  
consilia, et uitae diuersum iter ingredietur  
ad pugnam qui rhetorica descendit ab umbra,  
summula ne pereat qua uilis tessera uenit  
frumenti; quippe haec merces lautissima. tempta 175  
Chrysogonus quanti doceat uel Pollio quanti  
lautorum pueros, artem scindes Theodori.  
balnea sescentis et pluris porticus in qua  
gestetur dominus quotiens pluit. anne serenum  
expectet spargatque luto iumenta recenti? 180  
hic potius, namque hic munda nitet ungula mulae.  
parte alia longis Numidarum fulta columnis  
surgat et argentem rapiat cenatio solem.  
quanticumque domus, ueniet qui fercula docte  
conponit, ueniet qui pulmentaria condit. 185  
hos inter sumptus sestertia Quintiliano,  
ut multum, duo sufficient: res nulla minoris  
constabit patri quam filius. ' uel igitur tot  
Quintilianus habet saltus?' exempla nouorum  
fatorum transi. felix et pulcher et acer, 190  
felix et sapiens et nobilis et generosus

adpositam nigrae lunam subtexit alutae,  
 felix orator quoque maximus et iaculator  
 et, si perfrixit, cantat bene. distat enim quae  
 sidera te excipiant modo primos incipientem 195  
 edere uagitus et adhuc a matre rubentem.  
 si Fortuna uolet, fies de rhetore consul;  
 si uolet haec eadem, fiet de consule rhetor.  
 Ventidius quid enim? quid Tullius? anne aliud quam  
 sidus et occulti miranda potentia fati? 200  
 seruis regna dabunt, captiuis fata triumphum.  
 felix ille tamen coruo quoque rarior albo.  
 paenituit multos uanae sterilisque cathedrae,  
 sicut Tharsimachi probat exitus atque Secundi  
 Carrinatis; et hunc inopem uidistis, Athenae, 205  
 nil praeter gelidas ausae conferre cicutas.  
 di maiorum umbris tenuem et sine pondere terram  
 spirantisque crocos et in urna perpetuum uer,  
 qui praeceptorem sancti uoluere parentis  
 esse loco. metuens uirgae iam grandis Achilles 210  
 cantabat patriis in montibus et cui non tunc  
 eliceret risum citharoedi cauda magistri;  
 sed Rufum atque alios caedit sua quemque iuuentus,  
 Rufum, quem totiens Ciceronem Allobroga dixit.  
 quis gremio Celadi doctique Palaemonis adfert 215  
 quantum grammaticus meruit labor? et tamen ex hoc,  
 quodcumque est (minus est autem quam rhetoris aera),  
 discipuli custos praemordet acoenonoetus  
 et qui dispensat frangit sibi. cede, Palaemon,  
 et patere inde aliquid decrescere, non aliter quam 220  
 institor hibernae tegetis niueique cadurci,  
 dummodo non pereat mediae quod noctis ab hora  
 sedisti, qua nemo faber, qua nemo sederet  
 qui docet obliquo lanam deducere ferro,  
 dummodo non pereat totidem olfecisse lucernas 225  
 quot stabant pueri, cum totus decolor esset  
 Flaccus et haereret nigro fuligo Maroni.  
 rara tamen merces quae cognitione tribuni  
 non egeat. sed uos saeuas inponite leges,  
 ut praeceptori uerborum regula constet, 230  
 ut legat historias, auctores nouerit omnes  
 tamquam unguis digitosque suos, ut forte rogatus,  
 dum petit aut thermas aut Phoebi balnea, dicat  
 nutricem Anchisae, nomen patriamque nouercae  
 Anchemoli, dicat quot Acestes uixerit annis, 235  
 quot Siculi Phrygibus uini donauerit urnas.  
 exigit ut mores teneros ceu pollice ducat,  
 ut si quis cera uoltum facit; exigit ut sit  
 et pater ipsius coetus, ne turpia ludant,  
 ne faciant uicibus. non est leue tot puerorum 240

obseruare manus oculosque in fine trementis.  
' ~~he~~c' inquit ' ~~ra~~ sed cum se uerterit annus,  
accipe, uictori populus quod postulat, aurum.'

Satura VIII

Stemmata quid faciunt? quid prodest, Pontice, longo  
sanguine censer, pictos ostendere uultus  
maiorum et stantis in curribus Aemilianos  
et Curios iam dimidios umeroque minorem  
Coruinum et Galbam auriculis nasoque carentem, 5

[quis fructus generis tabula iactare capaci  
Coruinum, posthac multa contingere uirga  
fumosos equitum cum dictatore magistris,]  
si coram Lepidis male uiuitur? effigies quo  
tot bellatorum, si luditur alea pernox 10

ante Numantinos, si dormire incipis ortu  
luciferi, quo signa duces et castra mouebant?  
cur Allobrogicis et magna gaudeat ara  
natus in Herculeo Fabius lare, si cupidus, si  
uanus et Euganea quantumuis mollior agna, 15

si tenerum attritus Catinensi pumice lumbum  
squalentis traducit auos emptorque ueneni  
frangenda miseram funestat imagine gentem?  
tota licet ueteres exornent undique cerae  
atria, nobilitas sola est atque unica uirtus. 20

Paulus uel Cossus uel Drusus moribus esto,  
hos ante effigies maiorum pone tuorum,  
praecedant ipsas illi te consule uirgas.  
prima mihi debes animi bona. sanctus haberi  
iustitiaeque tenax factis dictisque mereris? 25

agnosco procerem; salue Gaetulice, seu tu  
Silanus: quocumque alto de sanguine rarus  
ciuis et egregius patriae contingis ouanti,  
exclamare libet populus quod clamat Osiri  
inuento. quis enim generosum dixerit hunc qui 30

indignus genere et praeclaro nomine tantum  
insignis? nanum cuiusdam Atlanta uocamus,  
Aethiopem Cycnum, prauam extortamque puellam  
Europen; canibus pigris scabieque uetusta  
leuibus et siccae lambentibus ora lucernae 35

nomen erit pardus, tigris, leo, si quid adhuc est  
quod fremat in terris uiolentius. ergo cauebis  
et metues ne tu sic Creticus aut Camerinus.

his ego quem monui? tecum mihi sermo, Rubelli  
Blande. tumes alto Drusorum stemmate, tamquam 40  
feceris ipse aliquid propter quod nobilis esses,  
ut te conciperet quae sanguine fulget Iuli,  
non quae uentoso conducta sub aggere textit.

' uos humis' inquis ' uolipars ultima nostri,  
quorum nemo queat patriam monstrare parentis, 45

ast ego Cecropides.' uiuas et originis huius  
 gaudia longa feras. tamen ima plebe Quiritem  
 facundum inuenies, solet hic defendere causas  
 nobilis indocti; ueniet de plebe togata  
 qui iuris nodos et legum aenigmata soluat; 50  
 hinc petit Euphraten iuuenis domitique Bataui  
 custodes aquilas armis industrius; at tu  
 nil nisi Cecropides truncoque simillimus Hermae.  
 nullo quippe alio uincis discrimine quam quod  
 illi marmoreum caput est, tua uiuit imago. 55  
 dic mihi, Teucrorum proles, animalia muta  
 quis generosa putet nisi fortia. nempe uolucrem  
 sic laudamus equum, facili cui plurima palma  
 feruet et exultat rauco uictoria circo;  
 nobilis hic, quocumque uenit de gramine, cuius 60  
 clara fuga ante alios et primus in aequore puluis.  
 sed uenale pecus Coryphaei posteritas et  
 Hirpini, si rara iugo uictoria sedit.  
 nil ibi maiorum respectus, gratia nulla  
 umbrarum; dominos pretiis mutare iubentur 65  
 exiguis, trito ducunt epiraedia collo  
 segnipedes dignique molam uersare nepotes.  
 ergo ut miremur te, non tua, priuum aliquid da  
 quod possim titulis incidere praeter honores  
 quos illis damus ac dedimus, quibus omnia debes. 70  
 haec satis ad iuuenem quem nobis fama superbum  
 tradit et inflatum plenumque Nerone propinquo;  
 rarus enim ferme sensus communis in illa  
 fortuna. sed te censeris laude tuorum,  
 Pontice, noluerim sic ut nihil ipse futurae 75  
 laudis agas. miserum est aliorum incumbere famaie,  
 ne conlapsa ruant subductis tecta columnis.  
 stratus humi palmes uiduas desiderat ulmos.  
 esto bonus miles, tutor bonus, arbiter idem  
 integer; ambiguae si quando citabere testis 80  
 incertaeque rei, Phalaris licet imperet ut sis  
 falsus et admoto dictet periuria tauro,  
 summum crede nefas animam praeferre pudori  
 et propter uitam uiuendi perdere causas.  
 dignus morte perit, cenet licet ostrea centum 85  
 Gaurana et Cosmi toto mergatur aeno.  
 expectata diu tandem prouincia cum te  
 rectorem accipiet, pone irae frena modumque,  
 pone et auaritiaie, miserere inopum sociorum:  
 ossa uides rerum uacuis exucta medullis. 90  
 respice quid moneant leges, quid curia mandet,  
 praemia quanta bonos maneant, quam fulmine iusto  
 et Capito et Tutor ruerint damnante senatu,  
 piratae Cilicum. sed quid damnatio confert?

praeconem, Chaerippe, tuis circumspice pannis, 95  
 cum Pansa eripiat quidquid tibi Natta reliquit,  
 iamque tace; furor est post omnia perdere naulum.  
 non idem gemitus olim neque uulnus erat par  
 damnorum sociis florentibus et modo uictis.  
 plena domus tunc omnis, et ingens stabat acruos 100  
 nummorum, Spartana chlamys, conchylia Coa,  
 et cum Parrhasii tabulis signisque Myronis  
 Phidiacum uiuebat ebur, nec non Polycliti  
 multus ubique labor, rarae sine Mentore mensae.  
 inde ~Dolabella atque hinc~ Antonius, inde 105  
 sacrilegus Verres referebant nauibus altis  
 occulta spolia et plures de pace triumphos.  
 nunc sociis iuga pauca boum, grex paruus equarum,  
 et pater armenti capto eripietur agello,  
 ipsi deinde Lares, si quod spectabile signum. 110  
 [si quis in aedícula deus unicus; haec etenim sunt  
 pro summis, nam sunt haec maxima. despicias tu]  
 forsitan inbellis Rhodios unctamque Corinthon  
 despicias merito: quid resinata iuuentus  
 cruraque totius facient tibi leuia gentis? 115  
 horrida uitanda est Hispania, Gallicus axis  
 Illyricumque latus; parce et messoribus illis  
 qui saturant urbem circo scenaeque uacantem;  
 quanta autem inde feres tam dirae praemia culpaе,  
 cum tenuis nuper Marius discinxerit Afros? 120  
 curandum in primis ne magna iniuria fiat  
 fortibus et miseris. tollas licet omne quod usquam est  
 auri atque argenti, scutum gladiumque relinques.  
 [et iaculum et galeam; spoliatis arma supersunt.]  
 quod modo proposui, non est sententia, uerum est; 125  
 credite me uobis folium recitare Sibyllae.  
 si tibi sancta cohors comitum, si nemo tribunal  
 uendit acersecomes, si nullum in coniuge crimen  
 nec per conuentus et cuncta per oppida curuis  
 unguibus ire parat nummos raptura Celaeno, 130  
 tum licet a Pico numeres genus, altaque si te  
 nomina delectant omnem Titanida pugnam  
 inter maiores ipsumque Promethea ponas.  
 [de quocumque uoles proauom tibi sumito libro.]  
 quod si praecipitem rapit ambitio atque libido, 135  
 si frangis uirgas sociorum in sanguine, si te  
 delectant hebetes lasso lictore secures,  
 incipit ipsorum contra te stare parentum  
 nobilitas claramque facem praeferre pudendis.  
 omne animi uitium tanto conspectius in se 140  
 crimen habet, quanto maior qui peccat habetur.  
 quo mihi te, solitum falsas signare tabellas,  
 in templis quae fecit auus statuamque parentis



ante triumphalem? quo, si nocturnus adulter  
tempora Santonico uelas adoperta cucullo? 145  
praeter maiorum cineres atque ossa uolucris  
carpento rapitur pinguis Lateranus, et ipse,  
ipse rotam adstringit sufflamine mulio consul,  
nocte quidem, sed Luna uidet, sed sidera testes  
intendunt oculos. finitum tempus honoris 150  
cum fuerit, clara Lateranus luce flagellum  
sumet et occursum numquam trepidabit amici  
iam senis ac uirga prior adnuet atque maniplos  
soluet et infundet iumentis hordea lassis.  
interea, dum lanatas robumque iuuentum 155  
more Numae caedit, Iouis ante altaria iurat  
solam Eponam et facies olida ad praesepia pictas.  
sed cum peruigiles placet instaurare popinas,  
obuius adsiduo Syrophoenix udus amomo  
currit, Idymaeae Syrophoenix incola portae 160  
hospitis adfectu dominum regemque salutat,  
et cum uenali Cyane succincta lagona.  
defensor culpae dicet mihi 'fecimus et nos  
haec iuuenes.' ~~eo~~, desisti nempe nec ultra  
fouisti errorem. breue sit quod turpiter audes, 165  
quaedam cum prima resecuntur crimina barba.  
indulge ueniam pueris: Lateranus ad illos  
thermarum calices inscriptaque linthea uadit  
maturus bello Armeniae Syriaeque tuendis  
amnibus et Rheno atque Histro. praestare Neronem 170  
securum ualet haec aetas. mitte Ostia, Caesar,  
mitte, sed in magna legatum quaere popina:  
inuenies aliquo cum percussore iacentem,  
permixtum nautis et furibus ac fugitiuis,  
inter carnifices et fabros sandapilarum 175  
et resupinati cessantia tympana galli.  
aequa ibi libertas, communia pocula, lectus  
non alius cuiquam, nec mensa remotior ulli.  
quid facias talem sortitus, Pontice, seruum?  
nempe in Lucanos aut Tusca ergastula mittas. 180  
at uos, Troiugenaee, uobis ignoscitis et quae  
turpia cerdoni Volesos Brutumque decebunt.  
quid si numquam adeo foedis adeoque pudendis  
utimur exemplis, ut non peiora supersint?  
consumptis opibus uocem, Damasippe, locasti 185  
sipario, clamosum ageres ut Phasma Catulli.  
Laureolum uelox etiam bene Lentulus egit,  
iudice me dignus uera cruce. nec tamen ipsi  
ignoscas populo; populi frons durior huius,  
qui sedet et spectat triscurria patriciorum, 190  
planipedes audit Fabios, ridere potest qui  
Mamerconum alapas. quanti sua funera uendant

quid refert? uendunt nullo cogente Nerone,  
nec dubitant celsi praetoris uendere ludis.  
finge tamen gladios inde atque hinc pulpita poni, 195  
quid satius? mortem sic quisquam exhorruit, ut sit  
zelotypus Thymeles, stupidi collega Corinthi?  
res haut mira tamen citharoedo principe mimus  
nobilis. haec ultra quid erit nisi ludus? et illic  
dedecus urbis habes, nec murmillonis in armis 200  
nec clipeo Gracchum pugnantem aut falce supina;  
damnat enim talis habitus [sed damnat et odit,  
nec galea faciem abscondit]: mouet ecce tridentem.  
postquam uibrata pendentia retia dextra  
nequiquam effudit, nudum ad spectacula uoltum 205  
erigit et tota fugit agnoscendus harena.  
credamus tunicae, de faucibus aurea cum se  
porrigat et longo iactetur spira galero.  
ergo ignominiam grauiorem pertulit omni  
uolnere cum Graccho iussus pugnare secutor. 210  
libera si dentur populo suffragia, quis tam  
perditus ut dubitet Senecam praeferre Neroni?  
cuius supplicio non debuit una parari  
simia nec serpens unus nec culleus unus.  
par Agamemnonidae crimen, sed causa facit rem 215  
dissimilem. quippe ille deis auctoribus ultor  
patris erat caesi media inter pocula, sed nec  
Electrae iugulo se polluit aut Spartani  
sanguine coniugii, nullis aconita propinquis  
miscuit, in scena numquam cantauit Orestes, 220  
Troica non scripsit. quid enim Verginius armis  
debit ulcisci magis aut cum Vindice Galba,  
quod Nero tam saeua crudaque tyrannide fecit?  
haec opera atque hae sunt generosi principis artes,  
gaudentis foedo peregrina ad pulpita cantu 225  
prostitui Graiaequae apium meruisse coronae.  
maiorum effigies habeant insignia uocis,  
ante pedes Domiti longum tu pone Thyestae  
syrma uel Antigones seu personam Melanippes,  
et de marmoreo citharam suspende colosso. 230  
quid, Catilina, tuis natalibus atque Cethegi  
inueniet quisquam sublimius? arma tamen uos  
nocturna et flammis domibus templisque paratis,  
ut braccatorum pueri Senonumque minores,  
ausi quod liceat tunica punire molesta. 235  
sed uigilat consul uexillaque uestra coercent.  
hic nouus Arpinas, ignobilis et modo Romae  
municipalis eques, galeatum ponit ubique  
praesidium attonitis et in omni monte laborat.  
tantum igitur muros intra toga contulit illi 240  
nominis ac tituli, quantum ~in~ Leucade, quantum

Thessaliae campis Octavius abstulit udo  
 caedibus adsiduis gladio; sed Roma parentem,  
 Roma patrem patriae Ciceronem libera dixit.  
 Arpinas alius Volscorum in monte solebat           245  
 poscere mercedes alieno lassus aratro;  
 nodosam post haec frangebatur uertice uitem,  
 si lentus pigra muniret castra dolabra.  
 hic tamen et Cimbros et summa pericula rerum  
 excipit et solus trepidantem protegit urbem,           250  
 atque ideo, postquam ad Cimbros stragemque uolabant  
 qui numquam attigerant maiora cadauera corui,  
 nobilis ornatur lauro collega secunda.  
 plebeiae Deciorum animae, plebeia fuerunt  
 nomina; pro totis legionibus hi tamen et pro           255  
 omnibus auxiliis atque omni pube Latina  
 sufficiunt dis infernis Terraeque parenti.  
 [pluris enim Decii quam quae seruantur ab illis.]  
 ancilla natus trabeam et diadema Quirini  
 et fascis meruit, regum ultimus ille bonorum.           260  
 prodita laxabant portarum claustra tyrannis  
 exulibus iuuenes ipsius consulis et quos  
 magnum aliquid dubia pro libertate deceret,  
 quod miraretur cum Coclite Mucius et quae  
 imperii finis Tiberinum uirgo natauit.           265  
 occulta ad patres produxit crimina seruus  
 matronis lugendus; at illos uerba iustis  
 adficiunt poenis et legum prima securis.  
     malo pater tibi sit Thersites, dummodo tu sis  
 Aeacidae similis Volcaniaque arma capessas,           270  
 quam te Thersitae similem producat Achilles.  
 et tamen, ut longe repetas longeque reuoluas  
 nomen, ab infami gentem deducis asylo;  
 maiorum primus, quisquis fuit ille, tuorum  
 aut pastor fuit aut illud quod dicere nolo.

Satura IX

Scire uelim quare totiens mihi, Naeuole, tristis  
occurras fronte obducta ceu Marsya uictus.  
quid tibi cum uultu, qualem depensus habebat  
Rauola dum Rhodopes uda terit inguina barba?  
[nos colaphum incutimus lambenti crustula seruo.] 5  
non erit hac facie miserabilior Crepereius  
Pollio, qui triplicem usuram praestare paratus  
circumit et fatuos non inuenit. unde repente  
tot rugae? certe modico contentus agebas  
uernam equitem, conuiuia ioco mordente facetus 10  
et salibus uehemens intra pomeria natis.  
omnia nunc contra, uultus grauis, horrida siccae  
silua comae, nullus tota nitor in cute, qualem  
Bruttia praestabat calidi tibi fascia uisci,  
sed fruticante pilo neglecta et squalida crura. 15  
quid macies aegri ueteris, quem tempore longo  
torret quarta dies olimque domestica febris?  
deprendas animi tormenta latentis in aegro  
corpore, deprendas et gaudia; sumit utrumque  
inde habitum facies. igitur flexisse uideris 20  
propositum et uitae contrarius ire priori.  
nuper enim, ut repeto, fanum Isidis et Ganymedem  
Pacis et aduectae secreta Palatia matris  
et Cererem (nam quo non prostat femina templo?)  
notior Aufidio moechus celebrare solebas, 25  
quodque taces, ipsos etiam inclinare maritos.  
' ule et hoc multis uitae genus, at mihi nullum  
inde operae pretium. pingues aliquando lacernas,  
munimenta togae, duri crassique coloris  
et male percussas textoris pectine Galli 30  
accipimus, tenue argentum uenaeque secundae.  
fata regunt homines, fatum est et partibus illis  
quas sinus abscondit. nam si tibi sidera cessant,  
nil faciet longi mensura incognita nerui,  
quamuis te nudum spumanti Virro labello 35  
uiderit et blandae adsidue densaeque tabellae  
sollicitent, autos gar ephelketai andra kinaidos.  
quod tamen ulterius monstrum quam mollis auarus?  
"haec tribui, deinde illa dedi, mox plura tulisti."  
computat et ceuet. ponatur calculus, adsint 40  
cum tabula pueri; numera sestertia quinque  
omnibus in rebus, numerentur deinde labores.  
an facile et pronum est agere intra uiscera penem  
legitimum atque illic hesternae occurrere cenae?

seruus erit minus ille miser qui foderit agrum 45  
 quam dominum. sed tu sane tenerum et puerum te  
 et pulchrum et dignum cyatho caeloque putabas.  
 uos humili adseculae, uos indulgebitis umquam  
 cultori, iam nec morbo donare parati?  
 en cui tu uiridem umbellam, cui sucina mittas 50  
 grandia, natalis quotiens redit aut madidum uer  
 incipit et strata positus longaue cathedra  
 munera femineis tractat secreta kalendis.  
 dic, passer, cui tot montis, tot praedia seruas  
 Apula, tot miluos intra tua pascua lassas? 55  
 te Trifolinus ager fecundis uitibus implet  
 suspectumque iugum Cumis et Gaurus inanis-  
 nam quis plura linit uicturo dolia musto?-  
 quantum erat exhausti lumbos donare clientis  
 iugeribus paucis! meliusne hic rusticus infans 60  
 cum matre et casulis et conlusore catello  
 cymbala pulsantis legatum fiet amici?  
 "improbus es cum poscis" ait. sed pensio clamat  
 "posce," sed appellat puer unicus ut Polyphemi  
 lata acies per quam sollers euasit Vlixes. 65  
 alter emendus erit, namque hic non sufficit, ambo  
 pascendi. quid agam bruma spirante? quid, oro,  
 quid dicam scapulis puerorum aquilone Decembri  
 et pedibus? "durate atque expectate cicadas"?  
 uerum, ut dissimules, ut mittas cetera, quanto 70  
 metiris pretio quod, ni tibi deditus essem  
 deuotusque cliens, uxor tua uirgo maneret?  
 scis certe quibus ista modis, quam saepe rogaris  
 et quae pollicitus. fugientem saepe puellam 75  
 amplexu rapui; tabulas quoque ruperat et iam  
 signabat; tota uix hoc ego nocte redemi  
 te plorante foris. testis mihi lectulus et tu,  
 ad quem peruenit lecti sonus et dominae uox.  
 instabile ac dirimi coeptum et iam paene solum  
 coniugium in multis domibus seruauit adulter. 80  
 quo te circumagas? quae prima aut ultima ponas?  
 nullum ergo meritum est, ingrata ac perfide, nullum  
 quod tibi filiulus uel filia nascitur ex me?  
 tollis enim et libris actorum spargere gaudes  
 argumenta uiri. foribus suspende coronas: 85  
 iam pater es, dedimus quod famae opponere possis.  
 iura parentis habes, propter me scriberis heres,  
 legatum omne capis nec non et dulce caducum.  
 commoda praeterea iungentur multa caducis,  
 si numerum, si tres impleuero.' iusta doloris, 90  
 Naeuole, causa tui; contra tamen ille quid adfert?  
 'eglegit atque alium bipedem sibi quaerit asellum.  
 haec soli commissa tibi celare memento

et tacitus nostras intra te fige querellas;  
 nam res mortifera est inimicus pumice leuis. 95  
 qui modo secretum commiserat, ardet et odit,  
 tamquam prodiderim quidquid scio. sumere ferrum,  
 fuste aperire caput, candelam adponere ualuis  
 non dubitat. nec contemnas aut despicias quod  
 his opibus numquam cara est annona ueneni. 100  
 ergo occulta teges ut curia Martis Athenis.'  
 o Corydon, Corydon, secretum diuitis ullum  
 esse putas? serui ut taceant, iumenta loquentur  
 et canis et postes et marmora. claude fenestras,  
 uela tegant rimas, iunge ostia, tollite lumen, 105  
 e medio fac eant omnes, prope nemo recumbat;  
 quod tamen ad cantum galli facit ille secundi  
 proximus ante diem caupo sciet, audiet et quae  
 finxerunt pariter libarius, archimagiri,  
 carptores. quod enim dubitant componere crimen 110  
 in dominos, quotiens rumoribus ulciscuntur  
 baltea? nec derit qui te per compita quaerat  
 nolentem et miseram uinosus inebriet aurem.  
 illos ergo roges quidquid paulo ante petebas  
 a nobis, taceant illi. sed prodere malunt 115  
 arcanum quam subrepti potare Falerni  
 pro populo faciens quantum Saufeia bibebat.  
 uiuendum recte, cum propter plurima, ~tunc est~  
 idcirco ut possis linguam contemnere serui.  
 [praecipue causis, ut linguas mancipiorum 120  
 contemnas; nam lingua mali pars pessima serui.  
 deterior tamen hic qui liber non erit illis  
 quorum animas et farre suo custodit et aere.]  
 ' uilè consilium modo, sed commune, dedisti.  
 nunc mihi quid suades post damnum temporis et spes 125  
 deceptas? festinat enim decurrere uelox  
 flosculus angustae miseraeque breuissima uitae  
 portio; dum bibimus, dum certa, unguenta, puellas  
 poscimus, obrepat non intellecta senectus.'  
 ne trepida, numquam pathicus tibi derit amicus 130  
 stantibus et saluis his collibus; undique ad illos  
 conuenient et carpentis et nauibus omnes  
 qui digito scalpunt uno caput. altera maior  
 spes superest, tu tantum erucis inprime dentem.  
 [gratus eris, tu tantum erucis inprime dentem.] 134a  
 ' haec exempla para felicibus; at mea Clotho  
 et Lachesis gaudent, si pascitur inguine uenter.  
 o parui nostrique Lares, quos ture minuto  
 aut farre et tenui soleo exorare corona,  
 quando ego figam aliquid quo sit mihi tuta senectus  
 a tegete et baculo? uiginti milia fenus 140  
 pigneribus positus, argenti uascula puri,

sed quae Fabricius censor notet, et duo fortes  
de grege Moesorum, qui me ceruice locata  
securum iubeant clamoso insistere circo;  
sit mihi praeterea curuus caelator, et alter 145  
qui multas facies pingit cito; sufficiunt haec.  
quando ego pauper ero? uotum miserabile, nec spes  
his saltem; nam cum pro me Fortuna uocatur,  
adfixit ceras illa de naue petitas  
quae Siculos cantus effugit remige surdo.'

## Satura X

Omnibus in terris, quae sunt a Gadibus usque  
Auroram et Gangen, pauci dinoscere possunt  
uera bona atque illis multum diuersa, remota  
erroris nebula. quid enim ratione timemus  
aut cupimus? quid tam dextro pede concipis ut te 5  
conatus non paeniteat uotique peracti?  
euertere domos totas optantibus ipsis  
di faciles. nocitura toga, nocitura petuntur  
militia; torrens dicendi copia multis  
et sua mortifera est facundia; uiribus ille 10  
confisus periit admirandisque lacertis;  
sed pluris nimia congesta pecunia cura  
strangulat et cuncta exuperans patrimonia census  
quanto delphinis ballaena Britannica maior.  
temporibus diris igitur iussuque Neronis 15  
Longinum et magnos Senecae praediuitis hortos  
clausit et egregias Lateranorum obsidet aedes  
tota cohors: rarus uenit in cenacula miles.  
pauca licet portes argenti uascula puri  
nocte iter ingressus, gladium contumque timebis 20  
et mota ad lunam trepidabis harundinis umbra:  
cantabit uacuum coram latrone uiator.  
prima fere uota et cunctis notissima templis  
diuitiae, crescant ut opes, ut maxima toto  
nostra sit arca foro. sed nulla aconita bibuntur 25  
fictilibus; tunc illa time cum pocula sumes  
gemmae et lato Setinum ardebit in auro.  
iamne igitur laudas quod de sapientibus alter  
ridebat, quotiens a limine mouerat unum  
protuleratque pedem, flebat contrarius auctor? 30  
sed facilis cuius rigidi censura cachinni:  
mirandum est unde ille oculis suffecerit umor.  
perpetuo risu pulmonem agitare solebat  
Democritus, quamquam non essent urbibus illis  
praetextae, trabeae, fasces, lectica, tribunal. 35  
quid si uidisset praetorem curribus altis  
extantem et medii sublimem puluere circi  
in tunica Iouis et pictae Sarrana ferentem  
ex umeris aulaea togae magnaеque coronae  
tantum orbem, quanto ceruix non sufficit ulla? 40  
quippe tenet sudans hanc publicus et, sibi consul  
ne placeat, curru seruus portatur eodem.  
da nunc et uolucrum, sceptro quae surgit eburno,  
illinc cornicines, hinc praecedentia longi



agminis officia et niueos ad frena Quirites, 45  
 defossa in loculos quos sportula fecit amicos.  
 tum quoque materiam risus inuenit ad omnis  
 occursus hominum, cuius prudentia monstrat  
 summos posse uiros et magna exempla daturos  
 ueruecum in patria crassoque sub aere nasci. 50  
 ridebat curas nec non et gaudia uolgi,  
 interdum et lacrimas, cum Fortunae ipse minaci  
 mandaret laqueum mediumque ostenderet unguem.  
 ergo superuacua aut quae perniciosa petuntur?  
 propter quae fas est genua incerare deorum? 55  
 quosdam praecipitat subiecta potentia magnae  
 inuidiae, mergit longa atque insignis honorum  
 pagina. descendunt statuae restemque secuntur,  
 ipsas deinde rotas bigarum inpacta securis  
 caedit et inmeritis franguntur crura caballis. 60  
 iam strident ignes, iam follibus atque caminis  
 ardet adoratum populo caput et crepat ingens  
 Seianus, deinde ex facie toto orbe secunda  
 fiunt urceoli, pelues, sartago, matellae.  
 pone domi laurus, duc in Capitolia magnum 65  
 cretatumque bouem: Seianus ducitur unco  
 spectandus, gaudent omnes. ' quae labra, quis illi  
 uultus erat! numquam, si quid mihi credis, amaui  
 hunc hominem. sed quo cecidit sub crimine? quisnam  
 delator quibus indicibus, quo teste probauit?' 70  
 ' nihil horum; uerbosa et grandis epistula uenit  
 a Capreis.' ' hehabet, nil plus interrogo.' sed quid  
 turba Remi? sequitur fortunam, ut semper, et odit  
 damnatos. idem populus, si Nortia Tusco  
 fauisset, si oppressa foret secunda senectus 75  
 principis, hac ipsa Seianum diceret hora  
 Augustum. iam pridem, ex quo suffragia nulli  
 uendimus, effudit curas; nam qui dabat olim  
 imperium, fascas, legiones, omnia, nunc se  
 continet atque duas tantum res anxius optat, 80  
 panem et circenses. ' perituros audio multos.'  
 ' nil dubium, magna est fornacula.' alfidulus mi  
 Bruttidius meus ad Martis fuit obuius aram;  
 quam timeo, uictus ne poenas exigat Ajax  
 ut male defensus. curramus praecipites et, 85  
 dum iacet in ripa, calcemus Caesaris hostem.  
 sed uideant serui, ne quis neget et pauidum in ius  
 ceruice obstricta dominum trahat.' hi sermones  
 tunc de Seiano, secreta haec murmura uolgi.  
 uisne salutari sicut Seianus, habere 90  
 tantundem atque illi summas donare curules,  
 illum exercitibus praeponere, tutor haberi  
 principis angusta Caprearum in rupe sedentis

cum grege Chaldaeo? uis certe pila, cohortis,  
 egregios equites et castra domestica; quidni 95  
 haec cupias? et qui nolunt occidere quemquam  
 posse uolunt. sed quae praeclara et prospera tanti,  
 ut rebus laetis par sit mensura malorum?  
 huius qui trahitur praetextam sumere mauis  
 an Fidenarum Gabiorumque esse potestas 100  
 et de mensura ius dicere, uasa minora  
 frangere pannosus uacuis aedilis Vlubris?  
 ergo quid optandum foret ignorasse fateris  
 Seianum; nam qui nimios optabat honores  
 et nimias poscebat opes, numerosa parabat 105  
 excelsae turris tabulata, unde altior esset  
 casus et impulsae praeceps inmane ruinae.  
 quid Crassos, quid Pompeios euertit et illum,  
 ad sua qui domitos deduxit flagra Quirites?  
 summus nempe locus nulla non arte petitus 110  
 magnaue numinibus uota exaudita malignis.  
 ad generum Cereris sine caede ac uulnere pauci  
 descendunt reges et sicca morte tyranni.  
 eloquium ac famam Demosthenis aut Ciceronis  
 incipit optare et totis quinquatribus optat 115  
 quisquis adhuc uno parcam colit asse Mineruam,  
 quem sequitur custos angustae uernula capsae.  
 eloquio sed uterque perit orator, utrumque  
 largus et exundans leto dedit ingenii fons.  
 ingenio manus est et ceruix caesa, nec umquam 120  
 sanguine caudidici maduerunt rostra pusilli.  
 ' o fortunatam natam me consule Romam.'  
 Antoni gladios potuit contemnere si sic  
 omnia dixisset. ridenda poemata malo  
 quam te, conspicuae diuina Philippica famae, 125  
 uolueris a prima quae proxima. saeuus et illum  
 exitus eripuit, quem mirabantur Athenae  
 torrentem et pleni moderantem frena theatri.  
 dis ille aduersis genitus fatoque sinistro,  
 quem pater ardentis massae fuligine lippus 130  
 a carbone et forcipibus gladiosque paranti  
 incude et luteo Volcano ad rhetora misit.  
 bellorum exuuiae, truncis adfixa tropaeis  
 lorica et fracta de casside buccula pendens  
 et curtum temone iugum uictaeque triremis 135  
 aplustre et summo tristis captiuos in arcu  
 humanis maiora bonis creduntur. ad hoc se  
 Romanus Graiusque et barbarus induperator  
 erexit, causas discriminis atque laboris  
 inde habuit: tanto maior famae sitis est quam 140  
 uirtutis. quis enim uirtutem amplectitur ipsam,  
 praemia si tollas? patriam tamen obruit olim

gloria paucorum et laudis titulique cupido  
 haesuri saxi cinerum custodibus, ad quae  
 discutienda ualent sterilis mala robora fici, 145  
 quandoquidem data sunt ipsis quoque fata sepulcris.  
 expende Hannibalem: quot libras in duce summo  
 inuenies? hic est quem non capit Africa Mauro  
 percussa oceano Niloque admota tepenti  
 rursus ad Aethiopum populos aliosque elephantos. 150  
 additur imperiis Hispania, Pyrenaeum  
 transilit. opposuit natura Alpemque niuemque:  
 diducit scopulos et montem rumpit aceto.  
 iam tenet Italiam, tamen ultra pergere tendit.  
 'acti' inquit nihil est, nisi Poeno milite portas 155  
 frangimus et media uexillum pono Subura.'  
 o qualis facies et quali digna tabella,  
 cum Gaetula ducem portaret belua luscum!  
 exitus ergo quis est? o gloria! uincitur idem  
 nempe et in exilium praiceps fugit atque ibi magnus 160  
 mirandusque cliens sedet ad praetoria regis,  
 donec Bithyno libeat uigilare tyranno.  
 finem animae, quae res humanas miscuit olim,  
 non gladii, non saxa dabunt nec tela, sed ille  
 Cannarum uindex et tanti sanguinis ultor 165  
 anulus. i, demens, et saeuas curre per Alpes  
 ut pueris placeas et declamatio fias.  
 unus Pellaeo iuueni non sufficit orbis,  
 aestuat infelix angusto limite mundi  
 ut Gyrae clausus scopulis paruaque Seripho; 170  
 cum tamen a figulis munitam intrauerit urbem,  
 sarcophago contentus erit. mors sola fatetur  
 quantula sint hominum corpuscula. creditur olim  
 uelificatus Athos et quidquid Graecia mendax  
 audet in historia, constratum classibus isdem 175  
 suppositumque rotis solidum mare; credimus altos  
 defecisse amnes epotaque flumina Medo  
 prandente et madidis cantat quae Sostratus alis.  
 ille tamen qualis rediit Salamine relictas,  
 in Corum atque Eurum solitus saeuire flagellis 180  
 barbarus Aeolio numquam hoc in carcere passos,  
 ipsum conpedibus qui uinxerat Ennosigaeum  
 (mitius id sane, quod non et stigmatum dignum  
 credidit. huic quisquam uellet seruire deorum?)-  
 sed qualis rediit? nempe una naue, cruentis 185  
 fluctibus ac tarda per densa cadauera prora.  
 has totiens optata exegit gloria poenas.  
 ' alspatium uitae, multos da, Iuppiter, annos.'  
 hoc recto uultu, solum hoc et pallidus optas.  
 sed quam continuus et quantis longa senectus 190  
 plena malis! deformem et taetrum ante omnia uultum

dissimilemque sui, deformem pro cute pellem  
pendentisque genas et talis aspice rugas  
quales, umbriferos ubi pandit Thabraca saltus,  
in uetula scalpit iam mater simia bucca. 195  
plurima sunt iuuenum discrimina, pulchrior ille  
hoc atque +ille+ alio, multum hic robustior illo:  
una senum facies, cum uoce trementia membra  
et iam leue caput madidique infantia nasi;  
frangendus misero gingiua panis inermi. 200  
usque adeo grauis uxori natisque sibique,  
ut captatori moueat fastidia Cosso.  
non eadem uini atque cibi torpente palato  
gaudia; nam coitus iam longa obliuio, uel si  
coneris, iacet exiguus cum ramice neruus 205  
et, quamuis tota palpetur nocte, iacebit.  
anne aliquid sperare potest haec inguinis aegri  
canities? quid quod merito suspecta libido est  
quae uenerem adfectat sine uiribus? aspice partis  
nunc damnum alterius. nam quae cantante uoluptas, 210  
sit licet eximius, citharoedo siue Seleuco  
et quibus aurata mos est fulgere lacerna?  
quid refert, magni sedeat qua parte theatri  
qui uix cornicines exaudiet atque tubarum  
concentus? clamore opus est ut sentiat auris 215  
quem dicat uenisse puer, quot nuntiet horas.  
praeterea minimus gelido iam in corpore sanguis  
febre calet sola, circumsilit agmine facto  
morborum omne genus, quorum si nomina quaeras,  
promptius expediam quot amauerit Oppia moechos, 220  
quot Themison aegros autumnno occiderit uno,  
quot Basilus socios, quot circumscripserit Hirrus  
pupillos, quot longa uiros exorbeat uno  
Maura die, quot discipulos inclinet Hamillus;  
percurram citius quot uillas possideat nunc 225  
quo tondente grauis iuueni mihi barba sonabat.  
ille umero, hic lumbis, hic coxa debilis; ambos  
perdidit ille oculos et luscis inuidet; huius  
pallida labra cibum accipiunt digitis alienis,  
ipse ad conspectum cenae diducere rictum 230  
suetus hiat tantum ceu pullus hirundinis, ad quem  
ore uolat pleno mater ieiuna. sed omni  
membrorum damno maior dementia, quae nec  
nomina seruorum nec uoltum agnoscit amici  
cum quo praeterita cenauit nocte, nec illos 235  
quos genuit, quos eduxit. nam codice saeuo  
heredes uetat esse suos, bona tota feruntur  
ad Phialen; tantum artificis ualet halitus oris,  
quod steterat multis in carcere fornicis annis.  
ut uigeant sensus animi, ducenda tamen sunt 240

funera natorum, rogos aspiciendus amatae  
 coniugis et fratris plenaque sororibus urnae.  
 haec data poena diu uiuentibus, ut renouata  
 semper clade domus multis in luctibus inque  
 perpetuo maerore et nigra ueste senescant. 245  
 rex Pylus, magno si quicquam credis Homero,  
 exemplum uitae fuit a cornice secundae.  
 felix nimirum, qui tot per saecula mortem  
 distulit atque suos iam dextra computat annos,  
 quique nouum totiens mustum bibit. oro parumper 250  
 attendas quantum de legibus ipse queratur  
 fatorum et nimio de stamine, cum uidet acris  
 Antilochi barbam ardentem, cum quaerit ab omni,  
 quisquis adest, socio cur haec in tempora duret,  
 quod facinus dignum tam longo admiserit aeuo. 255  
 haec eadem Peleus, raptum cum luget Achillem,  
 atque alius, cui fas Ithacum lugere natantem.  
 incolumi Troia Priamus uenisset ad umbras  
 Assaraci magnis sollemnibus Hectore funus  
 portante ac reliquis fratrum ceruicibus inter 260  
 Iliadum lacrimas, ut primos edere planctus  
 Cassandra inciperet scissaque Polyxena palla,  
 si foret extinctus diuerso tempore, quo non  
 coeperat audaces Paris aedificare carinas.  
 longa dies igitur quid contulit? omnia uidit 265  
 euersa et flammis Asiam ferroque cadentem.  
 tunc miles tremulus posita tulit arma tiara  
 et ruit ante aram summi Iouis ut uetulus bos,  
 qui domini cultris tenue et miserabile collum  
 praebet ab ingrato iam fastiditus aratro. 270  
 exitus ille utcumque hominis, sed torua canino  
 latrauit rictu quae post hunc uixerat uxor.  
 festino ad nostros et regem transeo Ponti  
 et Croesum, quem uox iusti facunda Solonis  
 respicere ad longae iussit spatia ultima uitae. 275  
 exilium et carcer Minturnarumque paludes  
 et mendicatus uicta Carthagine panis  
 hinc causas habuere; quid illo ciue tulisset  
 natura in terris, quid Roma beatius umquam,  
 si circumducto captiuorum agmine et omni 280  
 bellorum pompa animam exhalasset opimam,  
 cum de Teutonico uellet descendere curru?  
 prouida Pompeio dederat Campania febres  
 optandas, sed multae urbes et publica uota  
 uicerunt; igitur Fortuna ipsius et urbis 285  
 seruatum uicto caput abstulit. hoc cruciatu  
 Lentulus, hac poena caruit ceciditque Cethegus  
 integer et iacuit Catilina cadauere toto.  
 formam optat modico pueris, maiore puellis

murmure, cum Veneris fanum uidet, anxia mater 290  
 usque ad delicias uotorum. 'cur tamen' inquit  
 'corripas? pulchra gaudet Latona Diana.'  
 sed uetat optari faciem Lucretia qualem  
 ipsa habuit, cuperet Rutilae Verginia gibbum  
 accipere +atque suum+ Rutilae dare. filius autem 295  
 corporis egregii miseros trepidosque parentes  
 semper habet: rara est adeo concordia formae  
 atque pudicitiae. sanctos licet horrida mores  
 tradiderit domus ac ueteres imitata Sabinos,  
 praeterea castum ingenium uoltumque modesto 300  
 sanguine feruentem tribuat natura benigna  
 larga manu (quid enim puero conferre potest plus  
 custode et cura natura potentior omni?),  
 non licet esse uiro; nam prodiga corruptoris  
 improbitas ipsos audet temptare parentes: 305  
 tanta in muneribus fiducia. nullus ephebum  
 deformem saeua castrauit in arce tyrannus,  
 nec praetextatum rapuit Nero loripedem nec  
 strumosum atque utero pariter gibboque tumentem.  
 i nunc et iuuenis specie laetare tui, quem 310  
 maiora expectant discrimina. fiet adulter  
 publicus et poenas metuet quascumque mariti  
 +irati+ debet, nec erit felicior astro  
 Martis, ut in laqueos numquam incidat. exigit autem  
 interdum ille dolor plus quam lex ulla dolori 315  
 concessit: necat hic ferro, secat ille cruentis  
 uerberibus, quosdam moechos et mugilis intrat.  
 sed tuus Endymion dilectae fiet adulter  
 matronae. mox cum dederit Seruilia nummos  
 fiet et illius quam non amat, exuet omnem 320  
 corporis ornatum; quid enim ulla negauerit udis  
 inguinibus, siue est haec Oppia siue Catulla?  
 deterior totos habet illic femina mores.  
 'sed casto quid forma nocet?' quid profuit immo  
 Hippolyto graue propositum, quid Bellerophonti? 325  
 erubuit +nempe haec+ ceu fastidita repulso  
 nec Stheneboea minus quam Cressa excanduit, et se  
 concussere ambae. mulier saeuissima tunc est  
 cum stimulos odio pudor admouet. elige quidnam  
 suadendum esse putes cui nubere Caesaris uxor 330  
 destinat. optimus hic et formonsissimus idem  
 gentis patriciae rapitur miser extinguendus  
 Messalinae oculis; dudum sedet illa parato  
 flammeolo Tyriusque palam genialis in hortis  
 sternitur et ritu decies centena dabuntur 335  
 antiquo, ueniet cum signatoribus auspex.  
 haec tu secreta et paucis commissa putabas?  
 non nisi legitime uolt nubere. quid placeat dic.

ni parere uelis, pereundum erit ante lucernas;  
 si scelus admittas, dabitur mora paruula, dum res                   340  
 nota urbi et populo contingat principis aurem.  
 dedecus ille domus sciet ultimus. interea tu  
 obsequere imperio, si tanti uita dierum  
 paucorum. quidquid leuius meliusque putaris,  
 praebenda est gladio pulchra haec et candida ceruix.                   345

nil ergo optabunt homines? si consilium uis,  
 permittes ipsis expendere numinibus quid  
 conueniat nobis rebusque sit utile nostris;  
 nam pro iucundis aptissima quaeque dabunt di.  
 carior est illis homo quam sibi. nos animorum                   350  
 impulsu et caeca magnaue cupidine ducti  
 coniugium petimus partumque uxoris, at illis  
 notum qui pueri qualisque futura sit uxor.  
 ut tamen et poscas aliquid uoueasque sacellis  
 exta et candiduli diuina tomacula porci,                   355  
 orandum est ut sit mens sana in corpore sano.  
 fortem posce animum mortis terrore carentem,  
 qui spatium uitae extremum inter munera ponat  
 naturae, qui ferre queat quoscumque labores,  
 nesciat irasci, cupiat nihil et potiores                   360  
 Herculis aerumnas credat saeuosque labores  
 et uenere et cenis et pluma Sardanapalli.  
 monstro quod ipse tibi possis dare; semita certe  
 tranquillae per uirtutem patet unica uitae.  
 nullum numen habes, si sit prudentia: nos te,                   365  
 nos facimus, Fortuna, deam caeloque locamus.

## Satura XI

Atticus eximie si cenat, lautus habetur,  
si Rutilus, demens. quid enim maiore cachinno  
excipitur uolgi quam pauper Apicius? omnis  
conuictus, thermae, stationes, omne theatrum  
de Rutilo. nam dum ualida ac iuuenalia membra 5  
sufficiunt galeae dumque ardent sanguine, fertur  
non cogente quidem sed nec prohibente tribuno  
scripturus leges et regia uerba lanistae.  
multos porro uides, quos saepe elusus ad ipsum  
creditor introitum solet expectare macelli, 10  
et quibus in solo uiuendi causa palato est.  
egregius cenat meliusque miserrimus horum  
et cito casurus iam perlucente ruina.  
interea gustus elementa per omnia quaerunt  
numquam animo pretiis obstantibus; interius si 15  
attendas, magis illa iuuant quae pluris ementur.  
ergo haut difficile est perituram arcessere summam  
lancibus oppositis uel matris imagine fracta,  
et quadringentis nummis condire gulosum  
fictile; sic ueniunt ad miscellanea ludi. 20  
refert ergo quis haec eadem paret; in Rutilo nam  
luxuria est, in Ventidio laudabile nomen  
sumit et a censu famam trahit. illum ego iure  
despiciam, qui scit quanto sublimior Atlas  
omnibus in Libya sit montibus, hic tamen idem 25  
ignorat quantum ferrata distet ab arca  
sacculus. e caelo descendit gn̄yi seaut̄n  
figendum et memori tractandum pectore, siue  
coniugium quaeras uel sacri in parte senatus  
esse uelis; neque enim lorica poscit Achillis 30  
Thersites, in qua se traducebat Vlixes;  
ancipitem seu tu magno discrimine causam  
protegere adfectas, te consule, dic tibi qui sis,  
orator uehemens an Curtius et Matho buccae.  
noscenda est mensura sui spectandaque rebus 35  
in summis minimisque, etiam cum piscis emetur,  
ne mullum cupias, cum sit tibi gobio tantum  
in loculis. quis enim te deficiente crumina  
et crescente gula manet exitus, aere paterno  
ac rebus mersis in uentrem fenor̄is atque 40  
argenti graūis et pecorum agrorumque capacem?  
talibus a dominis post cuncta nouissimus exit  
anulus, et digito mendicat Pollio nudo.  
non praematuri cineres nec funus acerbum



luxuriae sed morte magis metuenda senectus. 45  
hi plerumque gradus: conducta pecunia Romae  
et coram dominis consumitur; inde, ubi paulum  
nescio quid superest et pallet fenoris auctor,  
qui uertere solum, Baias et ad ostrea currunt.  
cedere namque foro iam non est deterius quam 50  
Esquilias a feruenti migrare Subura.  
ille dolor solus patriam fugientibus, illa  
maestitia est, caruisse anno circensibus uno.  
sanguinis in facie non haeret gutta, morantur  
pauci ridiculum et fugientem ex urbe pudorem. 55  
    experiere hodie numquid pulcherrima dictu,  
Persice, non praestem uita et moribus et re,  
si laudem siliquas occultus ganeo, pultes  
coram aliis dictem puero sed in aure placentas.  
nam cum sis conuiuia mihi promissus, habebis 60  
Euandrum, uenies Tiryntius aut minor illo  
hospes, et ipse tamen contingens sanguine caelum,  
alter aquis, alter flammis ad sidera missus.  
fercula nunc audi nullis ornata macellis.  
de Tiburtino ueniet pinguissimus agro 65  
haedulus et toto grege mollior, inscius herbae  
necdum ausus uirgas humilis mordere salicti,  
qui plus lactis habet quam sanguinis, et montani  
asparagi, posito quos legit uilica fuso.  
grandia praeterea tortoque calentia feno 70  
oua adsunt ipsis cum matribus, et seruatae  
parte anni quales fuerant in uitibus uuae,  
Signinum Syriumque pirum, de corbibus isdem  
aemula Picenis et odoris mala recentis  
nec metuenda tibi, siccatum frigore postquam 75  
autumnnum et crudi posuere pericula suci.  
haec olim nostri iam luxuriosa senatus  
cena fuit. Curius paruo quae legerat horto  
ipse focus breuibus ponebat holuscula, quae nunc 80  
squalidus in magna fastidit conpede fossor,  
qui meminit calidae sapiat quid uolua popinae.  
sicci terga suis rara pendentia crate  
moris erat quondam festis seruare diebus  
et natalicium cognatis ponere lardum  
accedente noua, si quam dabat hostia, carne. 85  
cognatorum aliquis titulo ter consulis atque  
castrorum imperiis et dictatoris honore  
functus ad has epulas solito maturius ibat  
erectum domito referens a monte ligonem.  
cum tremarent autem Fabios durumque Catonem 90  
et Scauros et Fabricium, rigidique seueros  
censoris mores etiam collega timeret,  
nemo inter curas et seria duxit habendum

qualis in Oceani fluctu testudo nataret,  
 clarum Troiugenis factura et nobile fulcrum; 95  
 sed nudo latere et paruis frons aerea lectis  
 uile coronati caput ostendebat aselli,  
 ad quod lasciui ludebant ruris alumni.  
 [tales ergo cibi qualis domus atque supellex.]  
 tunc rudis et Graias mirari nescius artes 100  
 urbibus euersis praedarum in parte reperta  
 magnorum artificum frangebat pocula miles,  
 ut phaleris gauderet ecus caelataque cassis  
 Romuleae simulacra ferae mansuescere iussae  
 imperii fato, geminos sub rupe Quirinos 105  
 ac nudam effigiem in clipeo uenientis et hasta  
 pendentisque dei perituro ostenderet hosti.  
 ponebant igitur Tusco farrata catino:  
 argenti quod erat solis fulgebat in armis.  
 omnia tunc quibus inuideas, si liuidulus sis. 110  
 templorum quoque maiestas praesentior, et uox  
 nocte fere media mediamque audita per urbem  
 litore ab Oceani Gallis uenientibus et dis  
 officium uatis peragentibus. his monuit nos,  
 hanc rebus Latiis curam praestare solebat 115  
 fictilis et nullo uiolatus Iuppiter auro.  
 illa domi natas nostraque ex arbore mensas  
 tempora uiderunt; hos lignum stabat ad usus,  
 annosam si forte nucem deiecerat eurus.  
 at nunc diuitibus cenandi nulla uoluptas, 120  
 nil rhombus, nil damma sapit, putere uidentur  
 unguenta atque rosae, latos nisi sustinet orbis  
 grande ebur et magno sublimis pardus hiatu  
 dentibus ex illis quos mittit porta Syenes  
 et Mauri celeres et Mauro obscurior Indus, 125  
 et quos deposuit Nabataeo belua saltu  
 iam nimios capitique graues. hinc surgit orexis,  
 hinc stomacho uires; nam pes argenteus illis,  
 anulus in digito quod ferreus. ergo superbum  
 conuiuam caueo, qui me sibi comparat et res 130  
 despicit exiguas. adeo nulla uncia nobis  
 est eboris, nec tessellae nec calculus ex hac  
 materia, quin ipsa manubria cultellorum  
 ossea. non tamen his ulla umquam obsonia fiunt  
 rancidula aut ideo peior gallina secatur. 135  
 sed nec structor erit cui cedere debeat omnis  
 pergula, discipulus Trypheri doctoris, apud quem  
 sumine cum magno lepus atque aper et pygargus  
 et Scythicae uolucres et phoenicopterus ingens  
 et Gaetulus oryx hebeti lautissima ferro 140  
 caeditur et tota sonat ulmea cena Subura.  
 nec frustum capreae subducere nec latus Afrae

nouit auis noster, tirunculus ac rudis omni  
 tempore et exiguae furtis inbutus ofellae.  
 plebeios calices et paucis assibus emptos                   145  
 porriget incultus puer atque a frigore tutus,  
 non Phryx aut Lycius [non a mangone petitus  
 quisquam erit et magno]: cum posces, posce Latine.  
 idem habitus cunctis, tonsi rectique capilli  
 atque hodie tantum propter conuiuia pexi.                   150  
 pastoris duri hic filius, ille bubulci.  
 suspirat longo non uisam tempore matrem  
 et casulam et notos tristis desiderat haedos  
 ingenui uoltus puer ingenuique pudoris,  
 qualis esse decet quos ardens purpura uestit,                   155  
 nec pupillares defert in balnea raucus  
 testiculos, nec uellendas iam praebuit alas,  
 crassa nec opposito pavidus tegit inguina guto.  
 hic tibi uina dabit diffusa in montibus illis  
 a quibus ipse uenit, quorum sub uertice lusit.                   160  
 [namque una atque eadem est uini patria atque ministri.]  
 forsitan expectes ut Gaditana canoro  
 incipiant prurire choro plausuque probatae  
 ad terram tremulo descendant clune puellae,  
 [spectant hoc nuptae iuxta recubante marito                   165  
 quod pudeat narrare aliquem praesentibus ipsis.]  
 inritamentum ueneris languentis et acres  
 diuitis urticae [maior tamen ista uoluptas  
 alterius sexus]; magis ille extenditur, et mox  
 auribus atque oculis concepta urina mouetur.                   170  
 non capit has nugas humilis domus. audiat ille  
 testarum crepitus cum uerbis, nudum olido stans  
 fornice mancipium quibus abstinet, ille fruatur  
 uocibus obscenis omnique libidinis arte,  
 qui Lacedaemonium pytismate lubricat orbem;                   175  
 namque ibi fortunae ueniam damus. alea turpis,  
 turpe et adulterium mediocribus: haec eadem illi  
 omnia cum faciunt, hilares nitidique uocantur.  
 nostra dabunt alios hodie conuiuia ludos:  
 conditor Iliados cantabitur atque Maronis                   180  
 altisoni dubiam facientia carmina palmam.  
 quid refert, tales uersus qua uoce legantur?  
     sed nunc dilatis auerte negotia curis  
 et gratam requiem dona tibi, quando licebit  
 per totum cessare diem. non fenoris ulla                   185  
 mentio nec, prima si luce egressa reuerti  
 nocte solet, tacito bilem tibi contrahat uxor  
 umida suspectis referens multicia rugis  
 uexasque comas et uoltum auremque calentem.  
 protinus ante meum quidquid dolet exue limen,                   190  
 pone domum et seruos et quidquid frangitur illis

aut perit, ingratos ante omnia pone sodalis.  
interea Megalesiacaē spectacula mappae  
Idaeum sollemne colunt, similisque triumpho  
praeda caballorum praetor sedet ac, mihi pace 195  
immensae nimiaeque licet si dicere plebis,  
totam hodie Romam circus capit, et fragor aurem  
percutit, euentum uiridis quo colligo panni.  
nam si deficeret, maestam attonitamque uideres  
hanc urbem ueluti Cannarum in puluere uictis 200  
consulibus. spectent iuuenes, quos clamor et audax  
sponsio, quos cultae decet adsedisae puellae:  
nostra bibat uernum contracta cuticula solem  
effugiatque togam. iam nunc in balnea salua  
fronte licet uadas, quamquam solida hora supersit 205  
ad sextam. facere hoc non possis quinque diebus  
continuis, quia sunt talis quoque taedia uitae  
magna: uoluptates commendat rarior usus.

## Satura XII

Natali, Coruine, die mihi dulcior haec lux,  
qua festus promissa deis animalia caespes  
expectat. niueam reginae ducimus agnam,  
par uellus dabitur pugnanti Gorgone Maura;  
sed procul extensum petulans quatit hostia funem 5  
Tarpeio seruata Ioui frontemque coruscat,  
quippe ferox uitulus templis maturus et arae  
spargendusque mero, quem iam pudet ubera matris  
ducere, qui uexat nascenti robora cornu.  
si res ampla domi similisque adfectibus esset, 10  
pinguior Hispulla traheretur taurus et ipsa  
mole piger, nec finitima nutritus in herba,  
laeta sed ostendens Clitumni pascua sanguis  
et grandi ceruix iret ferienda ministro  
ob reditum trepidantis adhuc horrendaque passi 15  
nuper et incolumem sese mirantis amici.  
nam praeter pelagi casus et fulminis ictus  
euasit. densae caelum abscondere tenebrae  
nube una subitusque antemnas inpulit ignis,  
cum se quisque illo percussum crederet et mox 20  
attonitus nullum conferri posse putaret  
naufragium uelis ardentibus. omnia fiunt  
talia, tam grauiter, si quando poetica surgit  
tempestas. genus ecce aliud discriminis audi  
et miserere iterum, quamquam sint cetera sortis 25  
eiusdem pars dira quidem sed cognita multis  
et quam uotiua testantur fana tabella  
plurima: pictores quis nescit ab Iside pasci?  
accidit et nostro similis fortuna Catullo.  
cum plenus fluctu medius foret alueus et iam 30  
alternum puppis latus euertentibus undis  
arboris incertae, nullam prudentia cani  
reitoris cum ferret opem, decidere iactu  
coepit cum uentis, imitatus castora, qui se  
eunuchum ipse facit cupiens euadere damno 35  
testiculi: adeo medicatum intellegit inguen.  
'fundite quae mea sunt' ~~debat~~ 'cuncta' ~~Ca~~llus  
praecipitare uolens etiam pulcherrima, uestem  
purpuream teneris quoque Maecenatibus aptam,  
atque alias quarum generosi graminis ipsum 40  
infecit natura pecus, sed et egregius fons  
uiribus occultis et Baeticus adiuuat aer.  
ille nec argentum dubitabat mittere, lances  
Parthenio factas, urnae cratera capacem

et dignum sitiēte Pholo uel coniuge Fusci; 45  
 adde et bascaudas et mille escaria, multum  
 caelati, biberat quo callidus emptor Olynthi.  
 sed quis nunc alius, qua mundi parte quis audet  
 argento praeferre caput rebusque salutem?  
 [non propter uitam faciunt patrimonia quidam, 50  
 sed uitio caeci propter patrimonia uiuunt.]  
 iactatur rerum utilium pars maxima, sed nec  
 damna leuant. tunc aduersis urgentibus illuc  
 recedit ut malum ferro summitteret, ac se  
 explicat angustum: discriminis ultima, quando 55  
 praesidia adferimus nauem factura minorem.  
 i nunc et uentis animam committe dolato  
 confisus ligno, digitis a morte remotus  
 quattuor aut septem, si sit latissima, taedae;  
 mox cum reticulis et pane et uentre lagonae 60  
 accipe sumendas in tempestate secures.  
 sed postquam iacuit planum mare, tempora postquam  
 prospera uectoris fatumque ualentius euro  
 et pelago, postquam Parcae meliora benigna  
 pensa manu ducunt hilares et staminis albi 65  
 lanificae, modica nec multum fortior aura  
 uentus adest, inopi miserabilis arte cucurrit  
 uestibus extentis et, quod superauerat unum,  
 uelo prora suo. iam deficientibus austris  
 spes uitae cum sole redit. tum gratus Iulo 70  
 atque nouercali sedes praelata Lauino  
 conspicitur sublimis apex, cui candida nomen  
 scrofa dedit, laetis Phrygibus mirabile sumen  
 et numquam uisis triginta clara mamillis.  
 tandem intrat positas inclusa per aequora moles 75  
 Tyrrenamque pharon porrectaque bracchia rursum  
 quae pelago occurrunt medio longeque relincunt  
 Italiam; non sic igitur mirabere portus  
 quos natura dedit. sed trunca puppe magister  
 interiora petit Baianae peruia cumbae 80  
 tuti stagna sinus, gaudent ubi uertice raso  
 garrula securi narrare pericula nautae.  
 ite igitur, pueri, linguis animisque fauentes  
 sartaque delubris et farra inponite cultris  
 ac mollis ornate focos glebamque uirentem. 85  
 iam sequar et sacro, quod praestat, rite peracto  
 inde domum repetam, graciles ubi parua coronas  
 accipiunt fragili simulacra nitentia cera.  
 hic nostrum placabo Iouem Laribusque paternis  
 tura dabo atque omnis uiolae iactabo colores. 90  
 cuncta nitent, longos erexit ianua ramos  
 et matutinis operatur festa lucernis.  
 neu suspecta tibi sint haec, Coruine, Catullus,

pro cuius reditu tot pono altaria, paruos  
 tres habet heredes. libet expectare quis aegram 95  
 et claudentem oculos gallinam inpendat amico  
 tam sterili; uerum haec nimia est inpensa, coturnix  
 nulla umquam pro patre cadet. sentire calorem  
 si coepit locuples Gallitta et Pacius orbi,  
 legitime fixis uestitur tota libellis 100  
 porticus, existunt qui promittant hecatomben,  
 quatenus hic non sunt nec uenales elephanti,  
 nec Latio aut usquam sub nostro sidere talis  
 belua concipitur, sed furua gente petita  
 arboribus Rutulis et Turni pascitur agro, 105  
 Caesaris armentum nulli seruire paratum  
 priuato, siquidem Tyrio parere solebant  
 Hannibali et nostris ducibus regique Molosso  
 horum maiores ac dorso ferre cohortis,  
 partem aliquam belli, et euntem in proelia turrem. 110  
 nulla igitur mora per Nouium, mora nulla per Histrum  
 Pacuuium, quin illud ebur ducatur ad aras  
 et cadat ante Lares Gallittae uictima sola  
 tantis digna deis et captatoribus horum.  
 alter enim, si concedas, mactare uouebit 115  
 de grege seruorum magna et pulcherrima quaeque  
 corpora, uel pueris et frontibus ancillarum  
 inponet uittas et, si qua est nubilis illi  
 Iphigenia domi, dabit hanc altaribus, etsi  
 non sperat tragicae furtiua piacula ceruae. 120  
 laudo meum ciuem, nec comparo testamento  
 mille rates; nam si Libitinam euaserit aeger,  
 delebit tabulas inclusus carcere nassae  
 post meritum sane mirandum atque omnia soli  
 forsans Pacuuius breuiter dabit, ille superbus 125  
 incedet uictis riualibus. ergo uides quam  
 grande operae pretium faciat iugulata Mycenis.  
 uiuat Pacuuius quaeso uel Nestora totum,  
 possideat quantum rapuit Nero, montibus aurum  
 exaequet, nec amet quemquam nec ametur ab ullo.

### Satura XIII

Exemplo quodcumque malo committitur, ipsi  
displicet auctori. prima est haec ultio, quod se  
iudice nemo nocens absoluitur, improba quamuis  
gratia fallaci praetoris uicerit urna.  
quid sentire putas homines, Caluine, recenti           5  
de scelere et fidei uiolatae crimine? sed nec  
tam tenuis census tibi contigit, ut mediocris  
iacturae te mergat onus, nec rara uidemus  
quae pateris: casus multis hic cognitus ac iam  
tritus et e medio fortunae ductus aceruo.           10  
ponamus nimios gemitus. flagrantior aequo  
non debet dolor esse uiri nec uolnere maior.  
tu quamuis leuium minimam exigamque malorum  
particulam uix ferre potes spumantibus ardens  
uisceribus, sacrum tibi quod non reddat amicus           15  
depositum? stupet haec qui iam post terga reliquit  
sexaginta annos Fonteio consule natus?  
an nihil in melius tot rerum proficis usu?  
magna quidem, sacris quae dat praecepta libellis,  
uictrix fortunae sapientia, ducimus autem           20  
hos quoque felices, qui ferre incommoda uitae  
nec iactare iugum uita didicere magistra.  
quae tam festa dies, ut cesset prodere furem,  
perfidiam, fraudes atque omni ex crimine lucrum  
quaesitum et partos gladio uel pyxide nummos?           25  
rari quippe boni, numera, uix sunt totidem quot  
Thebarum portae uel diuitis ostia Nili.  
nona aetas agitur peioraque saecula ferri  
temporibus, quorum sceleri non inuenit ipsa  
nomen et a nullo posuit natura metallo.           30  
nos hominum diuomque fidem clamore ciemus  
quanto Faesidium laudat uocalis agentem  
sportula? dic, senior bulla dignissime, nescis  
quas habeat ueneres aliena pecunia? nescis  
quem tua simplicitas risum uulgo moueat, cum           35  
exigis a quoquam ne peieret et putet ullis  
esse aliquod numen templis araeque rubenti?  
quondam hoc indigenae uiuebant more, priusquam  
sumeret agrestem posito diademate falcem  
Saturnus fugiens, tunc cum uirguncula Iuno           40  
et priuatus adhuc Idaeis Iuppiter antris;  
nulla super nubes conuiuia caelicolarum  
nec puer Iliacus formonsa nec Herculis uxor  
ad cyathos et iam siccato nectare tergens



brachia Volcanus Liparaea nigra taberna; 45  
 prandebat sibi quisque deus nec turba deorum  
 talis ut est hodie, contentaque sidera paucis  
 numinibus miserum urgebant Atlanta minori  
 pondere; nondum imi sortitus triste profundi  
 imperium Sicula toruos cum coniuge Pluton, 50  
 nec rota nec Furiae nec saxum aut uolturis atri  
 poena, sed infernis hilares sine regibus umbrae.  
 improbitas illo fuit admirabilis aeuo,  
 credebant quo grande nefas et morte piandum  
 si iuuenis uetulo non adsurrexerat et si 55  
 barbato cuicumque puer, licet ipse uideret  
 plura domi fraga et maiores glandis aceruos;  
 tam uenerabile erat praecedere quattuor annis  
 primaque par adeo sacrae lanugo senectae.  
 nunc si depositum non infitietur amicus, 60  
 si reddat ueterem cum tota aerugine follem,  
 prodigiosa fides et Tuscis digna libellis  
 quaeque coronata lustrari debeat agna.  
 egregium sanctumque uirum si cerno, bimembri  
 hoc monstrum puero et miranti sub aratro 65  
 piscibus inuentis et fetae comparo mularae,  
 sollicitus, tamquam lapides effuderit imber  
 examenque apium longa consederit uua  
 culmine delubri, tamquam in mare fluxerit amnis  
 gurgitibus miris et lactis uertice torrens. 70  
 intercepta decem quereris sestertia fraude  
 sacrilega. quid si bis centum perdidit alter  
 hoc arcana modo, maiorem tertius illa  
 summam, quam patulae uix ceperat angulus arcae?  
 tam facile et pronum est superos contemnere testes, 75  
 si mortalis idem nemo sciat. aspice quanta  
 uoce neget, quae sit ficti constantia uoltus.  
 per Solis radios Tarpeiaque fulmina iurat  
 et Martis frameam et Cirrhaei spicula uatis,  
 per calamos uenatricis pharetramque puellae 80  
 perque tuum, pater Aegaei Neptune, tridentem,  
 addit et Herculeos arcus hastamque Mineruae,  
 quidquid habent telorum armamentaria caeli.  
 si uero et pater est, 'comedam' inquit flebile nati  
 sinciput elixi Pharioque madentis aceto.' 85  
 sunt in fortunae qui casibus omnia ponant  
 et nullo credant mundum rectore moueri  
 natura uolente uices et lucis et anni,  
 atque ideo intrepidi quaecumque altaria tangunt.  
 [est alius metuens ne crimen poena sequatur.] 90  
 hic putat esse deos et peierat, atque ita secum:  
 'cernat quodcumque uolet de corpore nostro  
 Isis et irato feriat mea lumina sistro,

dummodo uel caecus teneam quos abnego nummos.  
et pthisis et uomicae putres et dimidium crus 95  
sunt tanti. pauper locupletem optare podagram  
nec dubitet Ladas, si non eget Anticyra nec  
Archigene; quid enim uelocis gloria plantae  
praestat et esuriens Pisaeae ramus oliuae?  
ut sit magna, tamen certe lenta ira deorum est; 100  
si curant igitur cunctos punire nocentes,  
quando ad me uenient? sed et exorabile numen  
fortasse experiar; solet his ignoscere. multi  
committunt eadem diuerso crimina fato:  
ille crucem sceleris pretium tulit, hic diadema.' 105  
sic animum dirae trepidum formidine culpae  
confirmat, tunc te sacra ad delubra uocantem  
praecedit, trahere immo ultro ac uexare paratus.  
nam cum magna malae superest audacia causae,  
creditur a multis fiducia. mimum agit ille, 110  
urbani qualem fugitiuus scurra Catulli:  
tu miser exclamas, ut Stentora uincere possis,  
uel potius quantum Gradius Homericus, 'audis,  
Iuppiter, haec nec labra moues, cum mittere uocem  
debueris uel marmoreus uel aeneus? aut cur 115  
in carbone tuo charta pia tura soluta  
ponimus et sectum uituli iecur albaque porci  
omenta? ut uideo, nullum discrimen habendum est  
effigies inter uestras statuamque Vagelli.'  
accipe quae contra ualeat solacia ferre 120  
et qui nec Cynicos nec Stoica dogmata legit  
a Cynicis tunica distantia, non Epicurum  
suspicit exigui laetum plantaribus horti.  
curentur dubii medicis maioribus aegri:  
tu uenam uel discipulo committe Philippi. 125  
si nullum in terris tam detestabile factum  
ostendis, taceo, nec pugnis caedere pectus  
te ueto nec plana faciem contundere palma,  
quandoquidem accepto claudenda est ianua damno,  
et maiore domus gemitu, maiore tumultu 130  
planguntur nummi quam funera; nemo dolorem  
fingit in hoc casu, uestem diducere summam  
contentus, uexare oculos umore coacto:  
ploratur lacrimis amissa pecunia ueris.  
sed si cuncta uides simili fora plena querella, 135  
si deciens lectis diuersa parte tabellis  
uana superuacui dicunt chirographa ligni,  
arguit ipsorum quos littera gemmaque princeps  
sardonichum, oculis quae custoditur eburnis,  
ten, o delicias, extra communia censes 140  
ponendum, quia tu gallinae filius albae,  
nos uiles pulli nati infelicibus ouis?

rem pateris modicam et mediocri bile ferendam,  
 si flectas oculos maiora ad crimina. confer  
 conductum latronem, incendia sulphure coepta 145  
 atque dolo, primos cum ianua colligit ignes;  
 confer et hos, ueteris qui tollunt grandia templi  
 pocula adorandae robiginis et populorum  
 dona uel antiquo positas a rege coronas;  
 haec ibi si non sunt, minor exstat sacrilegus qui 150  
 radat inaurati femur Herculis et faciem ipsam  
 Neptuni, qui bratteolam de Castore ducat;  
 [an dubitet solitus totum conflare Tonantem?]  
 confer et artifices mercatoremque ueneni  
 et deducendum corio bouis in mare, cum quo 155  
 clauditur aduersis innoxia simia fatis.  
 haec quota pars scelerum, quae custos Gallicus urbis  
 usque a lucifero donec lux occidat audit?  
 humani generis mores tibi nosse uolenti  
 sufficit una domus; paucos consume dies et 160  
 dicere te miserum, postquam illinc ueneris, aude.  
 quis tumidum guttur miratur in Alpibus aut quis  
 in Meroe crasso maiorem infante mamillam?  
 caerulea quis stupuit Germani lumina, flauam  
 caesariem et madido torquentem cornua cirro? 165  
 [nempe quod haec illis natura est omnibus una.]  
 ad subitas Thracum uolucres nubemque sonoram  
 Pygmaeus paruis currit bellator in armis,  
 mox inpar hosti raptusque per aera curuis  
 unguibus a saeua fertur grue. si uideas hoc 170  
 gentibus in nostris, risu quatiare; sed illic,  
 quamquam eadem adsidue spectentur proelia, ridet  
 nemo, ubi tota cohors pede non est altior uno.  
 'nullae peiuri capitis fraudisque nefandae  
 poena erit?' la reptum crede hunc grauiore catena 175  
 protinus et nostro (quid plus uelit ira?) necari  
 arbitrio: manet illa tamen iactura nec umquam  
 depositum tibi sospes erit, sed corpore trunco  
 inuidiosa dabit minimus solacia sanguis.  
 'at uindicta bonum uita iucundius ipsa.' 180  
 nempe hoc indocti, quorum praecordia nullis  
 interdum aut leuibus uideas flagrantia causis.  
 [quantulacumque adeo est occasio sufficit irae.]  
 Chrysippus non dicet idem nec mite Thaletis  
 ingenium dulcique senex uicinus Hymetto, 185  
 qui partem acceptae saeua inter uincla cicutae  
 accusatori nollet dare. [plurima felix  
 paulatim uitia atque errores exuit, omnes  
 prima docens rectum, sapientia.] quippe minuti  
 semper et infirmi est animi exiguique uoluptas 190  
 ultio. continuo sic collige, quod uindicta

nemo magis gaudet quam femina. cur tamen hos tu  
 euasisse putes, quos diri conscia facti  
 mens habet attonitos et surdo uerbere caedit  
 occultum quatiante animo tortore flagellum? 195  
 poena autem uehemens ac multo saeuior illis  
 quas et Caedicius grauis inuenit et Rhadamanthus,  
 nocte dieque suum gestare in pectore testem.  
 Spartano cuidam respondit Pythia uates  
 haut inpunitum quondam fore quod dubitaret 200  
 depositum retinere et fraudem iure tueri  
 iurando. quaerebat enim quae numinis esset  
 mens et an hoc illi facinus suaderet Apollo.  
 reddidit ergo metu, non moribus, et tamen omnem  
 uocem adyti dignam templo ueramque probauit 205  
 extinctus tota pariter cum prole domoque  
 et quamuis longa deductis gente propinquis.  
 has patitur poenas peccandi sola uoluntas.  
 nam scelus intra se tacitum qui cogitat ullum  
 facti crimen habet. cedo si conata peregit. 210  
 perpetua anxietas nec mensae tempore cessat  
 faucibus ut morbo siccis interque molares  
 difficili crescente cibo, sed uina misellus  
 expuit, Albani ueteris pretiosa senectus  
 displicet; ostendas melius, densissima ruga 215  
 cogitur in frontem uelut acri ducta Falerno.  
 nocte breuem si forte indulsit cura soporem  
 et toto uersata toro iam membra quiescunt,  
 continuo templum et uiolati numinis aras  
 et, quod praecipuis mentem sudoribus urguet, 220  
 te uidet in somnis; tua sacra et maior imago  
 humana turbat pauidum cogitque fateri.  
 hi sunt qui trepidant et ad omnia fulgura pallent,  
 cum tonat, exanimes primo quoque murmure caeli,  
 non quasi fortuitus nec uentorum rabie sed 225  
 iratus cadat in terras et iudicet ignis.  
 illa nihil nocuit, cura grauiore timetur  
 proxima tempestas uelut hoc dilata sereno.  
 praeterea lateris uigili cum febre dolorem  
 si coepere pati, missum ad sua corpora morbum 230  
 infesto credunt a numine; saxa deorum  
 haec et tela putant. pecudem spondere sacello  
 balantem et Laribus cristam promittere galli  
 non audent; quid enim sperare nocentibus aegris  
 concessum? uel quae non dignior hostia uita? 235  
 [mobilis et uaria est ferme natura malorum.]  
 cum scelus admittunt, superest constantia; quod fas  
 atque nefas tandem incipiunt sentire peractis  
 criminibus. tamen ad mores natura recurrit  
 damnatos fixa et mutari nescia. nam quis 240

peccandi finem posuit sibi? quando recepit  
eiectum semel attrita de fronte ruborem?  
quisnam hominum est quem tu contentum uideris uno  
flagitio? dabit in laqueum uestigia noster  
perfidus et nigri patietur carceris uncum                    245  
aut maris Aegaei rupem scopulosque frequentes  
exulibus magnis. poena gaudebis amara  
nominis inuisi tandemque fatebere laetus  
nec surdum nec Teresian quemquam esse deorum.

Satura XIV

Plurima sunt, Fuscine, et fama digna sinistra  
[et quod maiorum uitia sequiturque minores] 1a  
et nitidis maculam haesuram figentia rebus,  
quae monstrant ipsi pueris traduntque parentes.  
si damnosa senem iuuat alea, ludit et heres  
bullatus paruoque eadem mouet arma fritillo. 5  
nec melius de se cuiquam sperare propinquo  
concedet iuuenis, qui radere tubera terrae,  
boletum condire et eodem iure natantis  
mergere ficedulas didicit nebulone parente  
et cana monstrante gula. cum septimus annus 10  
transierit puerum, nondum omni dente renato,  
barbatos licet admoueas mille inde magistros,  
hinc totidem, cupiet lauto cenare paratu  
semper et a magna non degenerare culina.  
mitem animum et mores modicis erroribus aequos 15  
praecipit atque animas seruorum et corpora nostra  
materia constare putat paribusque elementis,  
an saeuire docet Rutilus, qui gaudet acerbo  
plagarum strepitu et nullam Sirena flagellis  
comparat, Antiphates trepidi laris ac Polyphemus, 20  
tunc felix, quotiens aliquis tortore uocato  
uritur ardenti duo propter lintea ferro?  
quid suadet iuueni laetus stridore catenae,  
quem mire adficiunt inscripta, ergastula, carcer?  
rusticus expectas ut non sit adultera Largae 25  
filia, quae numquam maternos dicere moechos  
tam cito nec tanto poterit contexere cursu  
ut non ter deciens respiret? conscia matri  
uirgo fuit, ceras nunc hac dictante pusillas  
implet et ad moechum dat eisdem ferre cinaedis. 30  
sic natura iubet: uelocius et citius nos  
corrumpunt uitiorum exempla domestica, magnis  
cum subeant animos auctoribus. unus et alter  
forsitan haec spernant iuuenes, quibus arte benigna  
et meliore luto finxit praecordia Titan, 35  
sed reliquos fugienda patrum uestigia ducunt  
et monstrata diu ueteris trahit orbita culpae.  
abstineas igitur damnandis. huius enim uel  
una potens ratio est, ne crimina nostra sequantur  
ex nobis geniti, quoniam dociles imitandis 40  
turpibus ac prauis omnes sumus, et Catilinam  
quocumque in populo uideas, quocumque sub axe,  
sed nec Brutus erit Bruti nec auunculus usquam.

nil dictu foedum uisusque haec limina tangat  
 intra quae pater est. procul, a procul inde puellae 45  
 lenonum et cantus pernoctantis parasiti.  
 maxima debetur puero reuerentia, si quid  
 turpe paras, nec tu pueri contempseris annos,  
 sed peccaturo obstet tibi filius infans.  
 nam si quid dignum censoris fecerit ira 50  
 quandoque et similem tibi se non corpore tantum  
 nec uultu dederit, morum quoque filius et qui  
 omnia deterius tua per uestigia peccet,  
 corripies nimirum et castigabis acerbo  
 clamore ac post haec tabulas mutare parabis. 55  
 unde tibi frontem libertatemque parentis,  
 cum facias peiora senex uacuumque cerebro  
 iam pridem caput hoc uentosa cucurbita quaerat?  
 hospite uenturo cessabit nemo tuorum.  
 'erre pauimentum, nitidas ostende columnas, 60  
 arida cum tota descendat aranea tela,  
 hic leue argentum, uasa aspera tergeat alter.'  
 uox domini furit instantis uirgamque tenentis.  
 ergo miser trepidas, ne stercore foeda canino  
 atria displiceant oculis uenientis amici, 65  
 ne perfusa luto sit porticus, et tamen uno  
 semodio scobis haec emendat seruulus unus:  
 illud non agitas, ut sanctam filius omni  
 aspiciat sine labe domum uitioque carentem?  
 gratum est quod patriae ciuem populoque dedisti, 70  
 si facis ut patriae sit idoneus, utilis agris,  
 utilis et bellorum et pacis rebus agendis.  
 plurimum enim intererit quibus artibus et quibus hunc tu  
 moribus instituas. serpente ciconia pullos  
 nutrit et inuenta per deuia rura lacerta: 75  
 illi eadem sumptis quaerunt animalia pinnis.  
 uoltur iumento et canibus crucibusque relictis  
 ad fetus properat partemque cadaueris adfert:  
 hic est ergo cibus magni quoque uolturis et se  
 pascentis, propria cum iam facit arbore nidos. 80  
 sed leporem aut capream famulae Iouis et generosae  
 in saltu uenantur aues, hinc praeda cubili  
 ponitur: inde autem cum se matura leuauit  
 progenies stimulante fame festinat ad illam  
 quam primum praedam rupto gustauerat ouo. 85  
 aedificator erat Caetronius et modo curuo  
 litore Caietae, summa nunc Tiburis arce,  
 nunc Praenestinis in montibus alta parabat  
 culmina uillarum Graecis longeque petitis  
 marmoribus uincens Fortunae atque Herculis aedem, 90  
 ut spado uincebat Capitolia nostra Posides.  
 dum sic ergo habitat Caetronius, inminuit rem,

fregit opes, nec parua tamen mensura relictæ  
partis erat. totam hanc turbauit filius amens,  
dum meliore nouas attollit marmore uillas. 95

quidam sortiti metuentem sabbata patrem  
nil præter nubes et caeli numen adorant,  
nec distare putant humana carne suillam,  
qua pater abstinuit, mox et præputia ponunt;  
Romanas autem soliti contemnere leges 100

Iudaicum ediscunt et seruant ac metuunt ius,  
tradidit arcano quodcumque uolumine Moyses:  
non monstrare uias eadem nisi sacra colenti,  
quaesitum ad fontem solos deducere uerpos.  
sed pater in causa, cui septima quæque fuit lux 105

ignaua et partem uitæ non attigit ullam.  
sponte tamen iuuenes imitantur cetera, solam  
inuiti quoque auaritiæ exercere iubentur.  
fallit enim uitium specie uirtutis et umbra,  
cum sit triste habitu uultuque et ueste seuerum, 110

nec dubie tamquam frugi laudetur auarus,  
tamquam parcus homo et rerum tutela suarum  
certa magis quam si fortunas seruet easdem  
Hesperidum serpens aut Ponticus. adde quod hunc de  
quo loquor egregium populus putat acquirendi 115

artificem; quippe his crescunt patrimonia fabris  
[sed crescunt quocumque modo maioraque fiunt]  
incude adsidua semperque ardente camino.  
[et pater ergo animi felices credit auaros]

qui miratur opes, qui nulla exempla beati 120

pauperis esse putat, iuuenes hortatur ut illa  
ire uia pergant et eidem incumbere sectæ.  
sunt quaedam uitiorum elementa, his protinus illos  
inbuit et cogit minimas ediscere sordes;  
mox acquirendi docet insatiabile uotum. 125

seruorum uentres modio castigat iniquo  
ipse quoque esuriens, neque enim omnia sustinet umquam  
mucida caerulei panis consumere frusta,  
hesternum solitus medio seruare minutal

Septembri nec non differre in tempora cenæ 130

alterius conchem aestiuam cum parte lacerti  
signatam uel dimidio putrique siluro  
filaque sectiui numerata includere porri.  
inuitatus ad hæc aliquis de ponte negabit.

sed quo diuitias hæc per tormenta coactas, 135

cum furor haut dubius, cum sit manifesta phrenesis,  
ut locuples moriaris, egentis uiuere fato?  
interea, pleno cum turget sacculus ore,  
crescit amor nummi quantum ipsa pecunia creuit,  
et minus hanc optat qui non habet. ergo paratur 140

altera uilla tibi, cum rus non sufficit unum



et proferre libet finis maiorque uidetur  
 et melior uicina seges; mercaris et hanc et  
 arbusta et densa montem qui canet oliua.  
 quorum si pretio dominus non uincitur ullo, 145  
 nocte boues macri lassoque famelica collo  
 iumenta ad uiridis huius mittentur aristas  
 nec prius inde domum quam tota noualia saeuos  
 in uentres abeant, ut credas falcibus actum.  
 dicere uix possis quam multi talia plorent 150  
 et quot uenales iniuria fecerit agros.  
 sed qui sermones, quam foede bucina famae!  
 ' quid necet haec?' inquit tunicam mihi malo lupini  
 quam si me toto laudet uicinia pago  
 exigui ruris paucissima farra secantem.' 155  
 scilicet et morbis et debilitate carebis  
 et luctum et curam effugies, et tempora uitae  
 longa tibi posthac fato meliore dabuntur,  
 si tantum culti solus possederis agri  
 quantum sub Tatio populus Romanus arabat. 160  
 mox etiam fractis aetate ac Punica passis  
 proelia uel Pyrrhum inmanem gladiosque Molossos  
 tandem pro multis uix iugera bina dabantur  
 uulneribus; merces haec sanguinis atque laboris  
 nulli uisa umquam meritis minor aut ingratae 165  
 curta fides patriae. saturabat glebula talis  
 patrem ipsum turbamque casae, qua feta iacebat  
 uxor et infantes ludebant quattuor, unus  
 uernula, tres domini; sed magnis fratribus horum  
 a scrobe uel sulco redeuntibus altera cena 170  
 amplior et grandes fumabant pultibus ollae.  
 nunc modus hic agri nostro non sufficit horto.  
 inde fere scelerum causae, nec plura uenena  
 miscuit aut ferro grassatur saepius ullum  
 humanae mentis uitium quam saeua cupido 175  
 inmodici census. nam diues qui fieri uolt,  
 et cito uolt fieri; sed quae reuerentia legum,  
 quis metus aut pudor est umquam properantis auari?  
 ' uiuete contenti casulis et collibus istis,  
 o pueri,' Marsus dicebat et Hernicus olim 180  
 Vestinusque senex, ' anem quaeramus aratro,  
 qui satis est mensis: laudant hoc numina ruris,  
 quorum ope et auxilio gratae post munus aristae  
 contingunt homini ueteris fastidia quercus.  
 nil uetitum fecisse uolet, quem non pudet alto 185  
 per glaciem perone tegi, qui summoet euros  
 pellibus inuersis: peregrina ignotaque nobis  
 ad scelus atque nefas, quaecumque est, purpura ducit.'  
 haec illi ueteres praecepta minoribus; at nunc  
 post finem autumnii media de nocte supinum 190

clamosus iuuenem pater excitat: 'accipe ceras,  
 scribe, puer, uigila, causas age, perlege rubras  
 maiorum leges; aut uitem posce libello,  
 sed caput intactum buxo narisque pilosas  
 adnotet et grandes miretur Laelius alas;                    195  
 dirue Maurorum attegias, castella Brigantum,  
 ut locupletem aquilam tibi sexagesimus annus  
 adferat; aut, longos castrorum ferre labores  
 si piget et trepidum soluunt tibi cornua uentrem  
 cum lituis audita, pares quod uendere possis                    200  
 pluris dimidio, nec te fastidia mercis  
 ullius subeant ablegandae Tiberim ultra,  
 neu credas ponendum aliquid discriminis inter  
 unguenta et corium: lucri bonus est odor ex re  
 qualibet. illa tuo sententia semper in ore                    205  
 uersetur dis atque ipso Ioue digna poeta:  
 "unde habeas quaerit nemo, sed oportet habere."  
 [hoc monstrant uetulae pueris repentibus assae,  
 hoc discutunt omnes ante alpha et beta puellae.]  
 talibus instantem monitis quemcumque parentem                    210  
 sic possem adfari: ' ~~di~~ o uanissime, quis te  
 festinare iubet? meliorem praesto magistro  
 discipulum. securus abi: uinceris, ut Aiax  
 praeteriit Telamonem, ut Pelea uicit Achilles.  
 parcendum est teneris; nondum impleuere medullas                    215  
 maturae mala nequitiae. cum pectere barbam  
 coeperit et longae mucronem admittere cultri,  
 falsus erit testis, uendet periuria summa  
 exigua et Cereris tangens aramque pedemque.  
 elatam iam crede nurum, si limina uestra                    220  
 mortifera cum dote subit. quibus illa premetur  
 per somnum digitis! nam quae terraque marique  
 adquirenda putas breuior uia conferet illi;  
 nullus enim magni sceleris labor. "haec ego numquam  
 mandauit" dices olim "nec talia suasi."                    225  
 mentis causa malae tamen est et origo penes te.  
 nam quisquis magni census praecepit amorem  
 et laeuo monitu pueros producit auaros  
 [et qui per fraudes patrimonia conduplicari]  
 dat libertatem et totas effundit habenas                    230  
 curriculo; quem si reuoces, subsistere nescit  
 et te contempto rapitur metisque relictis.  
 nemo satis credit tantum delinquere quantum  
 permittas: adeo indulgent sibi latius ipsi.  
 cum dicis iuueni stultum qui donet amico,                    235  
 qui paupertatem leuet attollatque propinqui,  
 et spoliare doces et circumscribere et omni  
 crimine diuitias acquirere, quarum amor in te  
 quantus erat patriae Deciorum in pectore, quantum

dilexit Thebas, si Graecia uera, Menoeceus, 240  
in quorum sulcis legiones dentibus anguis  
cum clipeis nascuntur et horrida bella capessunt  
continuo, tamquam et tubicen surrexerit una.  
ergo ignem, cuius scintillas ipse dedisti,  
flagrantem late et rapientem cuncta uidebis. 245  
nec tibi parceretur misero, trepidumque magistrum  
in cauea magno fremitu leo tollet alumnus.  
nota mathematicis genesis tua, sed graue tardas  
expectare colus: morieris stamine nondum  
abrupto. iam nunc obstas et uota moraris, 250  
iam torquet iuuenem longa et ceruina senectus.  
ocius Archigenen quaere atque eme quod Mithridates  
composuit: si uis aliam decerpere ficum  
atque alias tractare rosas, medicamen habendum est,  
sorbere ante cibum quod debeat et pater et rex.' 255  
monstro uoluptatem egregiam, cui nulla theatra,  
nulla aequare queas praetoris pulpita lauti,  
si spectes quanto capitis discrimine constant  
incrementa domus, aerata multus in arca  
fiscus et ad uigilem ponendi Castora nummi, 260  
ex quo Mars Vltor galeam quoque perdidit et res  
non potuit seruare suas. ergo omnia Florae  
et Cereris licet et Cybeles aulaea relinquo:  
tanto maiores humana negotia ludi.  
an magis oblectant animum iactata petauro 265  
corpora quique solet rectum descendere funem  
quam tu, Corycia semper qui puppe moraris  
atque habitas, coro semper tollendus et austro,  
perditus ~ac uilis~ sacci mercator olentis,  
qui gaudes pingue antiquae de litore Cretae 270  
passum et municipes Iouis aduexisse lagonas?  
hic tamen ancipiti figens uestigia planta  
uictum illa mercede parat, brumamque famemque  
illa reste cauet: tu propter mille talenta  
et centum uillas temerarius. aspice portus 275  
et plenum magnis trabibus mare: plus hominum est iam  
in pelago. ueniet classis quocumque uocarit  
spes lucri, nec Carpathium Gaetulaque tantum  
aequora transiliet, sed longe Calpe relicta  
audiet Herculeo stridentem gurgite solem. 280  
grande operae pretium est, ut tenso folle reuerti  
inde domum possis tumidaque superbus aluta,  
Oceani monstra et iuuenes uidisse marinos.  
non unus mentes agitatur furor. ille sororis  
in manibus uoltu Eumenidum terretur et igni, 285  
hic boue percusso mugire Agamemnona credit  
aut Ithacum. parcat tunicis licet atque lacernis,  
curatoris eget qui nauem mercibus implet

ad summum latus et tabula distinguitur unda,  
 cum sit causa mali tanti et discriminis huius 290  
 concisum argentum in titulos faciesque minutas.  
 occurrunt nubes et fulgura: ' soluit funem'  
 frumenti dominus clamat piperisue coempti,  
 ' nitor hic caeli, nil fascia nigra minatur;  
 aestiuom tonat.' infelix hac forsitan ipsa 295  
 nocte cadet fractis trabibus fluctuque premetur  
 obrutus et zonam laeua morsuque tenebit.  
 sed cuius uotis modo non suffecerat aurum  
 quod Tagus et rutila uoluit Pactolus harena,  
 frigida sufficient uelantes inguina panni 300  
 exiguusque cibus, mersa rate naufragus assem  
 dum rogat et picta se tempestate tuetur.  
 tantis parta malis cura maiore metuque  
 seruantur: misera est magni custodia census.  
 dispositis praediues amis uigilare cohortem 305  
 seruorum noctu Licinus iubet, attonitus pro  
 electro signisque suis Phrygiaque columna  
 atque ebore et lata testudine. dolia nudi  
 non ardent Cynici; si fregeris, altera fiet  
 cras domus atque eadem plumbo commissa manebit. 310  
 sensit Alexander, testa cum uidit in illa  
 magnum habitatorem, quanto felicior hic qui  
 nil cuperet quam qui totum sibi posceret orbem  
 passurus gestis aequanda pericula rebus.  
 nullum numen habes, si sit prudentia: nos te, 315  
 nos facimus, Fortuna, deam. mensura tamen quae  
 sufficiat census, si quis me consulat, edam:  
 in quantum sitis atque fames et frigora poscunt,  
 quantum, Epicure, tibi paruis suffecit in hortis,  
 quantum Socratici ceperunt ante penates; 320  
 numquam aliud natura, aliud sapientia dicit.  
 acribus exemplis uideor te cludere? misce  
 ergo aliquid nostris de moribus, effice summam  
 bis septem ordinibus quam lex dignatur Othonis.  
 haec quoque si rugam trahit extenditque labellum, 325  
 sume duos equites, fac tertia quadringenta.  
 si nondum impleui gremium, si panditur ultra,  
 nec Croesi fortuna umquam nec Persica regna  
 sufficient animo nec diuitiae Narcissi,  
 indulsit Caesar cui Claudius omnia, cuius 330  
 paruit imperiis uxorem occidere iussus.

Satura XV

Quis nescit, Volusi Bithynice, qualia demens  
Aegyptos portenta colat? crocodilon adorat  
pars haec, illa pauet saturam serpentibus ibin.  
effigies sacri nitet aurea cercopithecii,  
dimidio magicae resonant ubi Memnone chordae 5  
atque uetus Thebe centum iacet obruta portis.  
illic aeluros, hic piscem fluminis, illic  
oppida tota canem uenerantur, nemo Dianam.  
porrum et caepe nefas uiolare et frangere morsu  
(o sanctas gentes, quibus haec nascuntur in hortis 10  
numina!), lanatis animalibus abstinet omnis  
mensa, nefas illic fetum iugulare capellae:  
carnibus humanis uesci licet. attonito cum  
tale super cenam facinus narraret Vlixes  
Alcinoo, bilem aut risum fortasse quibusdam 15  
mouerat ut mendax aretalogus. ' in mare nemo  
hunc abicit saeua dignum ueraque Charybdi,  
fingentem inmanis Laestrygonas et Cyclopas?  
nam citius Scyllam uel concurrentia saxa  
Cyaneis plenos et tempestatibus utres 20  
crediderim aut tenui percussum uerbere Circes  
et cum remigibus grunnisse Elpenora porcis.  
tam uacui capitis populum Phaeaca putauit?'  
sic aliquis merito nondum ebrius et minimum qui  
de Corcyraea temetum duxerat urna; 25  
solus enim haec Ithacus nullo sub teste canebat.  
nos miranda quidem sed nuper consule Iunco  
gesta super calidae referemus moenia Copti,  
nos uolgi scelus et cunctis grauiora coturnis;  
nam scelus, a Pyrrha quamquam omnia syrmata uoluas, 30  
nullus apud tragicos populus facit. accipe nostro  
dira quod exemplum feritas produxerit aeuo.  
inter finitimos uetus atque antiqua simultas,  
inmortale odium et numquam sanabile uulnus,  
ardet adhuc Ombos et Tentura. summus utrimque 35  
inde furor uolgo, quod numina uicinorum  
odit uterque locus, cum solos credat habendos  
esse deos quos ipse colit. sed tempore festo  
alterius populi rapienda occasio cunctis  
uisa inimicorum primoribus ac ducibus, ne 40  
laetum hilaremque diem, ne magnae gaudia cenae  
sentirent positis ad templa et compita mensis  
peruigilique toro, quem nocte ac luce iacentem  
septimus interdum sol inuenit. horrida sane

Aegyptos, sed luxuria, quantum ipse notauit, 45  
 barbara famoso non cedit turba Canopo.  
 adde quod et facilis uictoria de madidis et  
 blaesis atque mero titubantibus. inde uirorum  
 saltatus nigro tibicine, qualiacumque  
 unguenta et flores multaeque in fronte coronae: 50  
 hinc ieiunum odium. sed iurgia prima sonare  
 incipiunt; animis ardentibus haec tuba rixae.  
 dein clamore pari concurritur, et uice teli  
 saeuit nuda manus. paucae sine uolnere malae,  
 uix cuiquam aut nulli toto certamine nasus 55  
 integer. aspiceres iam cuncta per agmina uoltus  
 dimidios, alias facies et hiantia ruptis  
 ossa genis, plenos oculorum sanguine pugnosc.  
 ludere se credunt ipsi tamen et puerilis  
 exercere acies quod nulla cadauera calcent. 60  
 et sane quo tot rixantis milia turbae,  
 si uiuunt omnes? ergo acrior impetus et iam  
 saxa inclinatis per humum quaesita lacertis  
 incipiunt torquere, domestica seditioni  
 tela, nec hunc lapidem, qualis et Turnus et Ajax, 65  
 uel quo Tydides percussit pondere coxam  
 Aeneae, sed quem ualeant emittere dextrae  
 illis dissimiles et nostro tempore natae.  
 nam genus hoc uiuo iam decrescebat Homero,  
 terra malos homines nunc educat atque pusillos; 70  
 ergo deus, quicumque aspexit, ridet et odit.  
 a deuerticulo repetatur fabula. postquam  
 subsidiis aucti, pars altera promere ferrum  
 audet et infestis pugnam instaurare sagittis.  
 terga fugae celeri praestant instantibus Ombis 75  
 qui uicina colunt umbrosae Tentura palmae.  
 labitur hic quidam nimia formidine cursum  
 praecipitans capiturque. ast illum in plurima sectum  
 frustra et particulas, ut multis mortuus unus  
 sufficeret, totum corrosis ossibus edit 80  
 uictrix turba, nec ardenti decoxit aeno  
 aut ueribus, longum usque adeo tardumque putauit  
 expectare focos, contenta cadauere crudo.  
 hic gaudere libet quod non uiolauerit ignem,  
 quem summa caeli raptum de parte Prometheus 85  
 donauit terris; elemento gratulor, et te  
 exultare reor. sed qui mordere cadauer  
 sustinuit nil umquam hac carne libentius edit;  
 nam scelere in tanto ne quaeras et dubites an  
 prima uoluptatem gula senserit, ultimus ante 90  
 qui stetit, absumpto iam toto corpore ductis  
 per terram digitis aliquid de sanguine gustat.  
 Vascones, ut fama est, alimentis talibus usi

produxere animas, sed res diuersa, sed illic  
 fortunae inuidia est bellorumque ultima, casus 95  
 extremi, longae dira obsidionis egestas.  
 [huius enim, quod nunc agitur, miserabile debet  
 exemplum esse tibi, sicut modo dicta mihi gens.]  
 post omnis herbas, post cuncta animalia, quidquid  
 cogebat uacui uentris furor, hostibus ipsis 100  
 pallorem ac maciem et tenuis miserantibus artus,  
 membra aliena fame lacerabant, esse parati  
 et sua. quisnam hominum ueniam dare quisue deorum  
 uentribus abnueret dira atque inmania passis  
 et quibus illorum poterant ignoscere manes 105  
 quorum corporibus uescebantur? melius nos  
 Zenonis praecepta monent, [nec enim omnia quidam  
 pro uita facienda putant] sed Cantaber unde  
 Stoicus, antiqui praesertim aetate Metelli?  
 nunc totus Graias nostrasque habet orbis Athenas, 110  
 Gallia caesidicos docuit facunda Britannos,  
 de conducendo loquitur iam rhetore Thyle.  
 nobilis ille tamen populus, quem diximus, et par  
 uirtute atque fide sed maior clade Zacynthos  
 tale quid excusat: Maeotide saeuior ara 115  
 Aegyptos. quippe illa nefandi Taurica sacri  
 inuentrix homines, ut iam quae carmina tradunt  
 digna fide credas, tantum immolat; ulterius nil  
 aut grauius cultro timet hostia. quis modo casus  
 inpulit hos? quae tanta fames infestaque uallo 120  
 arma coegerunt tam detestabile monstrum  
 audere? anne aliam terra Memphitide sicca  
 inuidiam facerent nolenti surgere Nilo?  
 qua nec terribiles Cimbri nec Brittones umquam  
 Sauromataeque truces aut inmanes Agathyrsi, 125  
 hac saeuit rabie inbelle et inutile uolgus  
 paruula fictilibus solitum dare uela phaselis  
 et breuibus pictae remis incumbere testae.  
 nec poenam sceleri inuenies nec digna parabis  
 supplicia his populis, in quorum mente pares sunt 130  
 et similes ira atque fames. mollissima corda  
 humano generi dare se natura fatetur,  
 quae lacrimas dedit. haec nostri pars optima sensus.  
 plorare ergo iubet causam dicentis amici  
 squaloremque rei, pupillum ad iura uocantem 135  
 circumscriptorem, cuius manantia fletu  
 ora puellares faciunt incerta capilli.  
 naturae imperio gemimus, cum funus adultae  
 uirginis occurrit uel terra clauditur infans  
 et minor igne rogi. quis enim bonus et face dignus 140  
 arcana, qualem Cereris uolt esse sacerdos,  
 ulla aliena sibi credit mala? separat hoc nos

a grege mutorum, atque ideo uenerabile soli  
 sortiti ingenium diuinorumque capaces  
 atque exercendis pariendisque artibus apti 145  
 sensum a caelesti demissum traximus arce,  
 cuius egent prona et terram spectantia. mundi  
 principio indulisit communis conditor illis  
 tantum animas, nobis animum quoque, mutuus ut nos  
 adfectus petere auxilium et praestare iuberet, 150  
 dispersos trahere in populum, migrare uetusto  
 de nemore et proauis habitatas linquere siluas,  
 aedificare domos, laribus coniungere nostris  
 tectum aliud, tutos uicino limine somnos  
 ut conlata daret fiducia, protegere armis 155  
 lapsum aut ingenti nutantem uolnere ciuem,  
 communi dare signa tuba, defendier isdem  
 turribus atque una portarum clauae teneri.  
 sed iam serpentum maior concordia. parcit  
 cognatis maculis similis fera. quando leoni 160  
 fortior eripuit uitam leo? quo nemore umquam  
 expirauit aper maioris dentibus apri?  
 Indica tigris agit rabida cum tigride pacem  
 perpetuam, saeuis inter se conuenit ursis.  
 ast homini ferrum letale incude nefanda 165  
 produxisse parum est, cum rastra et sarcula tantum  
 adueta coquere et marris ac uomere lassi  
 nescierint primi gladios extendere fabri.  
 aspicimus populos quorum non sufficit irae  
 occidisse aliquem, sed pectora, bracchia, uoltum 170  
 crediderint genus esse cibi. quid diceret ergo  
 uel quo non fugeret, si nunc haec monstra uideret  
 Pythagoras, cunctis animalibus abstinuit qui  
 tamquam homine et uentri indulisit non omne legumen?



Satura XVI

Quis numerare queat felicitis praemia, Galli,  
militiae? nam si subeuntur prospera castra

\* \* \*

2a

me pauidum excipiat tironem porta secundo  
sidere. plus etenim fati ualet hora benigni  
quam si nos Veneris commendet epistula Marti  
et Samia genetrix quae delectatur harena.

5

commoda tractemus primum communia, quorum  
haut minimum illud erit, ne te pulsare togatus  
audeat, immo, etsi pulsetur, dissimulet nec  
audeat excussos praetori ostendere dentes  
et nigram in facie tumidis liuoribus offam  
atque oculum medico nil promittente relictum.

10

Bardaicus iudex datur haec punire uolenti  
calceus et grandes magna ad subsellia surae  
legibus antiquis castrorum et more Camilli  
seruato, miles ne uallum litiget extra  
et procul a signis. ' iustissimam centurionum  
cognitio est +igitur+ de milite, nec mihi derit  
ultio, si iustae defertur causa querellae.'

15

tota cohors tamen est inimica, omnesque manipuli  
consensu magno efficiunt curabilis ut sit  
uindicta et grauior quam iniuria. dignum erit ergo  
declamatoris mulino corde Vagelli,  
cum duo crura habeas, offendere tot caligas, tot  
milia clauorum. quis tam procul adsit ab urbe  
praeterea, quis tam Pylades, molem aggeris ultra  
ut ueniat? lacrimae siccentur protinus, et se  
excusaturos non sollicitemus amicos.

20

' al testem' iudex cum dixerit, audeat ille  
nescio quis, pugnos qui uidit, dicere ' uidi  
et credam dignum barba dignumque capillis  
maiorum. citius falsum producere testem  
contra paganum possis quam uera loquentem  
contra fortunam armati contraque pudorem.

30

praemia nunc alia atque alia emolumenta notemus  
sacramentorum. conuallem ruris auiti  
improbis aut campum mihi si uicinus ademit  
et sacrum effodit medio de limite saxum,  
quod mea cum patulo coluit puls annua libo,  
debitor aut sumptos pergit non reddere nummos  
uana superuacui dicens chirographa ligni,  
expectandus erit qui lites incohet annus  
totius populi. sed tum quoque mille ferenda

35

40

taedia, mille morae; totiens subsellia tantum  
sternuntur, iam facundo ponente lacernas 45  
Caedicio et Fusco iam micturiente parati  
digredimur, lentaque fori pugnamus harena.  
ast illis quos arma tegunt et balteus ambit  
quod placitum est ipsis praestatur tempus agendi,  
nec res atteritur longo sufflamine litis. 50  
solis praeterea testandi militibus ius  
uiuo patre datur. nam quae sunt parta labore  
militiae placuit non esse in corpore census,  
omne tenet cuius regimen pater. ergo Coranum  
signorum comitem castrorumque aera merentem 55  
quamuis iam tremulus captat pater; hunc fauor aequus  
prouehit et pulchro reddit sua dona labori.  
ipsius certe ducis hoc referre uidetur  
ut, qui fortis erit, sit felicissimus idem,  
ut laeti phaleris omnes et torquibus, omnes 60